

JOSHUA CAUK

THE BOOK OF JOSHUA

Then 1 Nak

Biahmaithi

Joshua cauk hi Khrihfa tling a simi hna caah a man a sungmi le mi lung a thawhter ngaitu cauk a si. Hi tuanbia nih a hun langhter mi hna hi thlarau lei thil ah aa khat ngaimi le profet he aa pehtlaimi thil zongah tuchan caah a biapi ngaimi a si. A nekcok tiang zongin kan zoh a si ahcun, Joshua hi kan Bawipa Jesuh Khrih a rak langter chungtu a rak si. Joshua nih titsa ralkap hna kha teinak ah a rak hruai hna bang khan, kan Bawipa Jesuh cu atu chan ah Khrihfabu hi thlarau ralkap a hruaitu a si ve. Kan cawnmi hna nihhin zeitindah kannih “Joshua Chan” minung hna nih hell kutka tei khawhnak dingah caan donghnak ah kan muko kan tum lai ti kha a langhter.

Biakam Hlun chanah cun thisen chuah in vawlei cungah i tuk thahnak a rak um nain, atu ah cun Khrihfa nih cunglei van hmun ahkhin thlarau raldoh a si cang. Efisa 6:12 nih, “Zeicahtiah kan dohmi hna cu minung kha si loin, vancung khua i a ummi thlarau sual thawnnak hna le ukto hna le nawlungeitu hna le hi a muimi chan lianghngannak hna hi an si” tiah a kan cawnpiak. Biakam Hlun chungah Israel miphun hna nih, “caw hnuk le khuatizu in a khatmi” ram kha co awkah ral an rak tuk. Khrihfa hna zong atu lioah ral an do ve i, vawlei pennak caah si loin, thlarau lei roconak Pathian pennak caah a si.

A Hmasa Ah Vawlei Pum, Cu Hnuah Thlarau Pum

1 Korin 15:46 chungah lamkaltu Paul nih Pathian lam kan hngalh khawhnak lai tawhfung a kan hmuhsak. “A um hmasami cu thlarau pum kha si loin vawlei pum kha a si deuh, vawlei pum hnuah thlarau pum cu a ra” ti hi a si. Hi bantuk thil zohchun in zeitindah Bawipa nih rian a tuan ti kha Baibal dihlakah kan hmuh. Biakam Hlun chungah cun pumsa in Abraham tefa kong kha aa tial i Biakam Thar chungah cun zumhnak ah Amah thlarau fale hna kong kha a kan cawnpiak ve. Biakam Hlun caan ah Pathian cu pumsa biakinn ahkhan a um i sihmanhselaw atu ah cun thlarau biakinn a simi Khrihfabu ah Pathian cu a um cang. Zeicahdah Biakam Hlun Chan ah pumsa lei thil in a khah i Biakam Thar tu ah cun kan caah thlarau thil hi a nolh than lengmang hnga? Pathian nih thlarau in tlamtlinter a duhmi kha pumsa thil zohchun hmangin a tuahmi a kan hmuhsakmi a si. Mit in kan hmuh khawh lomi Pathian khuakhannak kha pumsa thil hmangin rian a tuanmi thawngin kan hngalh khawh (Rom 1:20). Joshua cauk kan hun cawn tikah hin pumsa i thil a cangmi kan hmuh lengmangmi kha atu chan ah cun thlarau thil a kan hmuhsaktu a si cang. Joshua le a ralkap hna nih zeitindah biakam ram an tei timi nihhin Pathian pennak chung kan luh khawhnak lai Jesuh Khrih ralkap tha kan si khawh venak lai thlarau phung a langhtertu a si.

A tanglei cazin nih aa lo ngaimi hi a kan bawmh lai.

Kan Rocomi A Kan Hmuhsak

Baibal Cauk

Zoh chung ding

Hruaitu

Minung Hna

Ral

Raldohnak

Ro comi

Biakam Hlun

A hmasami pumsa

Joshua

Israel

Kanan miphun

Vawlei cungah
Israel Ram

Biakam Thar

A hnuah thlarau
Jesuh
Khrihfa Hna
Satan Ralkap
Van hmun ah
Pathian Pennak

Joshua cauk hi kan cawn tikah cun pumsa lei tuanbia kha tampi a kan fianter. Pathian Kamhmi Ram chung luh dingah Israel fale hna cu zeitindah Joshua nih a hruai hna ti kha a kan cawnpiak. Israel fale hna nih cuka ram ah a rak ummi Kanan mi kha an tei hna i ram kha an i cheu, an phun hleihnih ningin an i pe hna.

Sihmanhselaw, hi cauk chugah kannih ca a biapi bikmi biacah cu thlarau in tlamtlinter ding kha a si. Israel fale hna nih biakam ram an co khawh tiah an chim bang khan, Pathian fale hna ca zongah “Biakam Ram” cu luh i co ding kha a um ve. Thlarau lei roco dingmi cu Pathian pennak kha a si. Hi chungah hin Pathian biakammi, riantuannak le laksawng kha aa tel chih, Pathian nih amah pennak kha coter i zungzal nunnak le laksawng zong pek a kan duh.

Kannih caah cun, Joshua cauk ah kan hmuhmi thlarau thil hna hi kan ralbawi Jesuh nih kan nunnak kha Pathian biakammi chungah a kan hruainak a si. Thlarau lei kan ral hna kha kan tei lai i, kan nunnak, kan chungkhar, Khrihfabu, kan pawngkam le kan ram kha Pathian pennak ah kan ser lai. Pathian pekmi laksawng hna, kan ziaza vialte le riantuannak hna kha luhpi khawh dih hlanah thlarau raldoh ding tampi kan ngei rih. Kan roco dingmi he Khrih chung i luh kan hun i timh lioah hin, Pathian nih a kan pek cangmi hi zeitindah kan zohkhenh lai i kan hman lai ti kha cawn ta kan hau. Hi cauk tlamtling tein kan hngalh khawhnak dingah hi hna hi a tawhfung cu an si ko.

Joshua Cauk i A Tlangpi

Joshua cauk nih fiang tein a kan cawnpiakthiahmah. Hi cauk chung thil ummi hi tlukceo tein thenhnih ah aa then i a ngan hleihnih veve an um. A hmasa (then 1-12nak) ahhin “Ro comi teinak” a si. Hi chungah hin cun zeitindah Joshua nih Jordan tiva kha a tanpi hna i Kamhmi Ram chung i Kanan miphun ralkap kha a tei ning hna a si ti kha kan hmuh.

Thenhnihnak (then 13-24) ah “Rocomi ram ah an luhnak” kha kan hmuh, Israel fale hna nih an ral hna kha an tei hna hnuah, an luhmi ram kha zeitindah kan um hnawh lai ti kha tha tein an cawng lo. An miphun ning cio in mah dang tein ram a comi hna cu Kaleb, Achsah, Zelophelad fanu le Joshua hna hi an si. A tanglei cazin hna hi zoh tikah Joshua cauk hi then hnih ah then a si kha kan hmuh.

**Joshua Cauk A Tlangpi Thenmi
Pakhatnak: Comi Ram Teinak**

Cheu 1:
Ram chung luhnak
Angan 1-5

Cheu 2:
Kanan ram teinak
Angan 6-12

Pahnihnak: Comi ram uk khawhnak

Cheu 3:
Ram i thennak
13:1-22:9

Cheu 4:
Comi ram
Zohkhenhnak
22:10-24:33

Cazin a dongh lei i aa rinmi pahnih kan zoh tikah Joshua cauk cu then hnih diahmah ah a then kha kan hngalh. Hi pawl hi then li then khat cio an si hna. An thim khunmi kha a cheuchum in an langhter i, a si nain Israel mi nih Kamhmi Ram an teinak le an conak kong cu tlamtling tein an langhter ko.

Hi aa thenmi pali dihlak hin Pathian nih an nunnak ah a tinhmi hna cu Khrihfa mi hna nih thlarau lei in an tlinte cio dingah a herh ngaingaimi thil a si. Khrihfa nun tlamtling a ngeimi hna nih cun Khrih chungah roco dingin biakamh an simi cu luh hmasa an herh. A pahnihnak ah cun hi Kamhmi Ram an tei khawh pengnak lai harnak le dohnak kha an ton lai. Pathuamnak ah, ziaza thatnak ding caah siseh, rianuannak lei an hun thok tikah Pathian sinin laksawng kha an hmuh lai i, hi thluachuahnak hi an karhter i ningcang in an chiah khawhnak ding caah fimthiamnak nganpi an herh. Cu tik lawngah an nunnak caah Pathian nih a tinhpiakmi hna kha an tlinh khawh lai i titsa lei in siseh, thlarau lei an tefa hna sinah hi ro comi hi zohkhenh zia thiamnak le karhter thiamnak kha an ngei kho lai.

Cañialtu Le Caan

Judah mi phunglam cauk ah siseh Talmud zong nih amah Joshua hrimhrim hi cañialtu cu a si tiah an langhter. Hi caah a dongh lai te kan rel tikah “Cun Joshua nih hi bia hna cu Pathian phung bia cauk chungah a ñial hna” tiah kan hmuh (Joshua 24:26). Joshua nih a donghnak a chimmi hi a cauk hramthoawknak ah ñial ding a si nain a donghnak lei tu ah a ñial (Angan 24:29-31). Bawipa bia a phuangtu ding caah cun mit hrimhrim in a hmutu le Pathian mi a simi Joshua hi aa thawk bikmi a si ko. Hi cauk a ñialtu hi amah Joshua pumpak a si lo hmanhah, a ñialmi hi mit in a hmutu a si lai. Joshua 5:6 ah ‘kanmah’ timi biafang nih a langhter pinah, 6:25 ah Rahab hi a nung ko rih ti kha kan hmuh. Hi cauk an rak ñial lio caan hi B.C kum zabu hleili hrawngah a si lai tiah an ruah.

Then 2 Nak
Joshua Timhlahmnak

Hi Joshua cauk chung bia kan cawn hlanah cauk a ñialtu pa hruaitu caah rak timhlahm chungnak hio ruah dingah thil biapi ngai a si. Joshua nunnak ah aa tlak khunmi hi a fian tuk caah Bawipa nih minung thong tampi lakah a thim khunnak cu a si.

Nihin kan caan zongah hin, ral le miphun caah siseh, chungkhar ca zongah teitu dingah amah nih a thim hna i chiti kha a thuh tawn hna. Hi bantu kin tlak khunnak a ngeimi hi mi zaidah an si hnga? Bawipa nih Joshua cu zeitindah a timhlahm ti kan cawn bantu kin, kannih zong Pathian thimnak kan cawnnak ah a kan bawmh khawh lai.

Joshua Cu Ralkap Tha Ngai A Si

Exodus 17:9 Amelek ralkap hna dohtu ding ralkap hruaitu ding caah Moses nih Joshua a thimnak ahhin

a kong kan hmuh hmasa bik. Amalek mipahun hna cu Joshua le a ralkap bu nih an tei hna caah, Joshua cu pa raltha le ralkap fim ah a hung cang. Joshua cu voi tampi “thawng ngai le raltha ngai in um tuah” (Joshua 1:6,7,9 le 18) tiah thazaang pek a si bantuk khan, kannih zong Pathian mi hna teinak ah hruaitu dingin thim kan si ahcun kan i cawn ve a herh ko.

1 Johan 2:12-14 chung kan rel tikah Khrihfa hna phun thum in thenmi kong kan hmuh. Hi Baibal cangah hin Lamkaltu Johan nih kan thlarau lei thanning kha taksa lei thannak, ngakchia in pa le ah thanning he a tahchunhmi kha kan hmuh. A hme 14 chungah “Ka dawtle hna, pale kha nan hngalh caah hi ca hi kan kuat hna ..., Pale hna, a hramthawk tein a ummi kha nan hngalh caah kan kuat hna. Tlangval hna, nan thawn caah kan kuat hna; Pathian bia cu nan chungah a um i mi tha lo pa kha nan tei cang” tiah kan hmuh.

Hi nih hin pei “Bawipa tlangval hna cu an thang i ralkap tha ah an than bang, a thangmi Khrihfa hna zong “Jesuh Khrih ralkap tha” an si kho ve (2 Timote 2:3). Hi nih hin pei “Bawipa le a thawnnak ah fek chin in a kan umter khawh lai i Exo 15:3 chungah “Bawipa cu ralkap a si a ti bang, Khrih he i lawhnak ah a kan bawmh khawh lai.

Atu chan zong hi khuachia thawnnak le anmah uknak nih Pathian mi hna cu an doh peng ko hna. Bawipa caah ral kan doh ahcun kan ral a that i kan thawn ding a si ve hnga lo maw? Mino hna sinin patung hna a dangte in a thenning hi hngalhthiam a hau!

Hi bantuk raldohnak hi ka pumsa hrimhrim in voi tam ial ka ton cang i hrial khawh zong ka duh ngai. Zan ah ikhkhun cangah thla ka cam lengmang. Khrihfabu chung zongah kan ton pah theu. Voikhat cu pastor bawmtu ka si lioah, biakinn lengah lut lo dingin a rak ka donh. Pa lianpi, a thawng tuk fawnmi pa cu a thinhun in lengah a chuak i Khrihfabu hmelchunhnak kha lam ah a hlonh ko. Cun biakinn ahkhan a rak kir than i, hmelchunhnak hna cu thlalangawng in biakinn chungah rak hlonh than a timh. Cu thlalang awng zawn bakah cun kan senior pastor pa cu phung a chim liopi a si! Keimah duhning ah cun Khrihfabu chung pa lian pipi kha keimah te lawng cu ka si ko, cu pa thawng pa cu ka kutdong in ka sawh i Bawipa min in ka hei mawhchiat. Van leh a ka timh ahkhin a tangah pakhat khat nih lencecelhnak fungin an hun tuk i, her vuaimai in lo diam a zam ko.

Voikhat zong communist pawl nih an uknak Filipine ram ah pastor pawl cawnpiaknak ka ngei. Bawipa nih chim a ka fialmi cu Thawngthabia kha raltha tein an chim a si ahcun communist thawnnak le hruainak cu Bawipa nih a tei ko lai. Sihmanhselaw, tihphannak ruangah ka rianthuannak kha ka zamtak a si ahcun pastor pawl kha an sung cia lai ti kha ka hngalh. Cucaah thla ka cam i kan i cawnpiaknak a dih tiangin ka cam than i teinak kan hmuh. Cu cawnpiaknak nih rianthuantu tampi hna kha an Thawngtha chim rian ah thazaang a ngeihter ngaingai hna. Kumriat chungah minung 10,000 reng lo kha a thlenter hna i communist cawlcanghnak zong kha a rawk dih ko! Cuka ah Baibal sianginn kha kan dirh i pastor 120 le rianthuantu dangdang hlanlio i communist a simi hna khua zong pastor ah an cang dih.

Doh kan ton tikah kannih nih zeitindah kan rak leh ve lai? Bawipa nih cun, “Khrih Jesuh ralkap zumh awk tlak bantukin sifah innak ahkhan ing ko u,” (2 Timote 42:3) tiah a ti. Pathian thimmi le mi hnu a zulmi hna caah ngeih a herhmi a si ti kan hngalh.

A dang kan cawn rih dingmi cu Amelek phun kha Joshua nih a teinak hna lo ro a conak kong a si. Amelek hi Esau tupa a si, amah hi titsa lei aiawhtu a si tiah (Kalati 4:22-29) chungah kan hmuh. Kannih zong a hlawhtlingmi khrihfa hruaitu si kan duh ahcun, kanmah nun ah a ummi titsa rianthuannak hi kan dih ve a hau. Thlarau lei rian kan thuannak ah a kan doh pengtu “Amelek phun’ hi doh dingin kan thanh a herh. Siangpahrang Saul cu Bawipa nih Amelek mipahun kha hrawh dih dingin a fial ko nain a thah dih hna lo caah, amah Saul tu kha Amelek phun nih an thah. Hruaitu tha si khawhnak ding caah cun, chikkhat te lawng a nguhmi titsa duhnak hi cu kan tlaihchan ding a si lo. Kan ral lianpi a si tiah kan phuan lai i kan nunnak in kan hloh hrimhrim lai. Cuti kan hloh lo ahcun harnak ton tik le pumpak derthawmnak zawn khan a thli tein a rak kan helhhumh than lai i a kan hrawh dih ko lai.

Joshua Cu Sal A Si

Joshua a no lio caan hna hi kan zoh tikah Moses sal a si tiah a tanglei Baibal caang hna ahhin kan hmuh

(Exodus 24:13; Num. 11:28; Joshua 1:1). A tlanval lioah hin, Joshua hi Israel hruaitu zong a si lo i, tlangbawi chungkhar zong a si lo. Hruaitu caah biakamhmi dawh zong a si lo. Hlanlio kong an tialmichung zongah Khrihfa upa le riantuantu chungkhar zong a si fawn lo. Pathian nih Senior pastor caah a rak thim chungmi Khrihfa upa dawh khi a si. Moses zong nihhin amah ta thih lai hrawng dah ti lo ah cun Pathian nih hruaitu dingah a thim hi a rak hngal kho ve lo (Num. 27:15-21).

Sal a si ko lioah hin cun miliannan a si te lai ti hi hmuh khawh chung ding a rak si lo. Pathian ruahnak cu kan ruahning he aa dang tuk i a lam zong hi kan lam nakin a sang deuh. Jesuh nih Amah pum hrimhrim in “Mi ngan si a duhmi cu sinum a si awk a si” (Mk. 10:43) tiah a kan chimh. Sinum riantuannak nih hruaitu si khawhnak ding caah timhlahm chungnak a si. Pope bantuk asiloah nawlungeitu si na duh ahcun misang deuhmi hna tangah na um hmasa a herh. Nawlungeitu sinah nawl ngai tein zumhtlak sal sinak kan cawn duh ahcun, kannih zong kha nawlungeihnak ah kan sang chin lengmang ko lai. Titsa mi ruahning he cun aa ralkah ngaimi a si, annih cawnpiaknak ah cun nangmah tein hleihlak sang deuh na kai khawh langah hruaitu sang na si kho lai ti hi a si. Pathian lamhruainak kan zulh khawh lawngah Amah cawisannak kan hmuh lai, “Bawipa hmai ah toidor tein um law, amah nih an hlorh hna lai,” “Na tuahmi cu a that khawh chungin tuah,” “Thil hmete ah zumh tlak a simi cu thil ngan zongah zumh awktlak an si tawn” (Jeim 4:10, Phungchimtu 9:10; Luke 16:10).

Moses sal a si bantukin, Moses he naih tein an um peng caah a fimnak siseh, thil sunglawi tampi zong Joshua nih aa cawn hna. Number 11:26-29 chungah riahbuk hmun chungah bia a chim pengmi hna kha thlahu dingin Joshua nih a duh tikah, Pathian nih thinlung on a duhning kha Moses nih a chimh. Joshua nih hi bantuk cawnpiaknak hi rak ngei hlah sehlaw, Joshua 22:10-34 chungah a um bantukin Jordan nichuahlei ummi nih biaktheng an tuah tikah nitlak lei ummi nih an hrawh dih sual hna hnga.

Joshua Min Le A Sining Thlen A Si

Joshua timhlahmnak caah thil biapi tukmi pakhat cu Pathian nih a min a thlen. Hi thil nih a langhtermi cu Bawipa nih Joshua ziaza le kawh a si chan kha a thlenpiak. Joshua cu Moses sal a si hnu le ralbawi bothum a hung si hnu ahkhan, Kanan ram ngiathlaitu pa 12 lakah thimmi a si ti kha Number 13 chungah kan hmuh. Ahme pariat chungah a min cu Hosea tiah auh a rak si, asinain ahme 16 chungah, “Nun fapa Hosea cu Joshua tiah min a sak” tiah kan hmuh.

Min hi ziaza le sining langhter chungnak hna hi a rak si ko. Abigail zong nih a vapa ziaza le sining kha a zoh tikah “A min bantukte hi amah cu a si ko” (1 Samuel 25:25) tiah a ti. An min sullam kha fiangte in kan hngalh a si ahcun, Pathian nih a kawh auh channak hna sullam kha fiangte in kan hngalh ko lai. Abraham min sullam zong “Miphun vialte pa” a sinak le Jesuh min sullam “Bawipa cu Khamhnak” a si tlamtlinnak kha kan hmuh khawh.

Joshua hi a chuahka ah cun Hosea tiah sak a si i a sullam cu “Khamh” asiloah “Khamhnak” ti a si. A hramthawk ah Hosea tiah sak a simi kha Thiang Thlarau hruainak thawngin Moses nih a thlenpiak. A min cu ‘J’ kha a chappiak i Jeshua, asiloah Yehoshua tiah minthar sak a si. A tuchan ah cun Joshua, Yeshua, asiloah Jesuh tiah a tawinak in thlen a si. A min sullam tlamtling cu “Bawipa nih a khamh” asiloah “Bawipa cu Khamhnak a si” ti hi a si ko.

A chuahka ah Bawipa nih min a sakmi sullam hi kan tahchunh tik lawngah Joshua min thar a biapitnak kha kan hngalh khawh. Baibal hramthawknak bia chungah, Joshua le Jesuh hi aa khatmi a si tiah kan hmuh. Hebru 4:8 chungah hi min pahnih hi i thlen tonh khawhmi a si kha kan hngalh. King James Version ah ‘Jesuh nih dinhnak a pek khawh a si ahcun’ tiah a chim i chanthar lehmi tampi ah cun “Joshua nih dinhnak kha a pek khawh a si ahcun” tiah a tialmi kan hmuh than. Hi min pahnih hi thlen tonh khawh a rak si caah hiti an tialnak cu a si.

Biakam Hlun Khrih sinak kha Joshua nih a langhter i, an i lawhnak taktak cu an pahnih min hi aa khatmi a si. An pahnih in khamhtu ding caah kawhnak an si veve i, an min sullam zong “Bawipa cu Khamhnak a si” ti a si ko. Joshua 5:13-15 chungah Bawipa cu Joshua sin a hung langh tikah “Bawipa ralbapbu hruaitu” ka si tiah Amah kong kha a chim. Hi kong hi Khrih ziaza a biapi bik Joshua sinah a langhtermi a si. Cathiang chung 1

Johan 3:2 le 2Korin 3:18 chungah Khrih a langh tikah cun, Amah Khrih bantuk cu kan si lai tiah kan hmuh. Hi ruangah hin Khrih cu Amah pum hrimhrim in Joshua sinah ralkapbu hruaitu ah a rak thlen ve.

Joshua cu Biakam Hlun hruaitu ah a hung cang i ral hna kha a tei hnuah Pathian fale hna cu an comi ram luhipi dingin a hruai hna. Hiti bantukte hin pei Jesuh zong nih sualnak hel le thihnak cu a tei hna i Biakam Thar zumtu vialte hna cu an comi ram ah a luhipi ve hna cu. Nawlbialtu Moses nih cun Pathian mi hna cu muihnak chungin a chuahpi hna, asinain Joshua nih cun Kamhmi Ram ah a hruai luh hna. Atu ah cun Biakam Thar nih i lo ngaiin a kan cawnpiakmi cu nawlbialtu Moses nih kan nunnak Pathian khamhna kha a hun thawk i, Khrih velngeihnak nih cun tlamtlinnak ah a kan hruai.

Joshua timhlahmnak caah Pathian vel thawngin thlennak riantuanmi hi nihin kan chan ah Khrihfa hruaitu hna timhlahmnak caah a si ve. Biathlam 2:17 chungah Bawipa Jesuh Khrih nih a chimmi cu, ‘Teitu a simi hna cu .. a cotu lawng nih a sullam an hngalhmi minthar kha an i tial cio’ tiah a ti. Cu bantukin Khrih zong nih Joshua cu minthar kha a pek, ziaza thar le kawh auhnak thar zong kha a pek bang atu kan caan zongah hin zumtu tampi hna cu Khrihfabu tuanbia ah ‘Joshua chan’ caah timhlahm an si ve.

A luan cangmi kum 18 lio ahkhan kei zong hnabei a dong ngaingaimi riantuantu ka rak si. Pathianih kan nunnak hmangin tlamtlinter a duhmi a biakammi sunglawi cu a rak ka pek, asinain cu lioah cun a phichuak tlawmte lawng ka rak hmuh. Ka hnabei donghna niam bik chung khan Bawipa thimnak le kawh auhnak cu karlak thlak in timhlahm le thok a si cang.

Voidang zongah hman tawn a si lomi pumhna chungah mi 15 nih pakhat hnu pakhat in ka caah bia an ka phuanpiak. Bawipa nih Joshua ah an ser lai tiah an phuan cio. Profet pakhat le bang cu nganfah tuar ngai in tah bu he vawlei ah a kun. A chimmi cu Bawipa nih Joshua timi minthar an pek tiah a ti.

Cu bantukin an phuanmi cu Rhema bia bantukin ka thlarau chungah a lut i a nung colh. Hi nihhin ka hnabei donghna vialte cu a thlen dih i riantuannak ah kum tampi theipar chuahnak ah lam a ka hruai. Joshua nih Israel mipun cu a hruai hna i Kamhmi Ram chungah a luhipi hna bantuk khan, kei zong pastor thong tampi hna cu an riantuannak ah cañalnak in siseh, cawnpiaknak in siseh, Baibal sianginn lei zong in ram kipah riantuan in ka bomh hna. Pathian nih a mi a fale hna cu nihin ni caan zongah a then cuahmah ko hna i Khrih voihnih rat thannak ding ca zongah timhlahmnak ngei dingin ralkapbu nganpi bang a kan sersiam cuahmah ko. Hi caan donghna ahhin Pathian nih mi tampi hna cu Joshua bang khan a kan thawhthar caah, kannih zong fek chin in kan phuan dingmi cu, “Khrih chungah teinak he a kan hruai zungzaltu Pathian cu thangthat si ko seh, Khrih kong hngalhnak cu khua zakip ah zihmui bantukin karhter awkah Pathian nih kannih cu a kan hman” (2 Korin 2:14).

Joshua Cu Langhna Le Zumhna A Ngei

Bawipa nih Joshua cu a timhlahm caah langhna a hmumi le zumhna a ngeimi pa a si kha kan hmuh. Khrihfa hruaitu vialte hna zong nih an riantuannak an fehter khawhna ding caah hi bantuk thil ti khawhna hi an ngeih a herh.

Moses nih Biakam Ram chung va luh i va ngiathlaitu 12 lak ah Joshua hi a thim vemi a si (Number 13:16-26). An khualtlawnnak a dih hnuah Joshua nih amah pumpak hrim in a chimmi cu, “Kan hung toلمي aram cu ram tha hringhran a si ko” (Num. 14:7) tiah a ti. Israel mipun tam deuh nih cun ramtha a sinak kha tlawmpal te lawn gan theih. Sihmanhselaw, Joshua nih a hmuhtonmi ningin Bawipa nih a mipun hna u si hna seh ti kha a duh.

Cathiang cu a dik a hmaning in a chimmi a si. “Ahoimanh nih an hmuh bal lomi le an theih bal lomi, a si kho lai tiah ahoimanh nih a ruah in an ruah bal lomi kha thengte kha Pathian nih amah a dawtu hna ca i a timhmi cu a si” (1 Korin 2:9) tiah a ti. “Cu biathli cu Pathian nih a thlarau in kannih sinah khan a phuan” tiah a tangah a hun nolh than. Hi langhna nih siter a kan duhmi cu kokek sining phung chung khan thil sining lengah kan phak khawhna caah le kanmah saduhthahnak chungin Pathian nih kan nunnak caah a kan timhpiakmi ah kan luh khawhna hnga caah a si. Efisa 1:17-18 chungah “Kan Bawipa Jesuh Khrih i a Pathian, a lianganmi kan Pa cu, nanmah kha thlarau pek awk ah ka hal lengmang, thlarau nih cun a fimter hna lai i Pathian kha nan sinah a phuan lai i Pathian cu nan hngalh lai, ze ruahchannak hmuh awkah dah an kawh hna ti le a mi a kamhmi

hna a thluachuahnak khuaruahhar cu zeitlukin dah a tam” tiah Paul nih Pathian sinah thla a kan campiak bantukin kannih zong thla kan cam ve awk a si. Pathian nih a kan kamhmi chungah kan luh khawhnak lai zeidah a kan timhpiakmi a si ti hngalhnak ding caah langhnak kha fiangfai tein kan hmuh a herh. Pathian nih Abraham cu, “Na umnak hmun khan, nichuah nitlak chaklei thlanglei vialte kha cuan tuah hna, na hmuhmi ram vialte kha nangmah le na tefa cu kan pek hna lai i a zungzal in nan ta a si lai” (Genesis 13:14-15) tiah a ti. Kan Bawipa Jesuh zong nih a lamkaltu hna kha “Lo khi tha tein hei zoh hna hmanh u” (Johan 4:35) ah a ti hna. Bawipa nih pakhat cio a kan pekmi kha zeiset dah a si ti kha fiang tein kan hngalh khawhnak lai Pathian sin in hmuhsaknak kha kan herh.

Korea ram ah Pastor Yonggi Cho hi kan nunnak ah le a rian kan tuannak ah Pathian sinin langhnak biapi ngai a simi hna kha tettekhan ding tha tha a ngeimi pa a si. Pastor a rak tuanka ahhin, a ruahchannakle a thlacamnac cu member 300 kha hruai in Khrihfabu thawng ngai dirh ding hi a si. Aa timhmi kha a tlamtlin tikah cun, member 3,000 ah nan karh lai tiah Bawipa nih a hmuhsak. Cu zat a hun tlin than tikah cun member 10,000 ah nan karh lai tiah Bawipa nih a hmuhsak than. Cu zong a hun tlin tikah, Bawipa nih 50,000, 100,000 cun 500,000 in member tampi a Khrihfabu ah karh dingin Bawipa nih zumhnak ah a hruai. Atu ah cun a Khrihfabu ah member 700,000 an phan i khualeng ah an sermi Khrihfabu member hna he hin cun tinghra reng lo hi fawite in an si ko cang. A Khrihfabu le a riantuannak cu a karh cho tuk i ram chung hi a cul dih caah, vawlei pumpi thlennak caah mi bawmchan kho an si cang. Sihmanhselaw a Khrihfabu kha member 300 tiang lawng si dingin langhnak hei ngei sehlaw zeil thil dah a cang hnga itah na ruah? Riantuantu tampi hna cu anmah lahkha a thatnak ding le biakinn that paoh ah a za tiah a ruat tawk zong an um ve, Bawipa nih cun ram le khuapi kip tei kho ding langhnak kha ngei hna seh ti hi a duh ko hnga lo maw? “Ka hal law, miphun vialte hi nangmah kan pek dih lai, vawlei hi a dihlak in nangmah ta a si lai” (Salm 2:8).

Sihmanhselaw, Israel miphun hna cu Kamhmi Ram chung luh dingah hruai dingin Pathian nih Joshua cu a thim caah hi bantuk hmuhsaknak hna a ngeihnak hi a rak si lai. Hi caah hin Pathian nih a kan phakpi lai ti kha Joshua nih a zumh ko. Joshua he a kal timi a dang ngiathlaitu pahra hna nih khan cun Joshua nih a hmuhmi biakam ram khuaihli ti le cawhnuk in a khatmi kha an hmu ve ko nain, a chungah kan lut kho lai timi zumhnak kha an ngei kho lo (Heb. 3:19). Mi zapi sinah an thanhmi thawng cu a ram hi a ngan tuk i kan tei kho lai lo (Num. 13:25, 14:10) ti hi a si. Hi mingiatu pa hra hna nih Israel phun hna sinah an zumh lonak thihsi kha an vorh caah a phichuak cu Kamhmi Ram luh khawhnak ding caah an tling kho ti lo (Num. 14:26-30). Biaceihnak in a tling kho dingmi zumhtlak mingiatu pahnih cu, Joshua le Kaleb an si i an zumhnak ruangah Kanan ram chungah luhnak nawl pek an si.

Kan nunnak le kan tuan ahhin, Bawipa nih zeibantuk langhnak dah a kan hmuhsak tihi hmasa bikah ngeih a herh taktakmi cu a si. Cu langhnak kha tlamtling tein kan ngeih khawh tikah, a hun changtu cu zumhnak kha kan cawlcanghter a herh. Bawipa nih mi pakhatkhat kha riantuan ding thar, Khrihfabu thannak, thanghnak, asiloah thil pakhatkhat kha a hmuhsak a si ahcun, Amah kha an zumh lai i a biakammi tlam a tlinnak lai hnek chih a hau. Titsa ruahnak nih cun hnek chih phun hi cu a duh lo caah, “A caan a tling rih lo a si lai,” “tangka zong kan ngei fawn lo” asiloah, “Na saduhthah lawng hna a si lai i tuahnak lei hna a si kho lai lo” tiah an ti tawn.

Pathian Kamhmi chung kan luh hlanah dohnak hmun biapi a simi kan ruahnak hi kan tei hrimhrim a herh. Kan ruahnak vialte kha Pathian pekmi langhnak le Amah duhnak ah kan ap dih lai i kanmah pawngkam thil sining tu ahkhan cun i hngatchan lo ding a si lai. Mingiatu 10 hna nih Kanan ram kulhnak cu a lianngan tuk tiah an ti bantukin Baibal Biakam Thar zong nih Khrihfa mi hna kan ruahnak a chah tukmi thumhtlak a herhning a kan cawnpik ve. 2 Korin 10:4-5 chungah kan relmi cu, “Raldohnak i kan hmanmi hriamnm cu vawlei cung hriamnam an si lo, ralruang fekfek a hrawk khotu Pathian hriamnam tu kha an si. A hman loin bia i alnak kha kan hrawh, Pathian hngal kho hna hlah seh tinac a i chonmi vampang porhlawtnak vialte kha kan baoh dih, minung lungthin kha sal ah kan tlaih hna i Khrih nawl kha kan ngaihter hna” ti hi a si. Kan ruahnakle kan thinlung kha Khrih sinah kan ap dih a si ahcun, zumhnak in a rian kan tuan khawhnak lai Bawipa nih hriamnam tha tha kha a kan pek ko lai. Harnak vialte kha lonh in Joshua bang kan phuan dingmi cu, “Bawipa cu kan chungah aa lawmh ahcun hi ram chungah cun a kan luhi lai i a kan pek lai, cawhnuk le khuaihli ti in a luangmi ram cu Bawipa cu kanmah he pei a um cu tih hna hlah u” (Number 14:8-9) ti hi a si. ko.

Joshua Nih Chiti Thuhnak A Hmuh

Joshua nunnak ah a dang tawhfung pakhat cu Pathian mi hna hlawhtling tein hruaitu ding caah a herh tukmi chiti thuhnak a hmuhmi hi a si. Pathian rian hi tlamtling tein kan tuan tungah hin cun kan kokek pahrang hna le thil ti khawhnak zong hi pakpalawng a si ti kha kan hngalh. Pathian thlarau co kan herh tuk ciomi kha pei Joshua nih chiti toihnak thawngin a hmuh cu.

Chiti toih kan hmuhmi pakhat cu Bawipa Thiang Thlarau sinin direck tein a si. A dang pakhat tu cu Pathian fanu le fapa hna sinin a si tawn. Vancung in a rami nih hin Khrih pum chungah a ummi kannih vialte kha Khrihfa hruaitu si kho dingin chiti a kan thuh ve.

Joshua nih hi bantu chiti toihnak cu Bawipa he amah pumpak hrimhrim in an i pehtlaihnak khan a hmuh hmasa bik. Hiti kan hmuh khawhnak zong hi Exo. 33:8-11 chungah Moses nih biaknak thlam chungah Pathian he i tong dingin a vung luhnak ah kan hmuh. Ahme 11 chungah, “Minung nih a minung hawi bia a ruah bantukte khin Bawipa nih Moses cu hmaitonh tein bia a ruah. Cu hnu ah cun Moses cu riahhmun ahkhan a kir tawn. Asinain a sal Joshua Nun fapa kha cu thlam kha a kal tak lo” tiah kan rel khawh.

Hi lio caan ahhin cun, Moses hi cu Pathian mi patling ngaingai a si cang i Bawipa he chunglei zongah aa hawikom taktakmi kha an si cang. Moses nih biaknak thlam chungah a hung luh tikah, Pathian he rianrang tein an i tong kho i, a herhmi bialehnak kha a hmuh khawh colh ko. Moses nih a rian aa liim i a hung chuah tikah, Joshua tu cu biaknak thlam chungah khan a um peng ko rih. Bawipa hngalh le Amah he i naih kha Joshua nih a cawn. Moses le Pathian an i hawikomh le an i pehtlaih bantu kha Joshua nih a herh vemi kha a si.

Hi bantu lungput le ziaza he kannih nunnak zongah thanter kan herh ve. Mi pakhatkhat nih Bawipa chungah a nunnak a than deuh ning kha hmuh tikah kan khuaruah a har tawn. Pathian he rianrang tein an i ton i Thlarau cu an chungah a hung luan kha kan hmuh tikah khan kannih zong nih lumsa ve dingin kan hun thawk cio khi a si rih. Cu bantukin an tontem khawhnak lai kum saupi chung caan an la i Pathian ah an ngeihmi bantu kha hmuh kan duh ve ahcun kannih zong nih kan thok ve a herh.

Riantuannak asiloah i pumh khomhnak zong hi a dihdonghnak lei ahhin cun hruaitu upa nih midang kha rian an ap ta phung a si ko. Khrihfabu member tampi hna zong Pathian biaktheng hmaiah pumhkhomhnak cu an ngei peng ve. Bawipa ah mitling si na duh ahcun, Pathian hmaika ah a um pengmi hna lakah aa tel vemi na si a hau. Pumhnak a dih tikah an dihlakin an chuak dih men ko lai, zumtu dang nakin Amah umpinak kha a hngak deuhmi na si ahcun, thlarau lei ah anmah nakin a than deuhmi na si ko lai. Exo. 24 chungah Sinai tlangpar i Pathiang nih Moses a auh lio ahkhan Joshua nih Bawipa hi zeitindah a si ti kha a cawn hmasabik tiah kan hmuh. Moses le Joshua hi an pahnih tein hmunkhat ah Sinai Tlang kai dingin an i thawh, sihmanhselaw Moses lawng tlangpar a phan. Joshua tu cu canceo tiang lawng a kai i Moses a rak tum hlan lo cuka ah cun a rak hngah. (Exo. 32:15-19). Tlangpar ah Moses nih Pathian sunpamak a hmuh mi bantu kha cu Joshua nih tlamtling in a lut kho ve lo. Sihmanhselaw, Moses salpa a si caah Israel hruaitu dang nakin Bawipa cu naih cem i a hmu tong khotu ah a cang (Exodus 24:13-14).

Joshua nih Bawipa a hngah ruangah a phichuak cu a thlarua nun ah Pathian umpinak a hrawh a sinak hi a si. A thih lai ah Moses nih thla a cam tikah Bawipa nih amah a hun changtu ding kha a thimpiak, “Nun fapa Joshua, a chungah Thlarau a ummi pa kha, la law, a cunah na kut chuang tuah; tlangbawi Elizer le mibu a dihlak hmai ah khan dir ter law, an mit hmuh ah nawIngeihnak kha pe tuah” (Number 27:18-19) tiah Bawipa nih Moses cu a ti. A chungah Thlarau a ummi pa Joshua kha a hun changtu hruaitu si dingah Bawipa nih a thim thengmi cu a si. Cu lio caan ah chiti thuh a si khawhnak ding caah a rak tuahmi nunzia cu Bawipa tong dingin puan biakinn kha kal tak loin a rak hngah peng ruangah a si tiah Cathiang nih fiang tein a langhter.

Israel mi hna hruaitu thar caah Joshua cu Moses nih rian a hun thiah tikah, a voihnihnak chiti toihnak zong a hmuh than. Deuteronomy 34:9 chungah, “Nun fapa Joshua cu, Moses nih a cunah a kut a chuan caah, fimnak thlarau in a khat, cucaah Israel mi nih a bia an ngaih i Bawipa nih Moses nawl a pek bang khan an tuah” tiah kan hmuh. Bawipa cu Joshua cunah caan tlawmpal a um ko nain, “Fimnak Thlarau in a khatmi kha a si,

Joshua cungah Moses nih a kut a chuan i ordination a rak pek lio zong hi hlanlio deuh ahkhan a rak si ko. Hi bantuk hin pei kannih cio zong hi van lei in Thiang Thlarau hrawmnak le thlarau lei hruaitu hna sinin thluachuah pek cu kan herh cio cu. Joshua cu Moses sinah zumh tlakte in a um bang khan kannih zong a kan hruaitu hna cungah zumh tlakte in rian kan tuan a si ahcun thlarau thluachuahnak, chiti toihnak, thil pek hna kha kan hmuh lai i an rian thawk cangmi kha lim khawhnak dingah bawmhnak hna kha kan hmuh ko lai.

Then 3 nak
Ram Chungah Luhnak
Joshua Angan 1-5

Joshua cauk thenkhatnak hi kan zoh tikah Israel mi hna nih Khamhmi Ram chung i an luhnak kha kan hmuh. A ngan pakhat in panga tiang nih a kan cawnpiakmi cu zeitindah Joshua cu hruaitu thar ah a hung can ning le Israel miphun nih Jordan tiva tan dingin a hruainak hna, a voikhatnak ral doh dingin an i timhtuahnak kha kan hmuh.

Sihmanhselaw, hi a ngan chung kan cawn hlan ahhin Israel miphun hna cu kum tapi chung Bawipa nih a rak timhlahm hna ti kha kan hngalh a herh. Kum 300 nak hlan deuh hin, Israel miphun nih Kamhmi Ram nan kir than tikah thut lonak si an tuahmi a ruak cu nan put lai tiah Josef nih bia a kamter hna (Gen. 50:25-26). Cuhlan zongah cun, Bawipa nih Abraham sinah na tefa hna hi mi ramdang ah kum 400 reng lo an um hnu ah Kamhmi Ram ahhin an rak kir than te lai tiah bia a rak kamh (Gen. 15:13-16).

Genesis in Joshua Ah

Cathiang chung a hmasa cauk panga hna nih ram chung hung luhnak ah an kan hruainak kha biapi bik a si tiah hkan hmuh. Baibal cauk a paruknak Joshua cauk tu nih cun a biapi bik a tlangpi hi a hun tlamtlin ternak a si.

Hi cazin kan hun suaimi nih hin Biakam Hlun chungah titsa lei tlamtlinnakle Biakam Thar chungah thlarau lei in a tlangpi ah an tlamtlinnak kha kan hmuh khawh fawn.

Roco dingin timhlahmnak
Biakam Hlun ah titsa lei sinak le
Biakam Thar ah Thlarau lei tlamtlinnak

Tinhmi
Ram caah biakamnak
Ramhlun kha chuah taknak
Ramthar caah nawlbia hna
Ram chungah vahvaihnak
Ram caah timhtuahnak
Ram kha conak

Biakam Hlun Tlamtlinnak
Gen. 13:14-16
Exo. 13:3
Leviticus 18:2-5
Number 32:11-13
Deuteronomy 8:1
Joshua 21:43-44
Biakam Thar Tlinnak

1Pet 1:3; Kalati 2:29

Kolosa 1:13

Efesa 4:22-24

Heb 3:17-4:1

Matu3:2

1John 3:3

Matu 28:19

Efisa 2:6-7

Genesis cauk chungah Bawipa nih a hawipa Abraham cu na tefa hna cu miphun nganpi ah an cang lai i Kanan ram cu ro ah ka pek hna lai tiah bia a kam. Genesis 13:14-16 chungah, “Lot aa thial hnu ah Bawipa nih Abraham cu a thawh i, na umnak hmun khan nichuah, nitlak, chaklei, thlanglei vialte cuan tuah hna, na hmuhmi ram vialte kha nangmah le na tefa cu kan pek hna lai i a zungzal in nan ta a si lai, tefa tampi kan pek lai i an tam tuk ah a hohmanh nih an rel kho hna lai lo, leidip cu a hohmanh nih an rel khawh lo bantuk khi an si lai” tiah a timi kan hmuh. Bawipa nih Abraham sinah bia a kamhmi cu a tefa hna kha Genesis le Biakam Hlun chung i bia tlangpi muru le tinhmi caah an i timhlahnak biakam ram kha ka pek hna lai tiah a ti.

Hi biakammi thlarau lei tlamtlinnak hna cu zumhna in Abraham tefa a simi zumtu vialte hna kha pek an si lai. Galati 2:7-29 chungah kan hmuhmi hi lamkaltu Paul nih aa hngatnak a si i a kan chimh rihmi cu Khrihfa kan hung si hin Abraham sin thlarau lei thluachuahnak le ro conak cu kan co tiah a ti. Abraham nih titsa in biakamhmi fa Isak a hmuh bantuk si loin thlarau lei in biakamhmi fa Bawipa Jesuh Khrih tu hi kannih comi cu a si. Israel miphun hna nih hi vawlei le ram hi biakam a si ningin co lio ahhin, Khrihfami hna nih cun, 1 Peter 1:4 chung bantukin “Cu thluachuahnak cu a thu a man kho lomi le a ziam kho lomi an si i Pathian nih vancung ahkhin a kan chiahpiak”. Angan pali le panga chung i Khrihfa hna sinah pekmi “Biakam Ram” kha fiang deuh in kan zoh than te hna lai, sihmanhselaw, kannih caah hngalh kan duhmi cu Biakam Thar zumtu hna caah cun Biakam Ram hi Pathian tinhmi biapi bik cu a si ko.

Genesis cauk nih Pathian biakammi Kanan ram kha a tlangpi tarah a langhter bantukin, cauk pahnihnak Exodus cauk pahnihnak nih cun kha ram va luhipi ding kha a langhter duhmi a si. Izip ram ah Pathian nih Israel miphun hna cu a karhter hna hnuah, Exodus cauk nih a hmuhsakmi cu Izipt sal cannak in Pathian nih a chuah hna i biakam ram ah a hruainak hna kha a si. Israel mi hna cu Kanan ram chung i lut dingin timhlahm an si tikah an ram hlun Izipt ram kha zeitindah an kal tak ti kha hmasa bikah Exodus cauk nih a langhter.

Kannih ca zongah Pathian khuakhan chungmi hi kan tlinger a herh ve. Kan “Ram Hlun” khan khamh kan herh ve. Faro sal sinak in luatter si loin, Satan le sualnak sal khan kannih zong khamh i luatter kan herh. Lamkaltu Paul nih, “Zeicahtiah, Amah nih cun muhnhak thawnnak chung khan a kan chuah i a dawtmi A Fapa pennak chungah khan him tein a kan luhipi (Kolosa 1:13) tiah a ti. Cu bantukin, kannih a hrintharmi khrihfa zong nih Adam he aa pehtlaimi kan minung hlun sinak vialte hna cu kal tak i, Kolosa 1:27, “Khrih cu nan chungah a um i, Pathian sunparnak kha nan i hrawm lai” a ti bang khan nunning thar ah kan nung lai.

Biakam Hlun nihhin Israel miphun hna caah Pathian a hnu karhlan khat kha a hun langhter than. Baibal cauk pathumnak nih hin Pathian nih tlangbawi hna caah a pekmi nawlbia kong kha a chim i, biakam ram phak tikah nunning ding kong kha a cawnpiak hna. Leviticus 18:1-5 chungah cun Bawipa nih Moses cu a chonh i, “Israel mi hna sinah hitihin va chim tuah, kei cu Bawipa nan Pathian ka si. Nannih nan rak umnak Izipt ram i an tuah bantuk khan nan tuah lai lo i kan kalpi hna lainak ram Kanan ram i an tuah bantuk zong in nan tuah lai lo. Annih an nawlbia kha nan zul lai lo. Ka phunglam hna kha nan tuah lai i ka nawlbia le ka phunglam kha nan zullh hna lai, cu tuahnak thawngin mi nih an nung lai; keimah hi Bawipa cu ka si” tiah kan rel khawh.

Khrihfa kan hung si tikah, vancung pennak fale bantukin nunning thar ah nun awkah cawnpiak kan si ve. Efisa 4:22-24 chungah Paul nih, “Nan rak nun tawning in an untetu hna nan mihring hlun kha hlaw u, cu mihring hlun cu pumsa duhnak hlen hmanhmi nih a hrawh lengmang tawnmi kha a si. Nan lungthin le nan ruahnak ah ser tharmi nan si awk a si. Pathian he aa loin sermi nan mihring thar kha i hruk u law cucu a dingmi le a thiangmi nunning i a langhmi nunning taktak kha a si” tiah forhnak bia a tial.

Baibal cauk palinak ahhin cun Pathian mi hna nih Pathian timhlahmpiakmi an sunghnak kha ralrin a kan peknak kan hmuh tawn. Number cauk nih Bawipa bia kha a ngaih lo tikah Kanan ram lei panh kho loin ramcar chungah kum 40 an vaihnak kha a langhter ve. Hi kum chung hna ahhin Bawipa sinin thluachuahnak hna a simi, a lamhruainak, damternak le khuaruahhar hmehchunhnak tampi kha an co. Cu ve bantukin, kannih zong Pathian lei i kar kan hlannak ahhin Amah thluachuah tampi kan co khawhnak ding caah kan i ralrin a herh.

Biakam Hlun chungah cun, Hebru a ngan pathum le palinak Israel miphun hna ramcar chung i an vahvaihnak kong hi a hun nolh than. Khrihfa mi hna zong Pathian biakammi an sungh sualnak lo dingah ralrin pek an si ve, zeicahtiah Israel mi hna an lungthin a hah ruang, nawl an ngaih lo ruang le an zumh duh lo caah pei Kamhmi Ram ah an luh khawh lonak kha a si cu. Kan rel than rihmi cu, “Aho cungah dah Pathian kha kum sawmli chung a thin a hun? Sualnak a tuahmi thetse ram i a thimi hna cungah khan a si. Pathian nih, “Ka dinnak chungah an lut lai lo,” a ti ahkhan, a hodah a ti hnawhchan hna? Amah a dohtu kha a ti hnawhchan hna. Cu dinhnak chungah cun, a lut lomi nan um sual nakhnga lo, cu dinhnak chung i nan lut kho, ti biakamnak a um lioah hin, lut kho loin kan um sual lai tiah tih bu tein um usih. Annih nih an rak theih bantuk khan, Thawngtha cu kan theih cang. Sihmanhselaw an theihmi bia kha zumhnak in an cohlan duh lo caah an caah zeihmanh a thahnem lo” (Heb. 3:17, 4:2) ti hi a si.

Caan tampi cu Khrihfa hna nunnak ah nawl ngeih lonak le zumh lonak nihhin Pathian timhlahmhi chung i vung luhnak hi a tlaiter tawn hna. Kum tampi le thla tam nanw chung hneksaknak le tukforhnak an rak in i an sunghmi hna kha an ton than hlan tiang paoh cu thlarau lei i an nunning kha tinhmi zong ngei kho loin an i hel lengmang tawn. Hi bantuk te hi Khrihfabu tampi chungah siseh mi tampi bu fonh riantuannak ah siseh, Bawipa sin in kawh auhnak an tonmi ahhin a tlung tawnmi a si. Hi bantukin Pathian tinhmi phan loin a tlai deuh tawnnak cu a luan cia caan ah rak sungh cangmi kha ton than khawhnak dingah a kan timhlahmnak le dawnkhantu paoh kha kan tei khawh nakhnga a kan bawmhnak a si.

Israel miphun hna nih an tlai deuh lawng hmanh si loin an sungh cikcek hnu ah, cauk panganak nih aa tinhmi cu a dih donghnak ah Kamhmi Ram an luh khawh nakhnga timhlahmnak kha a si. Moses nih Deuteronomy cauk chungah a chimmi cu Israel fale chanthar mi hna cu ramcar chung i a chuakmi kha an si tiah a ti. Deuteronomy chungah Israel miphun hna cu ram chung luh dingin an i timhlahmnak cu Moses nih Pathian nawlbia hna cu an sinah a relpiak thannak hna le hruaitu caah Joshua an thimnak kha a chim.

Cucaah Baibal cauk i a hmasa panga hna nihhin Israel miphun hna hmailei kalnak ding lam kha fiangfai tein a kan hmuhsak. Cun tinhmi lampi cauk paruknak Joshua cauk ahhin a tlam a tling. Zeitindah Joshua nih a hruai hna i ram an teinak le an luh khawhnak kha tha tein kan cawng cang lai.

Joshua Angan 1

Joshua Nih uknak A Lak

Bawipa sal Moses thih hnuah, Moses riantuanto Joshua, Nun fapa cu, Bawipa nih a chawnh i, ka sal Moses cu a thi cang i cucaah nangmah le hi mi vialte hna hi tho ulaw, Jordan tiva hi tan u law, nanmah Israel mi hna ka pek laimi ram chungah cun lut tuah u. Nan keza nih a lamh laimi hmun paoh cu Moses sinah bia ka rak kam bang khan, nanmah kan pek cang hna. Ramlak le hi Lebanon tlang in tiva ngan Eufates tiva tiang, Hit mi hna ram vialte nitlalnak leiah Rili Ngan tiang nan ram a si lai. Na nun chung vialte ahohmanh na hmai i a dir khomi an um lai lo, Moses sinah ka um bang khan nangmah sin zongah ka um lai; kan deuh lai lo i kan hlaw fawn lai lo. Thawng ngai le raltha ngai in um tuah; zeitindah an pupa hna sinah pek awk in chiat ka serh cangmi ram hi, hi mi hi na coter hna lai. Moses ka sal nih nawl an pekmi phungbia vialte ningin ralring tein tuah awkah, a thawn bel thawng ngai le raltha ngai in um ko; khuazeika na kalnak ah khuaawng na pemh nakhnga, orh lei ah siseh kehlei ah siseh i mer hlah. Hi phungbia cauk nih hin na kaa kha chuah tak hlah seh; sihmanhselaw a chungah aa tialmi vialte ningin tuah awkah ralring tein na um nakhnga, chun zan in mah cucu na ruat lai; zeitintiah khi tikah na lam kha na tluanter lai i khi tikah khuaawng na tong lai. Keimah nih nawl kan pek a si lo mei? Thawng ngai le raltha ngai in um ko; na thinphang hlah, na lung zong dong hlah; zeicatiah Bawipa na Pathian cu khuazeika na kalnak hmanh ah na sinah a um ko,” tiah a ti (Joshua 1:1-9).

Joshua cauk cu Bawipa nih Moses sinin Joshua sinah hruaitu a thialnak hngalhter thannak in aa thawk. Moses nih Joshua cu amah a hun changtu hruaitu ah a chiah cang i, atu ah cun BAWIPA nih Joshua kha a rian thar a tuan khawhnak lai thazaang a peknak le a hruainak kan hmuh.

Bawipa nih Joshua sinah bia a chim tikah, “Thawng ngai le raltha ngai in um ko” ti hi voithum thlihmah a nolh. Joshua nih Israel mi hna Kanan ram i hruai dingah amah lei kap tuah khawhnak aa zoh ahcun a tling lo ngai in aa hmu. Amah hi siangpahrang chungkhar le hruaitu chungkhar zong a si bal lo. Moses bantu zongin profet lianngan zong a si fawn lo. Joshua nih hin cun khuaruahhar thil zong a tuah bal lo i Baibal chung zongah hin hlan ah Bawipa nih a chonh bal ti zong hi aa tial fawn lo.

Joshua nih Israel miphun hna kha hmailei kal dingin nawl a hun pek hna tikah, a nawl an ngaihnik ding caah herhmi thil ‘bel’ timi voi hni a chim ve. A pakhatnak cu, ahme 17 ah, “Amah belte Bawipa na Pathian cu Moses sinah a rak um bang khan na sinah um ve ko seh” “A thawn bel thawng law, raltha ngai in um ko” (a hme 18) tiah a ti. Hruaitu thar a hung cannak ah Joshua lawng hi thazaang derthawm in a um a si lo, mi zapi zong hi an rak um ve ko. Bawipa pakhat lawng hi thazaang derthawm in a um lomi cu a si. Pathian nih Moses kha a dinhter tikah timlam cia loin a um lo, zeizong vialte kha timhlahm cia in a chiah dih. Thil pakhat tu cu Joshua le mi zapi kha a dikdiar ina chimh dih lomi hna hi a si.

Kannah cio zong Bawipa nih hruaitu sinak a thar dirhmun ah a kan chiah ahcun, pakhatnak bikah kan tuah dingmi cu Pathian nih a kan kawh auhnak ahhin tlam a tlinnak lai thawnnak le thilti khawhnak a kan pek lai ti kha kan zumh awk a si. Hruaitu nih raltha ngai in a hruai hna ahcun, BAWIPA nih a umpinak kha a langhter lai i cu hruaitu nih a hnuzultu pawl kha a liannganmi zumh awk tlakmi sinak le ralthatnak in a khahter hna lai. Atu chanthar Israel ralkap hna zong teitu an si peng khawhnak le vawlei cungah minthang an si khawhnak a chan pakhatnak cu ral an tuk tikah an hruaitu upabik nih hmaisuang ah a um i a tukpi hna caah a si. Zumhtlakmi le hnuzultu ralthami ngeih na duh ve maw? Nangmah nih lam na hruai taktak hna hlanah cun tuah awk ah a harmi kha hal hna hlah! Kei zong hi phunglam hi mission riantuannak ahhin ka zulh peng ko; rawchok cuk hrang lak hruainak zong siseh, a hrang tuk lehpekmi Muslim hna lak zongah hin phungchim dingin pastor pawl hi ka fial hna lo.

Joshua nih hruaitu a sinak a hun thok tikah, Bawipa nih ralteinak le hlawhtlinnak hmu dingin bia a kamm i thazaang a pek. Kan hmuh cang bangin “thawng ngai le raltha ngai in um ko” tiah Joshua cu a ti. A pahniknak umtuning ding cu Bawipa nih Israel miphun hna teinak a pekmi hna ramri a khiahpiakmi hna hi a si. Hihi hruaitu hna caah thil biapi tukmi Pathian nih zeibantuk le khoika hmunah dah rian a kan thiah ti hngalh hi a si. A ke nih a lamhmi ram paoh cu teinak kan pek lai tiah Joshua cu bia a kamm, asinain Kanan ram kha fiangte in ri a khiahpiak. Pathian nih Israel mi hna a pek lomi hmun kha an va tuk a si ahcun fak ngai in sunghnak an tong ko lai. Kannah zong nih Pathian nih khoikaah dah ti le zeitindah a kan auh ti hi fiangte in kan hngalh lai i Amah duhnak kha kan tlinter khawh lai. Vawleicung tihnung hmunah hin khual ka tlawng i a um zong ka um bal, Sihmanhselaw Pathian nih a ka hruai ti hi ka hngalh caah him tein ka um khawhnak cu a si. Cunak hmanh cun, Pathian nih a duhnak chungah ral tihnung lakah ka nung bal i, Amah duhnak in a leng lei ah American mi nuam ngai in hmunkhat i an umnak ah ka rak um bal fawn.

Joshua sinah Bawipa nih tuah dingin a chimhmi pathumnak cu ‘nawlbial cauk’ kha tuah awakah chun zan in na ruat lai tiah a ti. Moses nih a tial ciami nawlbial cauk panga kha Joshua nih zulh dingin a cawn lai. Joshua nih cuti a tuah lawngah hlawhtlinnak a hmuh lai. Sihmanhselaw, a hnu deuh ah kan hmuhmi cu Baibal cawnpiak ningin Joshua nih a zulh lo tikah a sung.

Khrihfa hruaitu hna ca zongah teinak ah a hmuh khawhnak lai hihi fial an si ve. 2 Timote 3:16-17 ah “Cathiang hi a dihlakin Pathian thaw chuah hnawhmi a si i biatak cawnpiaknak caah le palhnak cawnpiaknak alnak caah le palhmi remhnak caah le ding tein nunnak ding cawnpiaknak caah a thahnemmi a si. Cucaah cun Pathian riantuantu a simi cu zeizong zeizong ah tlamtlingmi a si awk le thil tha phun zakip tuah khawh awakah thilthuam tling tein a ngeimi a si awk a si”. Pathian bia nih lam dik ah a kan hruai zungzal lawng si loin kan lungthin zong a ciah dih hnu ah kan nunnak zongah kan hman fawn lai.

Joshua A Ngan 2

Joshua Nih Ram A Ngiatter Hna

A ngan pahniak cu Joshua nih ram ngiatu pahni a thlahnak kong a si. Kanan ram chungah ze i thil dah a cang ti le Jeriko khua kong kha an dothlat khunmi cu a si. Jeriko khua cu Jordan tiva ral an tannak ding zawnah khan a um i, Kamhmi Ram va luhnak dingah tuk hmasa bik ding khua a si.

Cun Nun fapa Joshua nih Shittim in a thlite in mi pahni ram ngiatu ah a thlah hna i, “Va kal ulaw, ram kha va cuan tuah u, Jeroko kha” tiah a ti. Cun an kal i Rahab a min a simi hlawhhlng nu inn ah an lut i khika ah an tlung (Joshua 2:1).

Ram ngiatu hna zong nih Jeriko khua hi langsar in zoh ngiat an duh lo, khual thar hna caah cun hlawhhlng nu inn hi a him bikmi a si ko. A thlithup in thil tuahnak ding le bia hal an duhmi paoh hal khawhna hmun rem cu a si ko nain an duhning bialehnak tu cu an hmu kho ruam lo. Jeriko ralkap hna nih an hun kawl tik hna ahkhan, hlawhhlng Rahab nih tuanvo a lak zau ve hna. Inn chungah khan a kaipi hna i a thuh hna, cun ralkap pawl kha a hlen hna i amah inn can ah ram chung vialte kha an kawl dih. An sinah cun a hung kai i, “Bawipa nih ram cu an pek cang hna i nanmah kan in tih hnanak nih khan a kan nenh i hi ram chung ummi vialte kha nan hmaiah an ther dih cang” tiah ahme 9 a ti. Cun Rahab nih ahme 11 chung zongah, “Cunglei van le tanglei vawlei i Pathian a simi cu Bawipa nan Pathian kha a si, cun an cungah zaangfahnak a langhter cang bantukin, Israel mi hna zong nih an huhphenh venak lai zaangfah a hal hna. Ngiatu pahni zong nih khan an cungah zumhtlak in na um ko i, cu hrisen kha thlangawng ah a hren ah cun, an rak tuk tikah amah le a innchungkhar cu pakhat hmanh bau loin Israel mi nih an huhphenh hna lai.”

Israel mi hna nih Jeroko an tuk tikah an biakam cu an zuhl ko tiah Joshua 6:22 ah kan hmuh. Pathian zong nih Rahab zumhnak kha upatnak a pek tiah kan hmuh. A inn cu khua kulhnak hauhrung cungah a sak, Israel mi nih an hun tuk tikah khua kulhnak hauhrung cu a cim dih i Rahab inn lawng a taang, rawk lo tein a hmun. A thlangawng i hrisen a thlaimi cu Pathian le a miphun cungah zumhtlak in a umnak hmelchunhnak a si. A inn ah hrisen a thlaimi nihhin Israel miphun hna Izipt ramah tufa thisen thawngin an luh bantuk kha a si. Hrisen nih hin Khrih thisen kha a hmuhsak i amah le inn chungkhar vialte kha Pathian inn chungkhar le Khrih hrimhrim he khana komhter hna. Joshua 6:25 chungah cun, “Hlawhhlng nu Rahab le a pa innchungkhar le amah ta a simi vialte cu Joshua nih a nung in a zuah hna. Jeriko ngiat thlai awk ah a thlahmi lamkaltu hna kha a rak thuh hna caah Israel chungah nihin ni tiang hin a um. Rahab cu Pathian mi hna chungah a um caah Mathai 1:5 chungah Israel miphun Salmon he an i um tiah kan hmuh. Mathai Thawngtha nih amah cu Jesuh Khrih hrintlak ah aa tel tiah a kan hmuhsak! Rahab cu a zumhnak le a rianuan thatnak ruangah Biakam Thar chungah thangthat a tong (Heb 11:31; Jeim 2:25). Rahab nih a thlangawng i hrisen a thlaimi cu nihin ni zongah kan sin a phan i misual bik hmanh kha Khrih thisen thawnnak thawngin aa thleng i Pathian sin a phakter ti kha a kan hmuhsak.

Mi ngiatu pahni cu an hung kir tikah Joshua nih a luan cia kum 40 ah a rak tuah bantuk khan Thawngtha kha an chimh. Cun annih nih Joshua sinah, “Bawipa nih ram cu a dihlakin kan kut chungah a kan pek taktak ko cang, cu hlei ah cun ram chung ummi vialte hna kanmah ruangah an therphang ko tiah an ti” (Joshua 2:24). Hi Thawngtha an theih hnu hin cun, Kanan miphun kha doh awk ah Joshua le ralkap hna cu timh cia tein an um.

Joshua nih a tei khawh ning hi khrihfami thlarau lei he aa lawhnak kan hngalh khawh. Efesa 6:12 ah, kan dohmi hna cu minung kha si loin vancung khua i a ummi, thlarau sual thawnnak hna le uktu hna le nawlgeitu hna he hi a muimi chan lianngannak hna hi an si” tiah a kan chimh. Nihin ah kan dohmi cu pumpak siseh, chungkhar le khuachung hna, khua le ram pumpi uk a timtu Satan thawnnak hi a si. Kan Bawipa Jesuh nih a kan cawnpiaknak Matthai 12:25-29 bantukin hi ‘a thawngmi pa’ hi kan tem khawh hnu lawngah an uknak kha kan hrawh khawh lai i sal ah a tlaihi hna thlarau kha kan khamh khawh hna lai.

Kan caah Thawngtha a simi cu teinak lianngan chung Pathian ralkap hna kha Bawipa nih a hruai lio caan ah kan nun vemi hi a si. Hi caan donghnak ahhin Khrihfabu nih langhter dingmi cu vailamtah in teinak tlamtling kha ram kip lawngah si loin, ram kip kha muihnak chungah chiah peng aa timmi Satan ralkap hna sinah khan a si lai. Lamkaltu Paul nih hi rianuannak he pehtlai in Efesa 3:10 chungah a chimmi cu, “Cutu a rak thuh cu, Khrihfabu thawng hin vancung khua uktu vanmi hna nih hin, Pathian fimnak a phunphun cu atu caan ahhin hngal

hna seh ti a duh caah a si”. Cu bantuk in Joshua ralkap hna lawng nih Kanan siangpahrang hna thawnnak kha an hrawh dih, caan donghnak Khrihfabu zong nih Satan sual thawnnak vialte hna kha vawlei ram kip ahhin an hrawh dih lai i thanghnak le thlarau rawl tuannak nih hmuna lak cang lai.

Jesuh Khrih nih vawlei i a rak tlawnten lio caan ahkhan, khuachia hna cu a hmai ah an ther thluahmah ko. Matthai 8:29 chung zongah, “Hmakhatte ah khin an ai i a caan a tlin hlanah kannih dantat awk ah na ra maw?” tiah an ti. An caan khiahpiak an si kha an i hngalh ko. Kannih zong hi ‘Joshua chan’ knan si ve hna i hi kong hi kan hun cawn deuh tikah a tlin cuahmahnak kong na theih te ko lai. Kanan ralkap hna zong an thin a phang tuk cang, zeicahtiah an rawknak ding caan a naihnng kha na hmuh khawh, atu zong hi Satan sual thawnnak hna zong an therphang tuk cang hna! Hi ni donghnak caan ah a lai ding raltuknak ding caah hin kannih zong congor in kan um hna. Joshua le a ralkap pawl nih raltuknak nganpi doh an timh bang khan kan si ve cang hna. I congor in kan um lio ahhin, kan ral nih cun a kan thihphaihnak kha hngal hna u sih!” “Kan chungah a ummi cu an chungah a ummi nakin a ngan deuh” (1 Johan 4:4).

Angan 3

Jordan Tiva An Tan

Joshua a ngan pathum a hun thawk le cangka in, “Zingkate in Joshua cu a tho i Shittim in Israel mi vialte he an i thawh; Jordan kha an phan i an tan hlanah khika ah an riak” tiah a kan chimh.

A ngan pathum chung hi na hun rel deuh ahcun, Israel mi nih Jordan tiva an tannak kong kha na hmuh ko lai. Kamhmi Ram in an hung chuahnak in hika hi ramri donghnak a si. Bawipa nih hi chanmi hna cu kum 40 chung a timhlahm hna (Israel miphun tu cu kum 400 reng lo a si), Jordan tiva hi an caah a donghnak dawntu tei dingah an i batmi cu a si.

Israel miphu nih ti hi voihnih an tan. A voikhatnak cu Rili Sen a si i atu hi Jordan tiva an tan than. Rili Sen an tanmi cu thlarau lei thil in kan chim a si ahcun tipil innak kha a si i, Lamkaltu Paul nih, “Moses zultu si awk ah ... rili chungah khan tipilnak an in” (1 Korin 10:2) tiah Israel miphun kong kha a chim. Khrihfa pakhat nih tipilnak a in tikah, zumhnak in Khrih he hmunkhat ah an thi ti i vui ti zong an si tiah ruah a si. Israel mi hna nih Rili Sen kha an zulh i tipil an in tikah vawlei le Satan uknak kha an kaltak ve.

Sihmanhselaw, Izipt kal taknak le Rili Sen tan hi Israel mi hna caah khualtlawn hram i thok lawng kha a si rih ti kha kan hngalh. Cu bantukin, kannih khamh kan si i tipilnak kan in tikah, khrihfami kan pumpak ca cio ah Pathian nih a kan timhlahmhiakmi kan co khawh naklai thlarau lei kan khualtlawn hramthoknak lawng a si rih. Rili Sen an hun tan dih tikah khan Israel mi nih Izipt ram in an chuak dih. Kamhmi Ram an luh khawhnak ding caah cun Jordan tiva kha an tan than lai.

Jordan tiva nih hin cun tipil kan innak thil kan tonmi hna kha hmelchunhnak a si i, cucu Khrih he hmunkhat ah vailam tah ti tinak a si. Lamkaltu Paul nih amah thil tinmi kha hitihin a tial, “Kei cu Khrih he a vailam tahnak ahkhan thah ka si cang. Cucaah a nungmi keimah kha ka si ti lo, ka chung i a ummi Khrih tu hi a si deuh. Atu i ka nunning hi a ka daw i ka caah a nunnak a pemi Pathian Fapa zumhnak thawngin ka nung” (Kalati 2:20) tiah a ti. Khrihfa nih tipil a in tikah, Khrih he thih tinak le thawhthannak in a langhternak a si. Hi nihhin an nunnak cu Jesuh he aa lo in a thial tinak a si hnga maw? Si hlah, hihi cu zumhnak in hmasa bik karhlannak lawng a si rih, thil tampi ton dingah hruai hram a thawk lai. A hnu deuh ah cun, Pathian vel nih khan an nun ah thianhlimnak in rian a hun tuan lai i cu nih cun Khrih he hmunkhat ah thawh tinak kha tlam a tling cang lai. Hihi Jordan tiva hmelchunhnak kha a si.

Jordan tiva tannak hi ahme 14 in 17 chungah tha tein aa tial. “Cucaah ...hirhiar hlan tiang

Hi Jordan an tannak hi khuaruahhar thil lianngan a si caah khrihfa nih thil kan tonmi caah biapi tukmi a si. Israel mi nih Jordan tiva kha an hun tan tikah, ti cu chaklei ah Adam khua tiang a kir tiah kan hmuh. Kan caah “Kamhmi Ram” chung kan hun luh ve tikah, asiloah Khrih he roco ti kan si tikah, titsa in Adam he i pehtlaihnik vialte kha a cat dih. Jordan tiva cu Adam khua in a hung luang i Rili Thi ah a hung luh bantukin, kannih zong sualnak cu Adam thawngin kan cungah a tlung i thihnak ah a kan luhpi (Rom 5:12). Adam thawngin misual kan sinak vialte cu Khrih ah thlarau lei nun in kan thlen dih cang. Cun kan thlarau lei roconak dingah teitu dingin kan

tho kho lai i Khrih he kan uk ti lai. Cucu Israel mi nih Joshua hruainak tangah Kanan ram kha an tei i an uk bang kannih zong kan si ve cang lai.

Khrihfa mi kip nih Jordan tiva nih cun thihnak kha a langhter tiah an hngalh dih cio. A min hrim nih hi biatak cu a langhter. Jordan tiva min sullam cu “A tummi” tinak a si, zeicahtiah, Rili Thi leiah a vung tum thluahmah i Rili nak in pe 1290 a vung niam deuh caah vawlei cungah a niam biknak hmun a si. “Tumchuk” timi cu Adam khua thok khan vawlei cung hmun niam bik Rili Thi ah a hung luh tikah minung kan dihdonghnak thihnak kha a langhter mi a si.

Khrihfabu kip nih hi hmelchunhank hi hngal ko hmanh hna sehlaw an nun ah i lak ding kha cu an duh hna lo. Bu cheukhat nih cun, “Jordan tiva tannak” ti sullam cu kan thih i vancung kan kai khi a si tiah an si. Sihmanhselaw hiti an chimmi hi cu Joshua cauk nih a chim duhmi hmelchunhank cu a si lo. Israel mipun hna nih Jordan kha an tan tikah ram co ding caah raltuk ding an ngei rih. Vancung kan kai ve tikah cun vawlei siseh, khuachia zong doh ding kan ngei ti lai lo! Vawlei cung i kan um lio ahhin Khrih caah ralkap tha si le Satan thawnnak kha doh i Pathian pennak kauhter kha kan herh. Hihi cu pumsa thihnak si loin thlarau leiah Khrih he vailam ah kenh chih kan si tikah “Jordan cu kan tan” khawh lai. Cun vawlei le tisa le khuachia cu kan tei lai i vawlei cu kan uk cang lai. Hiti bantu kin vancung khua le a ra laimi chan caah zungzal nunnak kan co khawhnak lai kannih zong timhlahm kan si ve lai.

Joshua 3:2-4 chungah Jordan tiva an tan lio i khuaruahhar thil a tlungmi kong kha a kan chimh. “Nithum hnu ah riahhmun chungah cun bawi hna kha an i chok i mi kha, “Bawipa nan Pathian biakamnak kuang kha Levi tlangbawi pawl nih an put kha nan hmuh tikah nan umnak cio khan nan i thawh lai i nan zuluh lai, kan kalnak ding lam cu nan hngalh nakhnga. Asinain nanmah le a karlak cu dong thonghnih tlukin aa hlat in nan kal lai, nan naih lai lo” tiah nawl an pek hna.

Joshua le Israel mi hna nih Jordan tiva an tan tikah hin, tlawngbawi hna nihhin biakam kuang kha an liangin an put. Moses nih a sermi biakamnak kuang cu kan Bawipa Jesuh Khrih kha a hmelchunh i a langhter mi a si. Amah Khrih hrimhrim nih khan A mi hna hmaiah a kal chung i Adam sinin a rak luangmi ‘thihnak tiva’ cu Amah thihnak thawng khan a chah dih cang.

Biakam kuang cu mipi he dong 2000 aa hlat in a kal lai, an kalnak ding lam a hmuhsaknak hna a si. Number 2000 nihhin kan caah sullam ngeimi profet biaphuan he aa pehtlaimi a si, cucaah hngalh awk biapi tukmi a si. A luan cangmi kum 2000 lio ahkhan vawlei sualnak vialte lakpiak dingin Khrih cu a thi, Pathian mi hna nih a hnu zulhdng a si. Vailam ah kenh chih nun ah kan hung lut lai i a puar thlarau le thawnnak vialte teinak ding caah timh cia kan si cang lai. Joshua le a ralkapbu nih ram cu lak awk ah an i thawh bantu kin, “Joshua chan mi hna zong nih biakam lianngan tlamtlin khawhnak ding caah ram chungah cun an lut cang lai. Hihi Khrih a rat thannak ding caah siseh, Pathian pennak vawlei ah tlamtling in dirh a si khawhnak lai rak timh chungnak a si.

Biakam Hlun dang tampi chungah kan hmuh bantu kin hi number 2000 hi Khrihfabu chan a tawisau ding kha a hrawnghrang in a chimmi a si. Tahchunhnan ah, Moses puantlam cu then thum in kan hmuh khawh. A lenglei cu dong 1500 tung vang palh in puan vampang a si. Hi nihhin nawlbia chan kum 1500 kha a chim duh i, Moses in Khrih kha a si. Hmun thiang kha cu dong 2000 a si. Cucu Khrihfabu chan kum 2000 hi a hrawnghrang in a chimmi a si. Cun Thiangchin hmun cu dong 1000 a si i a ra laimi Kum Thong Ram ca khi a si. Moses biaknak thlam nih profet biaphuan bantu kin then thum ah a chimmi hi chan thum aa thenning kha a langhter i, thlarau lei in ton dingmi chan thum kong kha a hmuhsak duhmi a si.

Salomon biakin nih hin Khrihfabu aiawh in a dang biaphuan piakmi a kan ngei rih. 1 Siangpahrang 7:23-26 nak bantu kin hmaihum pakhat kha lenglei ah an chiah. Hi hmaihum nganpi khat in ti an chiah i tlawngbawi hna nih an rian an tuantik ah anmah thianhhlimhnan caah a si. Biakam Thar chan ah cun hrinthan khrihfa vialte hna cu Pathian biakinn a simi Amah Khrihfabu ah a rianuan ding kan si. Cu nak hmanh cun, Efisa 5:26 nih a kan cawnpiakmi cu atu i a kan thiantertu ti cu hi vawlei tisa ti hi si loin “Pathian Bia in a thianter hna”. Atu i a kan thiantertu cu Pathian Bia a si.

Siangpahrang pakhatnak 7:25 chungah Solomon nih dar in cawtum 12 a ser hna i an hna nih cun dar hmaihun cu an phorh i Jerusalem biakinn chungah an hun. Cawtum cu rianuantu hmuhsaknak ah Paul nih a

hman (1 Timote 5:17-18; 1 Korin 9:9-10). Thawngthabia kha rianuantu hna nih vawlei kil li ah Pathian bia cu an phorh i Khrihfabu nih vawlei cung hmunkip ah teinak kha an hmuh i sunparnak a langh khawhna lai rak timhlahm chungnak a si. Solomon nih cawtum 12 cu Jerusalem biakinn ahkhan vawlei kil li hoih in a chiah hna bantuakin, Khrih zong nih lamkaltu 12 cu Jerusalem in a thlah hna.

Hmun pali timi (Nichuah, Nitlak, Chaklei, Thlanglei) cawtum nih an zohnak kha profet biaphuan a si fawn. Bawipa nih Pathian bia cu Jerusalem thokin vawlei khuazakipah phuan a si lai tiah a ti. Hmasa bik thawngthabia fakpi in a karnak cu Jerusalem in chaklei ah a si i Europe ram cu khrihfa ram tiah ti a rak si. Jerusalem in nitlak lei ah a ummi America kawntenent hi vawlei cungah thawngthabia a cohlangtu a pahnihnak a hung si. Mission riantuannak tuanbia zoh tikah, Africa ram hi (Jerusalem in thlanglei) khrihfa sinak a karhcho ngaingaimi ram a hung si. Atu ah cun Pathian bi anih vawlei pumpi khi khahter dih a timh cang i Jerusalem in nichuah lei, Asia ahhin a donghnak ah thawngthabia a karh cang. Bawipa nih vawlei cung huap in Khrihfabu cu sunparnak he a thuamh bantuakin thanghnak cu Asia ram kipah a tlung cang i cucu Solomon biakinn nakhmanh in a sunglawi deuhmi cu a si.

1 Siangpahrang 7:26 nihhin dar hmaihum pakhat nih ti bath 2000 a tlum tiah a langhter. Tlangbawi hna thianternak thawngin mipun kip, ram kip le holh kip hna sinah Pathian bia ti nih hin zeitlukin dah a khah lai ti kha chimchung bia a si fawn. Bath 2000 nihhin Khrihfabu chan a simi kum 2000 hi a hrawnghrang in a langhter duhmi a si i vawlei cung dihlakah Pathian bia a karh lio caan hi a si.

Biakam Hlun chungah hin aa thupmi biatak thawnnak tampi hi a um ko nain a dihlak hin cun profet biaphuan an si caah a lang dih rih lo. 2000 nihhin khrihabu chan hi a hrawng in a chimnak a si.

Biakam Thar zong nih Khrihfabu chan hi profet phuanning in fiangfai ngai in a langhter ko. Kan Bawipa Jesuh nih Jerusalem cu ramdang Jentail mi nih sau an uk lai lo tiah a phuan chung bantuakin, kha chan minung hna nih voihnih a ratnak hi an hmuh lai. Khrih nih, “Ram dangmi nih Jerusalem khua cu an naan lai i an caan a dih hlan tiang an ke tangah a um lai. Mah hihi philh hlah u; hi thil vialte hi atu i a nungmi hna an thih dih hlan ahhin a tlung lai” (Luke 21:24,32) tiah a langhter.

Kum 1900 reng lo ram dangmi nih an uk hnu ah, Judahmi hna nih Jerusalem khua cu 1967 niruk ralpi chung khan tlamtling tein an uk khawh than. 1948 lio khan Jerusalem cheukhat hi Israel mi nih an rak uk khawh cang. Asinain niruk chung raldoh hnu khan Jerusalem khua biapitnak deuh kha Jordan ram sin in an lak than i an uk khawh. Cun 1967 ri khan cun Khrihfabu caan zong hi a dong cang i, ‘ram dangmi chan’ zong a tling dih cang caah tu chanmi tu an nung cang.

Khrih voihnih rat thannak caan cu a nai chin lengmang cang caah, a thang kho lomi hna le a fim lo deuh nih cun “ni khiah” in Khrih cu cu ni ah a ra hrimhrim lai tiah an ti. 1970 kum lioah hin Baibal cawnpiaaktu saya minthang ngai pa nihhin Judah mi nih 1948 kum ah Jarusalem cu an uk khawh cang caah (kum 40 hi Baibal kum ri khiah a si) Bawipa cu 1988 kum ah a ra lai tiah a ti. A dang Baibal cawnpiaaktu saya pakhat nih cun kum 2000 hi Khrihfabu chan a si tiah profet caan tuakning khan cun a si ko nain kum 2000 hnu deuh ah Khrih cu a chuak (cucu BC 4 kha a chim duh) cucaah Bawipa cu 1996 ah a ra than lai a ti ve. Bwipa rat thannak ding caan cu a nai chin lengmang bantuakin hmelchunhnak zong a fiang chinchin, cucaah a ni le caan ‘set te’ a tuaktu hna hi an tam chin lengmang lai ti cu zumh lo ding a um lo. Sihmanhselaw, kan Bawipa nih Matthai 24:36 chungah ralrinnak a kan pek thanmi cu, “Asinain cu ni le caan cu zeitikah dah a si lai ti kha ahohmanhnih an hngal lo; vancungmi zong nih an hngal lo, Fapa zong nih a hngal hlei lo, Pa lawnglawng nih a hngalh” tiah a ti.

Kum 2000 hi Khrihfabu caan ti in hei khiahmi hi tuaktan deuh a hau. Khrih vailam cung i a thihnak le Penticost ni khan Khrihfabu aa thok i Bethlehem ah Jesuh chuahnak khan cun a si lo. Khrih a thih kum kha AD 29 ah a si ti in cohlan a si ahcun, Khrih voihnih rat thannak ding cu 2029 AD ah khin a si ve te ko lai.

Joshua 3:4 nih cun Pathian fale hna nih biakam kuang cu dong 2000 hlat in an zulh tiah a chim. Bawipa Jesuh nih caan cu tawiter a si cang tiah Matthai 24:22 chungah a chim. “Sihmanhselaw cu caan cu Pathian nih a tawiter cang, rak tawiter hlah sehlah cu ahohmanh a nungmi an um hnga lo”. Cucaah hi bantuak aa thleng kho lomi thil ruangah, Bawipa rat thannak ding ni rak khiah len hi hruh bia a si ko. Zei hi dah a fiang tukmi cu a si, Sihmanhselaw, kan nun can hi kha set kha ti ding a um lo. Israel mi hna nih Jerusalem cu an uk than khawh cang

caah caan donghna ah kan um ti cu a fiang ko. Khrih nih vailam cung i a thihnak khan Adam he aa pehtlaimi sualna vialte cu hrawh dih cang caah kha kum 2000 ri khan cu 'Joshua chan' ah a nungmi kan si hna. Hi caan donghna ah a thawngmi Pathian pennak langhter awk caah le thawngtha chim dingin a thawngmi Pathian ralkap si awkah aa pumpemi si cio u tiah kan in sawm hna. Khrih nih a phuanmi cu, "Cun mipun vialte hna ca i tette si awk ah vancung pennak kong thawngtha hi khuazakip ah chim a si lai, cun cu hnu lawngah cun donghna cu a si lai" (Matthai 24:14) tiah a ti. Joshua 3:15 nih a kan chimh bantukin Israel mi hna nih Jordan tiva an tan lio caan hi 'rawluan caan' a si i kan Bawipa Jesuh Khrih zong hi thlarau rawluan caan liopi ah a ra than lai. Moses chanmi hna nih cun an ral hna sinin an luat khawhna lai Rili Sen kha an tan. Sihmanhselaw, Joshua chan mi hna nih cun an ral kha an tuk i an luh khawhna lai Jordan Tiva cu an tan ve! Cu caan thawk cun, Joshua le Israel mi hna cu tinhmi pakhat an ngei hna i an ral hna kha tei i ram kha uk khawh ding a si. Hi thil a tlin khawhna ding caah Israel mi hna nih cun kum 400 chung an hngah. Hi tinvo cu, "Joshua chan mi nih an tlamtlinh khawhna lai timhlahm an si.

Atu kan nun lio caan le thil umtuning cu a fian bantukin, Pathian duhna cu kan chan ah hin kan tlinter khawhna lai thianghlim tein i pumpe ko hna u sih. Joshua chan i a nungmi kan si bantukin, Pathian nih tinvo a kan pekmi hi Pathian sinah kan tuan awk hrim a si ko. Hi nawl pek lianngan tlamtlinterna ding caah Khrihfabu nih kum 2000 chung a hngah cang i hi a sunglawimi tinvo cu tuan dingin kannih kha pek kan si ve. Kannih Joshua chan minung hna nih kan hman ve dingmi kha Hebru 11:39-40 chungah zeitindah aa tial, "Hi mi vialte hna hi an zumhna ruangah hin zeitlukin dah thangthat awk an tlak? Asinain Pathian nih a kamhmi hna thil kha a hmuh hmanh an hmu lo, zeicahtiah kan caah Pathian nih khuakhannak tha deuh a ngeih caah a si, annih kha kanmah he lawngin tlinnak a hmu kho ding an rak si."

Joshua Angan 4

An Tan Lio Philh Lonak

Jordan tiva an tan dih hnuah, an tan lioah khuaruahhar thil hna kha Israel mipun hna nih an hngalh camcinnak lai philh lonak tuah awkah Bawipa nih Joshua kha a chimh. Jordan tiva chungin, Israel mipun zat in lung hleihnih cu an lak i an riahnak hmun Gilgal ah an i kalpi hna i khik ah an chiah hna. Joshua 4:9 chungah, "Cun Joshua nih Jordan tiva laifang, biakannak kuang a putu tlangbawi hna ke dirnak hmun ahkhan, lung pahleihnih a bunh hna i nihin ni tiang an um ko". Cu lio caan bantukin Bawipa nih a kan hruainak ahhin philh lonak kha tuah a kan fial; hmelchunhna, philh lonak lungphun, lehmah, hmanthlak, asiloah hla hna tibantukin kan nunnak ah Bawipa nih thil a tuahmi kha hngalh camcin dingah kan tefa hna kha chimhchin ding an si. Bawipa zanriah hi Amah kan Bawipa Jesuh philh lonak ding caah a sermi a si. Kalvari vailam cung i a tuahmi kha a kan theihter than. "Jordan Tiva tan" a sullam taktak a tlinterna kha a si.

Joshua hnu kum 1500 dengmang ahkhan, a dang Pathian salpa Jordan Tiva chung hi zawn hmunte ahhin a dir i Israel mi hna cungah Bawipa nih a thawhna in thil a tuahmi kha a hun theihter than. Johan 1:28 chungah tipil petu Johan nih Jordan tiva nichuah lei kam Bathabara (Bethani) kua ah phung a chim i tipil a pek hna tiah kan hmuh. Bathabara ti sullam cu "Inn kalnak lam" tinak a si i tiva in nichuah lei ah a si. Hika hmun cu Jeriko kua he aa naih. Joshua le Israel mi hna nih Jordan tiva an tannak hmun kha a si. Johan nih thawngtha a chimmi cu, "Nan sualna nan i ngaihchihna cu nan theitlai in langhter ngat u. Abraham cu a kan hringsortu a si ti in kan luat lai ttiah i ruat hlah u. Pathian nih hi lung hna hi Abraham tefa ah cun a ser khawh ko hna ti hi kan chimh hna" (Matthai 3:8-9). Johan nih lung kong kha Jordan Tiva ah a chim tikah, a bia a ngaitu hna nih cun Joshua le a mi hna nih tiva an rak tan lio i khuaruahhar a simi philh lonak caah kuang an lakmi a si tiah an ruah ko. Cun tiva chung i Pathian kuang a dirnak hmun ahkhan, tipil petu Johan nih Jesuh kong he pehtlai in hmailei ah thil a tling dingmi kha Israel mi hna cu a chimh hna, "Zoh hmanh u! Pathian Tuufa, vawlei sualna a kalpitu khi" (Johan 1:29).

Joshua 4:14 chungah, "Khi ni ah Bawipa nih Joshua cu Israel mi vialte hmai ah a hlorh" tiah kan hmuh. Jordan tiva laifang ah biakam kuang a um lio caan ahhin Bawipa nih Joshua cu mi vialte hmaiah a hlorh. Joshua cu Khrih aiawh a si, Jordan tiva chung hi hmun zawnte ah a dir i ti pilnak a in lioah khan mi vialte hmaiah hmasa

bik a hlorh kha a si. Pa aw nih cun, “Amah hi ka dawtmi ka Fapa a si, Amah cungha hin ka lung a tling” tiah an hngahmi Messiah cu Amah hi a si tiin Johan nih a phuannak hmun kha a si.

Hika hmun nih hin Pathian tufa nih vailam cung i rian a lim dingmi kha a sullam a rak langhter i, Khrih cu vailamtahnak i thahnak a in thawngin zeitindah thangthatnak a hmuh lai tiah profet phuannak zong a si fawn. Zeicahtiah Khrih nih vailamtah i thihnak tiangin aa tangdor tiah Filipi 2:8-11 nih a kan chimh. “Mi tangah aa dor i nawl ngaihna lam kha thih tiangin a zuhl-vailam cung thihnak kha, hi ruangah hin cunglei a sannak bik hmunah khin Pathian nih a cawi i min vialte lakah a ngan bik min kha a pek. Cucaah Jesuh min upat awk caah Pathian kan Pa thangthat awk caah Jesuh Khrih cu Bawipa a si, an ti lai”. Hihi cu kanmah kan i toidornak le vailam riantuannak kha kan i pomnak thawngin Pa Pathian nih a kan hlorh ve lai.

Joshua 4:14 chungah kan hun rel thanmi cu, Khrih ni ah Bawipa nih Joshua cu Israel mi vialte hmaiah a hlorh i Moses an rak tihzah bantuk khan amah cu a chan chung vialte an tihzah ve”. Bawipa nih Joshua cu Israel mi hna hruai khawhna ding caah khuaruahhar thawnak he Jordan tiva ah a bawmh hnu ah cun, Moses an rak tihzah bantuk khan amah cu an tihzah ve cang. Hi hlanah hin cun Joshua nih khuaruahhar thil zehmanh a tuah lo, Pathian nih a umpinak zong thil lianngan aa phuannak a um lo. Joshua nih khuaruahhar thil in tiva kha a hun thenter hnuah cun, Moses an rak tihzah bantukte khan mi zapi nih a riantuannak cu an hun cohlan ve.

Rian ka tuan kate ahhin hruaitu mifim ngai pa kuttang ahhin ka rak tuan i pastor a rak tuan hmasat biknak Khrihfabu tuanbia kha a ka chimh. Hi riantuantu pa hi inn chungkhar pariat Khrihfabu ah pastor a rak tuanka ahhin a rak no ngai ve rih. A Khrihfabu member hna cu amah nak upa deuh kha an si caah a riantuan ka ah cun an upat kho lo. Nun chimh cawnpiak can ai ahkhan, thla tu a campiak hna i Bawipa nih lam a phunphun in thlua a chuah hna i pastor pa can ah Bawipa nih nun a chimh hna. Chungkhar pakhat cu fim cawnpiaknak an herh liote ah Bawipa nih fimnak kha a pek hna. Midang caah damnak ding caah thla kha a campiak hna i khuaruahhar in a dam taktak. Zarh tlawmpal hnuah cun an pastor thar pa cu Pathian thlahmi a si tinak caah Khrihfabu chung chungkhar hna sin cio ahkhan fehternak a hun tuah i an thilung dihla kin a riantuannak an hun upat ngaingai cang.

Hi tuanbia hi ka philh kho hrim lo, a rauh hlanahh pastor bawmtu ka hun tuan ve tikah hin cu Khrihfabu i tar hna nupa nih mino ka sinak ah an ka zohchuk ngai ve. Cu tikah kei zong nih a cunglei thil hi ka zohchun ve i anmah caah thluachuahnak nganpi an hmuh khawhna lai Bawipa sinah thla ka cam. Kha hna nupa nih an fapa kongah harnak fakpi an tonnak in Bawipa nih rian a tuannak a langhter. Cu hnu cun, Khrihfabu chung rian ka tuannak ah zeirel lonak cu kha khrihfa upa hna nupa nih an langhter ti lo pinah, mission rian kan tuannak ah kan chungkhar a kan bawmtu an si.

Na pawngkam minung nih upatnak le tihzahnak an in pek lo bu ah, Bawipa riantuan hi na zuam peng ko maw? Bawipa hmai kha kawlaw peng law Amah nih mi hna kha thluachuah a pek hna lai, a kut kha na cung i a umnak a langhter fawn lai. Khuaruahhar thil pakhat in siseh, asiloah damnak in maw Bawipa sinin bia pakhatkhat in dik Jordan tiva ah Joshua sin i rian a tuan bantuk khan na riantuannak ah thanchonak an pek ko lai.

Joshua Angan 5

Ram Teinak Ding Ca Timhlanhnak

Israel mi hna nih Jordan khatlei ral an phak hnuah, an cungha thil a hung than rihmi cu, Israel pa vialte hna nih an cuarpar an tan hnanak hi a si. Joshua 5:2-5 chungah, “Khi caan ah Bawipa nih Joshua cu, teklung namte ser hna law, Israel mi cu a voihnihnak an cuarpar tan than hna,” tiah a ti. Cun mah hihi Joshua nih zeiruanga dah an cuarpar a tan hnanak cu a si. Izipt ram in a chuakmi pa vialte, ralkap vialte kha Izipt ram in an chuah hnuah ramlak ah khan lampi ah an thi dih. A chuakmi pa vialte kha cuarpar tan an rak si nain, Izipt ram i an chuah hnu ramlak i lampi ah a chuakmi vialte hna tu kha cu cuarpar tan lo an si.”

Israel mi hna nih Jordan an tan dih hnuah, Bawipa nih nan cuarpat tan a herh tiah Joshua kha a chimh. Hi thil nihhin Israel mi hna Pathian sinah i pek deuh a herhnak sullam kha a langhternak a si i khrihfa hna caah hmelchunhnak dang a si ve rih. Jordan tiva kha kan tan dih tikah (cucu Khrih he kenh chih kan si ti sullam langhter kha a si) kan ral kha kan tei hlan le Khrih chungah kan ro kan co hlanah cuarparnak kan herh. Hi nihhin

kan caah zeï sullam dah a ngeih hnga?

Kokek sining in chim ahcun, cuarpar tan timi cu titsa hei tanpiak khi a si ko. Pathian nih Abraham kha na tefa hna cu Kanan ram ka pek hna lai tiah biakamnak a tuahmi hmelchunhna a si. Genesis 17:7-14 chungah Bawipa nih Abraham kha, ka biakamnak cu zungzal hmunmi biakamnak caah nangmah sin le a ra lai ding chan i na tefa hna sinah let lo tein ka um lai. Hi ram, atu i khual na sinak ram hi nangmah le na tefa hna cu kan pek hna lai. Kanan ram hi a ningpi in nan ta a si zungzal lai. Nangmah zong nih keimah he kan biakamnak hi na zullh ve hrimhrim lai, nangmah le hmailei chan i a um laimi na tefa hna nih nan zullh ve hrimhrim lai. Nanmah lak i pa paohpaoh cu nan cuarpar nan i tan dih lai. Hi nihhin nanmah le keimah karlakah biakamnak a um kha a langhter lai. Cuarpar aa tan lomi pa cu a miphun chungin hlonh a si lai, zeicahtiah “Keimah he biakamnak cu a zul lo tiah” a ti. Hi biakamnak a phi chuak cu, Israel mi hna nih ram kha an luh i an tei khawhna ding caah titsa lei in timhlanhna a biapi bikmi cu cuarpar tannak hi a si.

Sihmanhselaw Israel mi hna nih i cuarpar tannak cu a thuk ngaimi thlarau lei thil biapi a si tiah an hngalh. Moses zong nih Israel mi hna kha Kamhmi Ram an luh tik caah a timhpiakmi hna cu Deuteronomy 10:16 ah, “Cucaah nan lung cuarpar cu tan u law, lungkhong si ti hlah u” tiah a ti hna. Kan thlarau cuarpar tannak sullam tak a langhna ding cu kan lungthin cu titsa riantuannak in aa then lai i Pathian sinah aa pumpe lai.

Lamkaltu Paul nih kan caah hi biatak cu a nolh than. Filipi 3:3, “Kanmah hi cuarpar tan taktakmi cu kan si, lenglei phunglam kha zeihmanh kan i bochan hna lo”.

Khrihfa ka si kate ah hi bantuk thlarau cuarpar tannak nih ka cungah zeitindah rian a tuan ti kha zohchun awk pakhat chim ding ka ngei. Baibal sianginn ka um lioah, thlacamnak khaan chungah Pathian hmaiah ka tap i langhna ka hmuhmi cu vainam pakhat aa tlaih i aa mermi nih ka lungthin chung i thil pakhatkhat kha a ka tanpiak. Vainam nih a ka tanpiak dih le cangka in Bawipa nih cathiang kha haar ngai in a hun ka chimh, “A e le cirik nih an ei khawhna le mifir nih an fir khawhna vawlei ahhin na chaw va khong hlah”. Cu lio caan ah bank ah tangka tlawmte kaa khonmi a um, lungthin fak ngai in Bawipa sinah ka chim thanmi cu, “Ka tangka kha ka lak dih lai i ka pek dih lai” tiah ka ti. Lungfak ngai ngaiin ka um i ka lungthin cu tangka cungah i bochannak le duhna cu fakpi ka ruat i ka kekkuai dengmang ko. Sihmanhselaw, Bawipa nih a ka lehmi cu tangka va hlonh dih kha a si lo, cu nakcun Amah sinah i pumpek i a thilri ah thate zohkhenh thiam le kenkawi thiam kha cawn ding a si. Cu ni ah cun ka thinlung chungah Bawipa nih cuarpar tannak kha a ka tuahpiak. Hi nihhin ka riantuannak kum saupi chung a ka kilven, zeicahtiah tangka duhna zong ka ngei ti lo i thawhlawm zong ningcang lo i hman duhna ka ngei lo.

Israel miphun hna nih Kanan ram teinak an hmuh hlanah Joshua nih an cuarpar a tan hna bantuk kha, kannih khrihfa mi hna zong Khrih ah ro conak le ukna kan luh khawh hlanah kan thinlung cuarpar tan hmasa kan herh. Kan riantuannak ding chung i luh kan i timh lio le ro kan cohlan ahhin raldohnak le tukforhna cu a fah tuk caah tonghtam thiamding zongah a fawi lo. Cu tikah hnulei zongah kan tolh than ko lai.

Cu ruangah cun a si lai, Timote kha Paul nih khrihfa a cannak a naimi cu riantuantu ah thim lo ding tiah 1 Tim. 3:6 chungah ralrinnak a rak pek hi. Mi nih an riantuannak kha Pathian nih thlua a chuah i a thancho tikah, porhlawt ruangkai hi a fawite i an thinlung cuarpar tan asilo le an sualpalhna vialte kha phonghpiak dih an si hlan lo paoh ah cun titsa riantuannak vialte hi an tho than kho ko. Hi bantuk thil hna hi riantuantu minthangthang hna cungah a tlung lengmang tawn. Khrihfa sika ah aa thei setsai lomi sual hmete zong kha a thang chin lengmang i pangpar bang sualna ah a hung par, an riantuannak hna le an chungkhar dihlak an rawk dih cikcek tiangin.

Phungthlukbia 20:21 nih, “Thilri khon kha khulrang tuk in naa thok ahcun, a donghna ah thlua a chuak lai lo” tiah ralrin a kan pek. Khrihfa kan nun ah siseh riantuannak ca kan i timhlanhna ah thil hmaan tukmi a si caah kan thinlung ah biapi tuk in i chiah hna u sih. A riantuannak min a thang tukmi le Rocket bang a kai cak tukmi hna hi chikkhatte ah ruah lo tuk in a rawk cikcek tawn, cubantuk cu si hlah u sih!

Joshua nih Israel mi hna kha an cuarpar a tan dih hna tikah, Bawipa nih Joshua sinah a chimmi cu, “Nihin ni ahhin nan sin in Izipt mi nih an in nihsawh hnanak cu ka hrilh cang”. Cucaah cuka hmun min cu nihhin tiangin Gilgal tiah ti a si (Joshua 5:9). Jordan tiva kap ah riah hmun cu Gigal tiah ti a si i cu a sullam cu ‘hrilh’ tiah

ti a si, zeicahtiah cuka ah tlinte dih a si. An cuarpar tannak cu Bawipa nih “Izipt mi nih an in nihsawh hnanak cu ka hrilh cang” tiah a ti. Hi nihhin a biapi tuk hringhranmi biatak kha a kan hmuhsak.

Izipt ram chuah tak ding in Israel mi hna nih Rili Sen kha an tan tikah, Faro le a ralkap vialte hna cu cuka ah hrawh dih an si ti kha kan hngalh. Israel mi hna cu sal sinak in an luat i Kamhmi Ram an panh cuahmah lio ahkhan, an thinlung chungah Izipt tlaihchannak kha a tang ko rih. Ramcar chungah harnak hna an hun ton tikah khan, an vuivai theu i Izipt ram kir duhnak zong an ngei ko rih! Jordan Tiva kha an tan dih i an cuarpar tan a si tik lawngah Izipt ram tlaihchannak viate cu an thinlung chungin thialpiak dih an si. Hi “Izipt min chiatnak” timi vawlei tlaihchannak le vawlei chawva duhnak hna cu Rili Sen ahkhan cun thialpiak an si rih lo. Hi kong kan chim hlanah ti ah tipilnak kan in tikah sualnak vialte cu kan thinlung chungin aa thial dih rih lo. Jordan kan tan dih tikah - Khrih he khenhchih kan si ah khin kan thinlung chung cuarpar tan kan hung si i kan sualnak vialte hna cu a hrampi in hreitlung an kenh dih i hrilh luahmah a si cang.

Israel mi hna nih Kanan ram khuaitizu, mitsurhang, chiti le changvut thawthaw an ei hnu cun Izipt ram khachuansen le daidim tehna kha cu an ngai ti lo, an philh diam cang. Anmah ram te ah voikhat luat tein an hun khuasak cang hnu cun Izipt ram sal si lio i palek le ralkap congkhalkhannak tang um kha cu a duh in an duh kho ti lo. Cu ve bantu kin kannih cio zong voikhat te Khrih he vailam ah kenh chih kan si hnu, Pathian nih a mi hna caah a timhlahmhi zungzal nunnak laksawng le a riantuannak, a thluachuahnak chung i kan luh ko cang hnu ahcun sual sal tan bu i nuamhhnainnak kha cu kan duh kho ti hrim lo. Pathian nih a kan pekmi hi zeitlukin dah a sunglawimi an si, lunglawmhnak le a hmun zungzalmi an si caah Esau nih mekhkeng khat ah a zuar bantu cun hi kan ro sung hi cu kan zuar kho lai lo!

Israel mi hna Izipt ram in Kanan an luh tiang an khualtlawnnak kha kan hmuh ko caah kannih timhlahm chung caan ah thangcho dingin zeibantukin dah kal kan herh ti kha kan hngalh a hau. A riantuan dingin kan i timhlahm dih hlan le Pathian nih kawh kan sinak kha kan cohlan ahhin, kan hrinthan hmasat i tipilnak kan in a herh. Hi bantu thil kan tonmi hna hi cu Lanhtak puai tuah le Rili Sen tan he khan aa lomi a si. Thlarau in khah zong kha kan herh i cucu Sinai Tlang i Israel mi khualtlawn lam kha a hun langhtermi a si. Ramcar chungah Israel mi hna nih thil an tonmi bantu khan kannih zong hneksaknak le harnak tampi kan ton ve lai, cu tikah Khrih ralkap tha nih harnak kha zeitlukin dah an intuar ti kha kan i cawn khawh ve lai. Jordan tiva kha kan tan i kan thinlung chung cuarpar tan kan si hnu lawngah, kan tinco hnga ding luh khawh ah timh cia kan si lai.

Joshua nih Gilgal ah riahmun a khuarmi hin Kanan ram kha va tuk i tei khawh ding caah hram an bunh. Ral kha an va tuk dih tik zongah Gilgal ahhin an rak kir than (Joshua 5:10; 6:11; 9:6; 10:43 le 14:6). Hi biatak nih a kan cawnpiakmi cu kan nunnak ca le a riantuannak ding caah Pathian nih bia a kan kamhmi vialte co kan duh a si ahcun, kan miak lawng si loin kan thinlung cuarpar tannak kha kan zohkhenh peng lai.

Israel mi hna nih Gilgal ah an cuarpar an tan dih hnu ahkhan, thil a hung cang thanmi cu, Bawipa cu Joshua sinah a lang. Joshua 5:13-15 chungah, “Joshua cu Jeriko khua pawng a um tikah, mipa pakhat a vainam zuh ci ain a dir, Joshua cu a sinah a va kal i amah cu, ‘kanmah caah maw na si, kan ral hna caah dah na si?’ tiah a ti. Cun anih nih, ‘si hlah, sihmanhselaw Bawipa ralkap hruaitu in ka ra,’ tiah a ti. Cun Joshua cu vawlei ah a bok i a biak i, ‘ka Bawipa nih a salpa a fialmi cu zaidah a si?’ tiah a ti. Cun Bawipa ralkapbu hruaitu nih cun Joshua sinah cun, ‘Na kedan kha i phoih hna, zeicahtiah na dirnak kha hmunthiang a si’ tiah a ti. Cun cu bangan Joshua nih a tuah”.

Israel ralkap hna nih Gilgal ah an cuarpar an i tan dih hnuah cun, tuk ding caah tlamtling tein timh cia an si cang. Timhlahm ciate an si dih hnuah cun hotu pa cu a ralkapbu hruai dingin a ra. Bawipa cu minung thuam in Joshua sinah a rak lang i Biakam Hlun chan ah Abraham le midangdang sin i alangh bantu khan a rak i langh. Moses nih hlingbur a kangmi a hmuh tikah a tuah bantu khan, Joshua zong nih cu hmun thiangan cun a kedan aa phoih ve. Bawipa nih Moses kha a ton i zeibantukin dah Israel mi hna cu a chuahter hna lai ti kha a chimh cawnpiak bantu kin, atu zongah Bawipa nih Joshua cu a ton i zeitindah Israel mi hna nih Kanan ram teinak cu an thok lai ti kha a chimh ve. An i timhlahmhnak cu a tlam a tling dih cang. Bawipa ralkapbu hotu bik cu a thawnnak he cu ni ah cun a rak i langh.

Angan 4

Kanan Teinak

(Joshua 6-12)

(Joshua 6)

Jeriko Ral An Teinak

“Cun Bawipa nih Joshua cu a chawnh i, ‘Zohhmanh, Jeriko cu a siangpahrang he a mithawng raltha hna he tiah na kut chungah kan pek cang. Khua cu nan vel lai, ralkap vialte nih hal khat an vel lai. Cun tlangbawi pasarih nih tuukawng ki muko pasarih kuang hmai ah cun an i put lai, cun nisarihnak ni ah cun khua cu voisarih nan vel lai, tlangbawi nih muko cu an tum hna lai. Cun tuukawngki cu an tum vuaimai tikah, muko aw thawng cu nan theih cangka in mi vialte cu fakpi in nan au lai, cun khua kulhnak ralhau cu a tlu lai i mi zapi cu anmah le an hmai zawn cio khan ding tein an kal lai” tiah a ti (Joshua 6:2-5).

Bawipa cu ralkapbu hotu bantuk khan a ra i, Jeriko teinak caah raltuk ding ningcang kha Joshua sinah a langhter. Zeibantuk ruahnak phundang ko dah an tuah hnga! Ralkap nih khua cu nisarih chung an vel lai i tlangbawi nih tuukawngki cu an tum lai. Ralkapbu nih an au tikah khua kulhnak vampangpi cu a cim dih lai.

Raltuknak caah hi bantuk tuaktanning hi cu tisa lei ruah ahcun hruh phung ngai a si ko. Lamkaltu Paul zong nih 1 Korin 1:25 ah hitihin a tial, “Zeicahtiah Pathiah hruhnak a si rua timi cu minung fimnak nakin a fim deuh thiamthiam i Pathian dernak a si rua timi cu minung thawnnak nakin a thawng deuh thiamthiam”. Raltuknak ah a si kho lai tiin ruah lomi khuakhannak cu Bawipa nih Joshua sinah hi biatak cu a chim. Israel ralkap hna nih cun anmah thilti khawhnak ah si loin, Pathian thawnnak le fimnak i bochan khan cawn an herh. Cuhleiah, Bawipa nih hi khuaruahhar ralteinak hi a pek hna tikah, Kanan ram siangpahrang vialte an rawknak ding cu a nai chin lengmang tiah hei thanh kha a si ko.

Kanan ralkap hna cu Israel ralkap nakcun a let in an tam deuh. Annih zong nih Israel rak dohnak ding caah khua kulhnak ralhau le rangleng ralkap tampi zong an ngeih hna. Tahchunhnak ah, Hit mphun hna hi cu lio caan ah cun Nichuah Laifang siangpahrang uknak le a thawng bik pathumnak a si. Chan tampi chung Kanan, Siria le Asia peng cu an uk dih ngawt ko i Babilon le Izipt lawng hi an tang ti ding khi a si. Hit mphun le a dang Kanan ram ralkap hna cu hiti tisa lei ralkap dirhmun in zoh ahcun Israel ralkap hna kha cu an lonh deuh ngaingai hna. Sihmanhselaw, pakhat an hngalhmi cu a nungmi Pathian thawnnak hi cu a tluktu le a zuamcawh khotu an um lo ti hi a si! Jordan tiva kha khuaruahhar thil in aa then i Jeriko kulhnak vampang zong a cimh dih hnu cun, Joshua ralkap hna cu chiandeuh bantukin an ral a thatning an hmuh tikah cun Kanan ralkap hna cu Pathian thinnak in an khat i an tha a zor dih. Annih nih thlarau lei dirhmun in raldohnak cu tisa lei ralkap dirhmun in i dohnak cun a tha a thawng deuh ngaingai ti kha an hngalh.

Biakam Thar Khrihfa hna zong nih Pathian pennak dirhna ahhin tisa ral hi doh a si lo i, asinain kan dohmi cu cunglei a puar thlarau le Satan thawnnak hna hi kan dohmi a si ti kha an hngalh dih. Vawlei lei cozah uknak zongah hin, khuakip thawkin ram pumpi hruaitu tiah an um bantuk khin, thlarau lei uknak zongah hin chungkhar in, kuate, khuapi le ram then ram kulh tiah an um ve. Khrih ram le khuapi hna ah thanghnak kan hmuh hlanah hi Satan uknak vialte hna hi kan thawl i kan thlak dih a hau. Bawipa nih Joshua sinah, zohhmanh, Jeriko siangpahrang le a mithawng hna cu na kut ah kan pek cang” tiah a ti bantuk khan, kannih kut zongah Bawipa nih thlarau lei siangpahrang hna le khuachia thawnnak a kan pek a si ahcun kan khua le kan ram hna zong Khrih leiah kan mer khawh dih ko lai.

A luan cangmi kum zeimawzat lioah khan Fillippin ah pastor pawl cawnpiaknak ka hruai lio hna ahhin hi bantuk thil zohchun awk pakhat ka hmuh. Cawnpiaknak a dih tikah kuzale hna caah thlacampiaknak kan ngei i, Bawipa nih minung pakhat caah biaphuan ding a ka pek. Hi pa nihhin cun an khua a uktu Satan sual siangpahrang hna kha a tem hna, cun a thawl dih hna caah thanghnak a hmuh lai tiah Bawipa nih a ka chimh.

Pastor cawnpiaknak hmun ah a rak kai venak dah ti lo, hi pa kong hi a dang zeihmanh ka hngal lo. A hnu deuh ah cun kuate ah thazaang derthawm ngai in pastor a tuanmi a si kha an ka chimh. Kum thum a hung rauh tikah cun, a Khrihfabu ahhin minung tlawmte lawng an tang. A member hi an tlawm tuk caah ningzak ngai in a um. Khuapi chungah a thang kho lomi a Khrihfabu kong hruaitu upa hna sinah report pe dingin a kal lioah

hin, Motawka cung i thla a cammi cu, Motawka tal hi accident tong selaw a thang lomi Khrihfabu kong hi zeihmanh va report than hau lo a si hnga ti hi a si.

Nautat ngai le thil tenau ngai in pastor pa nih aa hmuh lioah cun, an khua ahhin “Thawnnak in a khatmi” pa nih thlarau zumhna in damternak kha a ngeih caah mi nih an upat ngaimi a um. Satan thawnnak nih amah kha a uk caah damternak kha khuaruahhar in a tuah. Hi pa sinah hin damnak hmuh duh ah an ram chaklei in siseh hmunkip in minung kha an ra. A hrinthanmi pastor pa tu nih hin cun, a thlacampiaknak thawngin a dammi ahohmanh a hmu bal hna lo. Hi bantukin thachia ngai in um ko hmanhsehlaw a rian ahkhan zumhtlak tein a um ko i thla a cam ko. Pastor cawnpiak lioah Bawipa nih a sinah bia a chim hnu khan, Satan a thur thlarau hna cu an khua khan a tem a thawl dih hna, cun pastor pa cu inn ah a tlung i Bawipa nih thil lianngan a tuahmi kha hmuh a duh ngaingai. Zarhpi zing a phungchimmi cu a thar in hmual a ngei ngaingai, a rak i pum tharmi pa nih khamhna kha an i pumh chungah a cohlan. Pastor pa le zumtu dang hna nih mizaw hna damnak ding caah thlacam an hun thok tikah cun, Pathian thawnnak in mizaw nih damnak an co kha an hmuh. Thla thum chungah Khrihfabu cu a thang tuk i aa thleng tharmi 80 reng lo kha tipilnak a pek hna i kum saupi amah a rak dohtu zong kha an hung i thleng ve cang.

Sihmanhselaw, hi khua ah thanghna a um khawhna hi cu an khua ah a ummi thlarau lei in damnak a tuahmi pa kong a theihna kha a si. Cu zumhna in damtertu pa nih cun a riantuannak kha a khar dih, cun ahohmanh kha a damter kho ti hna lo. Lam hlapi in tangka tampi he damnak hmuh duh ah a rami hna zong kha a rak khirh hna. Damtertu pa nih a chimmi cu, thlathum hrawng khan a riantuannak cu a khar, zeicahtiah thlarau soal vialte hna cu Bawipa nih a thawl dih hna caah damter khawhna a ngeihmi vialte an lo dih. Satan pekmi thawnnak cu an lo dih i thlarau lei damter khawhna zong kha an um ti lo, van lei thawnnak nih a tei. Cu lio caan teah cun, kha khua khrihfa hna sinah khan thlarau lei thilti khawh thawnnak kha pek an si i an khua chung “Jeriko siangpahrang’ kha an kut chungah pek an si tik ahcun damnak, khamhna le thanghna a tlung.

Joshua nih Jeriko khua a tei khawhna cu, thlarau lei he aa pehtlaimi a zulh caah a si. Zeicahtiah Pathian nih a chimh mi kha a ngaih. Kannih zong Amah caah zumhtlak le timh cia in kan um a si ahcun teinak le thanghna tawhfung cu Pathian nih a kan pek ko lai. Joshua le a ralkap hna nih hmasa bik ah Jeriko khua cu an vel. Bawipa nih Joshua a chimh ciami cu, “Nan ke nih alamh laimi hmuh paoh cu nanmah kan pek cang hna” (Joshua 1:3) ti hi a si. “Ram ngiathlai ding ca le” lamkal buin thla na camnak asiloah, ‘Jeriko ah kal’ dingin naa thawh ahcun Bawipa nih hi bantuk biakamnak cu na tei khawhna ding caah an pek ve ko lai.

Joshua le a ralkap hna nih nisarih chung khua hel kha an peh. Pasarih hi Cathiang chungah numbar tlamtlinnak caah kan hmuh. Elijah nih voisarih thla a cam tikah ruahsurnak dingah khuadawm kha a hung chuak i Naman zong a damnak ding caah Jordan Tiva chungah voisarih aa hnim ve. Hi nih a kan hmuh sakmi cu kannih zong thlarau hruai in kan kal ti lawng si loin teinak ding caah Bawipa nih a kan fialmi kan tuah lawng si loin, kan rian aa lim hlan lo paoh him tein kan um ding a si. Rawk ral lo tein um timi hi teinak ding tawhfung caah a biapi tukmi a si caah voinga le voiruk a tlin ko zongah sung cu pe hlah.

Joshua nih a ralkap hna cu an vel chung vialte dai tein nan um lai tiah nawl a pek hna (Joshua 6:10). Kannih zong thlarau ral kan doh liopi ahhin, teinak a kan sunghter tawntu kan palhna bik cu kan holh a tam tuk tawnmi hi a si. Thangchiatnak le soiselnak nihhin zumhna hi rianrang tein a dertter i mithiang hna nih an biachimmi kha an i ralrin lo ahcun thinlung dihlakin Khrihfabu caah an tuanmi zong hi chikkhatte ah a rawk dih ko.

Nisarihna ni ah tlangbawi hna nih tuuki an hun tum vuaimai i ralkap pawl an au tikah cun teinak an hmuh. Hi thil hna zong hi thlarau leiah thil biapi le sullam ngei ngai a si. Number 10:9 chungah Israel mi hna nih ral an doh tikah, tlangbawi hna nih muko kha an tum lai i Bawipa nih a hngalh hna lai i a khamh hna lai. Hi bantukte hin mi nih cun muko bantukin Bawipa riantuantu hna nih cun muko bantukin Bawipa sinah thla an campiak hna lai (1 Samuel 7:7-10)

Timhlahm vialte kha timhcia a si dih tikah cun, Joshua 6:20 nih, “Cucaah mi cu an au i muko cu tum an si. Mi nih muko thawng cu an theih cangka tein mi cu fakpi in an au i ralhau cu a tlu, cucaah anmah le an hmai zawn cio khan mi cu khuachung ahkhan an hung lut i khua cu an lak” tiah a kan chimh. Khua kha an vel i muko cu an tum tikah, ralkap vialte nih teinak aw thangpi in an au. Hi teinak in aumi hi nihin kan caah thlarau

raldohnak ahhin a biapi tuk hringhranmi a si.

Hi teinak au thawng hi Hebru holh ah cun teruwah ti a si i ruwa in a rami biafang a si. Thangpi in au khi an chim duhmi a si i raldohnak asiloah i pumhnak hmun ah an hmanmi a si. Hi aunak nihhin zumhnak kha a hei thlah dih i Pathian kut nih rian a tuan. 2 Chanrelnak 13:15 chungah kan hmuh rihmi cu, “Khi tikah Judah mi hna cu raldohnak au khan an au. Cun Judah mi kha an au tikah Pathian nih Jeroboam le Israel mi vialte kha Abijah le Judah mi hna hmai ah a sunghter hna” ti hi a si.

Siangpahrang David zong nih aunak nih teinak thawnnak a ngeih zia hi raltuknak ca lawngah si loin, biakinn chungah Bawipa hmaikawlnak ca zongah a si zia hi fiangte in a hngalh. A ral hna ralkapbu nih amah doh awk ah an i timhlahmnak kha Salm 27 chungah “Ralkapbu nganpi nih ka kulh hna hmanhsehlaw ka thin a phang lai lo, ka ral nih ka doh hna hmanhsehlaw ... “tiah a ti. A ral hna doh dingin a kal hlanah biakinn chungah Bawipa kha a ton tikah zumhnak in ral teinak kha ahme paruk ah David nih hitihin a phuan, “Cucaah ka velchum i a ummi ka ral cu ka tei hna lai. Lunglawmhnak au thawng he a biakinn chungah ka raithawinak cu ka pek chanh lai; hla ka sa lai i Bawipa cu ka thangthat lai! Hi lunglawmh raithawinak timi hi Hebru holh ah cun ‘teruwah raithawinak’ asiloah, lunglawmhnak aunak in teinak ti a si.

Joshua, Abijah le David nihhin thangpi aunak in zumhnak kha Bawipa hmaiah an thlah dih tikah an ral kha an tei hna. Cu hleiah, David nih cun ral tuknak hmun lawng hmanh ah si loin, lunglawmhnak au thawng he biakinn chungah Bawipa hmai cu a kawl.

Thlarau ral kan doh caan ahhin zumhnak in au ding a si tiah Bawipa nih cawnpiak a kan duh. Kan thangthatnak le kan biakinn hmun ah kan tuah ding a si. Voi tampi cu pumhnak ah mi pakhatkhat nih Bawipa kha a thangthat i, “Halelujah! Bawipa cu thangthat si ko seh” tiah thanuam ngai in a au tikah cun teinak le chiti toiinnak cu a thar in a hung luang than. Thlacammak le pum peknak hmun hna ahhin teinak he thangpi in kan au caan hna hi a um tawn. Hi bantukin lunglawmhnak he kan au tikah cun zumhnak le chitu thuhnak kha a luang than i Bawipa cu kan sinah a cawlcang than tawn. “Pathia cu a bawithutdan cunah cun a hung kai; Bawipa a hung kai lio ah cun lawmhnak au thawng le muko tum thawng a thang” tiah Salm 47:5 chungah a langhter.

Hruhnak phungah ruahmi Pathian cawnpiaknak kha Joshua anih a zulh tikah Jeriko kha a doh i a tei bantukin, kannih zong nih vancung lei raldohning hi kan zulh awk a si ve hnga lo maw? 2 Korin 10:4 ah cun, “Raldohnak i kan hmanmi hriamnam cu vawlei cung hriamnam an si lo, Pathian hriamnam tu kha an si”. Raldohnak caah Bawipa hriamnam kha kan hman a si ahcun, kan inn chungkhar, kan Khrihfabu, kan khua le kan ram dihlakah hin teinak lianngan cu kan hmuh ko lai.

Joshua Dal 7

Ai Ah An Sung

Hi aa dawh ngaingaimi teinak an hmuh hnuah, Joshua le a ralkap hna nih an tuk thanmi khua cu Ai khua hmete a si. “Joshua nih Jeriko in Bethel nichuah lei i a ummi Beth-aven pawng i a ummi Ai khua ah mi a hei thlah hna i, “Hung kal u law, ram cu hung thlingthla tuah u,” tiah a ti hna. Cun mi cu an hung kal i Ai cu an hung ngiatthlai. Cun Joshua sinah an rung kir i a sinah, “Mi vialte cu kalter hna hlah, Sihmanhsehlaw thonghni thongthum tluk hung kal hna sehlah Ai cu hung chim hna seh. Mi zapi cu an ningpi in khika ah an re hung theihter awk a si lo, zeicahtiah tlawmte lawng an si ko” tiah an ti. Cucaah mi zapi chungin thongthum tluk an hung kal i Ai khuami hna hmaiah an zam len ai, cun Ai khuami nih sawmthum le paruk tluk an rak thah hna i kutka hmailei ah Sherabim tiangin an daw hna i zuanchuknak ahkhan an thah hna. Cun mi zapi cu an thin a phang i ti bantuk an si” (Joshua 7:2-5) tiah kan hmuh.

Fak ngai in Jeriko an tei hnuah, Israel mi pawl cu an i porhlah ngai. Mah le mah zumhraiinnak thar an hun ngeih tikah Ai khua hmete dohnak dingah hin cun thate timhlahmnak an ngei ti lo. Joshua lebang cu a lung a dong tuk i ahme pasarih ah, “Aize, maw Bawipa Pathian, kannih cu hrawh awk men i Amor mi kut chung i pek awk ah zeicahdah hi mi hna cu Jordan tiva ral ah na kalpi hna? Jordan tiva ral i khua rak sak kha kan lung rak tling ko sehlah mu!” tiah a ti.

Cun Bawipa nih Joshua sinah a chim thanmi cu, hiti an sunghter chah cu riahbuk chung i sualnak

ruangah a si tiah a hme 11 chungah cun, “Israel nih a soal cang; nawl ka pekmi hna ka biakamnak cu an buar cang. Pekchanhmi thil cu tlawmpal an i lak, an fir i lih an chim i an thil sinah an chiah hna. Cucaah Israel mi nih an ral hna hmai ah an dir kho lo” tiah a ti. Israel ralkap lakah pakhat nih Jeriko an hrawh lioah khan Pathian chimh cawnpiaknak kha zul loin hranchaw cheukhat kha aa fir diam ko. Hi soalnak ruangah hin, Ai ralkap hna he an i dohnak ahkhan Israel mi hna cu Bawipa nih a bawm duh hna lo.

Hi bantuk thil a hung ummi ahhin i pehtlaihnak ah lenglang misual tlawmte asiloah, soal i thuhnak hi biapi tuk a rak si ti kha kan hmuh. Ralkap pakhat soal ruangah raltuknak ah ralkap tampi an lo. Hi bantuk phunglam hi a caan ah cun chungkhar, riantuannak, Khrihfabu le bu chung zongah thil a lungmi kan hmuh khawh. Mi pakhat soal thuh ruangah mi tampi cung i harnak tlun ding kha Bawipa nih a onh ko. Soalnak cu thilnu he aa lo, cucaah Baibal chungah ralrinnak kha voihnih a pek. “Thilnu tlawmte nih changvut nawnmi cu a ningpi in a thawhter” (1 Korin 5:6, Kalati 5:9). Soalnak hi kan i ralrin ngai a herh, zeicahtiah duhsah tein a karh i Pathian mi hna zong kha a hrawh khawh ko hna.

Hi bantukin harnak an ton caah, ahme 14 ahkhan Bawipa nih Joshua sinah, “Cucaah zinglei ah nan phun nan phun in a naih ah ratpi nan si lai; cun Bawipa nih a lakmi phun cu nan chung nan chung in a naih ah nan ra lai; cun Bawipa nih a lakmi inn chungkhar cu a mi a mi in a naih ah nan ra lai” tiah a ti. Hi bantuk auhnak hi Bawipa nih hmasa bikah phun in a si i, cun inn chungkhar ah, a donghnak ah cun soal a tuhmi mipa kha a si lai. Hi tuanbia ningin chim lo zongah Joshua nih kha bantuk minung hmuh khawhnak lam cu a ngei ko. Biakam Hlun ah phunhnhin in a um i, cawmcawh fung zuh, asiloah Tlangbawi Ngan hna nih Urim le Thummin kha an hman hna.

Camcawh fung zuh hi hman a si ahcun lung kha an hrilh. Camcawh fung a zukmi paoh kha Pathian nih a thimmi cu an si (Phungthluk 16:33). Hi phunglam hi Biakam Hlun caan zongah khan an hman ko. Lamkaltu angan pakhat chung zongah zultu hmasa hna nih an rak hman ve. Sihmanhselaw Penticost ni hnu ahkhan cun hi bantuk phun an hmanna hi cathiang chungah kan hmu ti lo. Zeiruangah dah tiah cun Thiang Thlarau hi mithiang hna kha biatak chungah hruai dingin pek kan si. Nihin ni ah kannih cu thlarau in a kan hruai i camcawh fung a zukmi kan si ti lo.

Hruaining dang phunkhat cu Tlangbawi Ngan nih Urim le Thummin hmangin ruahnak i cheuh hi a si. Israel mi hna hruaitu a thar caah Moses nih a fehter tikah khan hi bantuk hruaining hi Joshua kha Bawipa nih amah bing tein a pekmi a si. Number 27:18-21 chung kan rel tikah, “Cun Bawipa nih Moses cu, ‘Nun fapa Joshua, ruahnak a ngei ngaingaimi kha la law a cungh na kut chuang tuah; tlangbawi Eleazar le mibu a dihlak hmai ahkhan dirter law, an mit hmuh ah nawlgeihnak kha pe tuah ... cun tlangbawi Eleazar hmai ahkhan a dir lai i, amah nih Bawipa hmaiah Urim in bia a halpiak lai” tiah kan hmuh.

Urim le Thummin hi an hmanna hmun dangah fiangte in kan hmu ti lo, cathiang nih a kan chimhmi cu tlangbawi hna nih Bawipa umnak chung i a vung luh tikah annih cu a tang cungh khan an um lai tiah a ti (Exodus 28:30). Annih cu lungtlap pahnih sidawh an si i, tangphaw ah benh chih dawh an si fawn. Pathian nih a thimmi kha ‘a si’ ‘a si lo’ tiah fiantertu an si. Tlangbawi Ngan nih thlarau hruainak in a hmaanmi lam hmuhsak kha Joshua angan pasarih zoh tikah hmuh khawh a si.

Joshua chan lio bantuk khan, atu kan chan zongah hin Pathian mi hna lakah soal thupphengmi a um a si ahcun phuan i thial dih a hau. Atu ah cun kannih zong hi Pathian tlangbawi kan si cang i harnak a simi hrimhrim kha kenkawinak ding caah langhnak le hruainak kha kan hmuh a herh. Pathian bia lehnak kha an thim khawhnak lei tlangbawi hna tang cungh a ummi bantuk kha kannih zong thlarau tette khannak in Pathian lamhruainak kan hngalh a herh ve.

Upa nawn a si cangmi Pathian mi pakhat nih, “Ruah hnu dung” tiah auhmi 1950 kum thanghnak kong he pehtlai in hi biatak kha a rak ka chimh bal. Amah cu Khrihfabu pakhat ah pastor a si i member thong tampi a ngei i hi thanghnak ah aa telmi an si. Voikhat cu an i pumhnak ahkhan profet pakhat hi hmaiah a hung chuak i zapi lakah a soal aa thupmi riantuantu kha a thu ve. Pastor pa cu pulpit hnulei i a thutnak khan thla a cam. Orh lei in keh lei ah mi zapi cu a hun zoh hna. A hmuhnak cu a laicer in kehlei kap kha a hung phan, a lungthin chungah cun kehlei kha hei zoh chap lo ding khin a um. Cucaah orhlei kam tu kha a hei zoh than, cun kehlei ah, orhlei ah a zoh than, bi deuhdeuh in a mit cu a vaih i aa ruang tein bi deuhdeuh in a thui chin lengmang. A

donghnak ah thlarau nih tette a khan tiah a hmuhmi cu zapi lak i a laifang tlar zawnte khi a si. Cuka zawn tlar cu fek tein a hei zoh tikah, aa thokka i a tuah bantuk khan zapi tonnak a hmai bik tlar kha a zoh i cun a hnu tlarah a kal than. Hnulei tlar a phak hlan deuh ahkhan, lam kaa palh rua tiah a ruah. Cucaah hmailei tlar zoh kha a thok than. A lungthin chungin thlarau hruainak kha a zulh tikah, zapi thutnak a laifang zawn kha duhsah tein a phan. Mi pakhat a thu komi kha a hmuh i, hi pa kong hi Bawipa nih a chimhmi a si tiah a hmuh. A tum hnuah cu pa sinah cun a va kal i bia a va chimh, sual ah a tlumi riantuantu ka si tiah cu pa nih a sual aa phuan. Cu khualpa cua sual ngaihchih in a tap, zicahtiah hi pastor pa hi Joshua bantuk khan, “Riah buk chungah sualnak” fiang hlang tein a sawh khotu a si.

Tahchunhnak dang ka hmuh than rihmi cu, Khrihfabu 50 hawikomhnak ah director ka rak tuan lioah hin Bawipa nih sualnak kha fianghlang tein a langhtermi a rak um. Pastor pakhat nih a Khrihfabu cu sungh zatlaknak he a rak chuah tak. Hruaitu tampi he an harsatnak kha zeidah a si ti hmuh kan i zuam bu he ruahnak kan rak cheuh. A lung a dong ngaimi pastor pa nih sonhtarhnak bia tampi a chim, asinain ka chunglei thlarau nun ah an harnak taktak hi kan hmu kho lai lo ti ka hngalh. Caan sau nawn hnu ahkhin ka thinlung chungah bia aa chimmi cu, hi kan unau pa hi a mit a caw, zeicahtiah thlarau lei i langhnak a ngeihmi kha a hloh dimdiam ko. Cuticun keimah le keimah kha a mit a caw hrimhrim ko tiah ka ti i Thiang Thlarau nih a ran khawh chungin “Samson bantukin a mit a caw” tiah ka thinlungah a ka hngalhter. Hi kong he pehtlai in caan saupi thla ka hun cam tikah, hi pastor pa nih harnak a ngeihmi thil tak i Samson ngeihmi he aa khatmi nu le pa sualnak kha a rak si ko. Cuka zawnte cu kaa lak i ruahnak i cheuhnak cu kan ngol hnuah cu pa cu ka thawh i, “Unau, na harnak taktak hi cu nu le pa sualnak na tuah caah a si ko lo maw” tiah ka hun ti. Lau tuk buin a hun ka zoh i, “Ahodah an chim?” tiah a ti. Pathian nih a ka chimh, zeicahtiah Pathian nih an dawt i hi sualnak hin luatter an duh caah a si. Hi zawnte hin mino pa cu a kekkuai dih i a sual kha aa phuang i sual chirnak a ngei. Cu ni ah cun Bawipa he an i tong than i a nun kha aa thleng i hrimh thannak caan kha a hung dih tikah kum tampi chung a riantuannak cu thei a tlai than.

Pathian lamhruainak in a Akhan timi ralkap pa kha Joshua nih a hun thlur. Akhan nih a sual aa phuan i a fir thil an lak hnu ah kan relmi cu, “Cun Joshua le Israel mi vialte nih Terah fapa Akhan cu ngaun, puan, suitlang, a fapa hna, a fanu hna, a cawtum hna, a laa hna, a tuu hna, a thlam le a ngeihmi vialte cu an lak hna i Akhor Nelrawn ah an hun kalpi hna. Cun Joshua nih, “Zeicahdah kan cungah harnak na tlungter? Nihin ah Bawipa nih na cungah harnak a tlunter ve” tiah a ti. Cun Israel mi vialte nih lung in an cheh; mei in an khangh hna i lung in an cheh hna. Cun nihin tiangin a ummi lung pumh nganpi pakhat a cungah cun an pumh; cun Bawipa cu a kangh in a kangmi a thinhunnak cun a mer. Cucaah cun nihin tiangin cuka hmun cu Akhor Nelrawn tiah ti a si” (Joshua 7:24-26).

Hi biaceihnak hmangin Bawipa nih sualnak cu Israel mi hna sin khan a thial dih cang. An thinlung ah Pathian tihnak kha a um cang caah sual tuah than kha cu an ngamh ti lo! Akhan lung in an chehnak nelrawn min cu Akhor tiah an ti i a sullam cu “Harnak horkuang” tinak a si. Hi harnak horkuang nih a langhtermi cu Israel mi vialte cu sualnak in thenh an si tinak a si.

Kum zabu tampi a liam hnuah Israel mi hna sualnak cu thenhpiak awk ah Pathian nih harnak horkuang ah a ratpi than hna lai ti kha Profet Hosea nih a chim. Hosea 2:14-15 chungah, “Sihmanhselaw atu cu ngai hmanh, ka leem than lai i ramlak ah cun ka kalpi lai i ka hnemh lai. Khika ah a mitsur dum cu ka pek than lai, harnak horkuang cu ruahchannak kutka ah ka ser lai i Izipt ram in a chuah i a no lio bantuk khan khika ah a ka leh lai.”

Hi Cathiang chungah hin Bawipa nih a mi hna cu harnak horkuang khan a leem than hna lai i ramlakah a kalpi than te hna lai tiah kan hmuh. Kum tampi lio ahkhan Bawipa nih hika zawn Cathiang hi kan nupa toidornak le thianhlimnak kan herh lio caan ah a rak kan pek bal. Hi Baibal caang nih a kan chimhmi cu hi harnak horkuang hi Pathian nih ruahchannak innka caah a rak sermi a si! Hi bantuk thil kan ton tikah Bawipa nih mitsur dum kha a kan pek lai i rian kan tuanmi cu theipar a chuak kho lai. Kan thinlung kha aa thleng kho lai i hrinthan hmasa kan rak si bantuk khan lunglawm in hla kan sa kho lai. Bawipa he kan i hawikomhnak cu a thuk chin lengmang lai i Hosea 2:16 chung bantuk khan, “Khrih ni ah cun, ‘ka va’ a ka ti lai i ‘Baal’ a ka ti ti lai

lo” a ti bantuk kha kan si cang lai. Hi horkuang tonmi thil nihhin a kan thlen cang i a phungcaang men sawhsawh cun Bawipa rian cu kan tuan ti lai lo. Cunak hmanh cun, amah he kan i hawikomhnak cu dawtnak khan hram bunhmi a si caah amah cu kan va a si lai. Asi, Pathian he naih tein kan kalti khawhnak ding caah hi harnak horkuang thil tonmi hi Bawipa nih a caancaan ah cun a hman theu tawn. Cunak hmanh cun, rianrang tein tlang kan chuah khawhnak dingah hmunrawn horkuang hi kan tan theu tawn!

Joshua Angan 8 Ai Khua Teinak

Ahun changtu a ngan chungah hin Akhor horkuang cu tinhmi ngei in Bawipa nih a hman. Ruahchannak innka ah a hung cang i Pathian mi hna cu lunglawmhnak he teinak an hmu kho than.

Ahme pakhat ah kan hmuhmi cu, “Cun Bawipa nih Joshua cu a chawnh i, ‘tih hlah, na lung zong dong hlah; ralkap vialte kha i lak hna law, tho law Ai ah cun hung kal tuah; zohhmanh, Ai khua siangpahrang cu a mi he a khua he a ram he na kut chungah kan pek cang” tiah a ti.

Angan pariat a hun thawk bak hin Ai khua cu tei a sinak kha a kan chimh. Ralkap cheukhat cu a hmai zawn in tu dingah Joshua nih a thlah hna i cheukhat nih khua a hnulei khan an rak bawh. Joshua a mi hmasa hna nih an hnulei i an kir than tikah, Ai khua mi hna nih cun an hnu in an awi hna i an khua cu an chuaktak dih. Cu le cangka in aa thupmi Joshua ralkap pawl cu an tho i kilvennak a ngei lo khua cu mei in an khangh. An khua chanh awkah a rak kir thanmi hna kha a kulhtu hna nih khan an than hna i Ai khua cu a sung dih cikcek.

Israel mi hna nih Ai khua an teinak kong cu hitihin a bia a donghter, “Cun Ai khua siangpahrang cu Joshua nih thingkung cungah zanlei tiang a thlai” (Joshua 8:29). Joshua nih a teimi hna siangpahrang tampi hna cu hiti bantuk hin an donghnak a si tawn (Joshua 10:26). Sihmanhselaw chanthar ah cun hi bantuk thingkung cung thlainak hi cu kan hmu tuk lem ti lo, a sungmi tu nih khan amah tein a hngawng ah hri in aa thlai. Ai khua siangpahrang thingkung cungah thlaimi hi vailam in tah a si ko lai. Siangpahrang tampi hna cu Joshua nih vailam ah a thlai hna, zeicahtiah chiatserh an simi hmelchunhnak caah a si (Deut. 21:22-23, Est 7:10, Ezra. 6:11).

Joshua nih a tuahmi thil hi thlarau lei hmelchunhnak nganpi a si. Joshua kha ka tei than lai tiah aa ruahmi siangpahrang soal pawl kha Pathian nih an cabuai a leh hnawh hna. Mah hi cu profet nih Joshua nakin a ngan deuhmi pakhat a ra lai tiah phuan chungmi kha a si i, amah nih cun teinak lianngan kha vailam ah a tuah lai. Kolosa 2:14-15 kan rel tikah, “Amah Khrih nih thlarau uktu hna le nawlIngeitu hna thawnnak khan aa hlitphuak, zapi zoh awk men ahkhan a ser hna”. Jesuh nih vailamtah a innak khan Satan le a hawile pawl cu an sung dih cikcek! Joshua nih Kanan siangpahrang hna cu ningzak in vailam ah a thah hna bantuk khan Khrih zong nih a sualmi vancungmi hna le an thawnnak vialte hna cu a tei dih hna i Kalvari vailam cungah khan ningzak in a tongh hna.

Hi vailamtah thawng hin kan ral pawl cu an sung dih cang tiah kan phuan khawhnak cu a si. Vailamtah cu kan cawisan i Khrih thisen cu kan thangthat ko, cu ti a rak thuh cu, Khrihfabu thawng hin vancung khua uktu vanmi hna nihhin Pathian fimnak a phunphun cu atu caan ahhin hngal hna seh ti a duh caah a si (Efisa 3:10). Kannih zong nih Bawipa nih a kan pekmi ro cu kan ke in kan lamh i kan ngeih khawhnak ding caah a si.

Zohchun awk pakhat ka hmuh than rihmi cu Khrihfabu pakhat nih Thawngtha chim an rak ka sawm lio ahhin a si. Hlan ah cun Khrihfabu thawng ngaingai an rak si i member zong tampi an rak ngei. An Khrihfabu chungah harnak thil kha a karh chin lengmang caah an khrihfa upa paruk nih an chuah tak hna. Ai khua an sungh lioah Israel mi an lung a dongh tuk bantuk khan member pawl zong an si ve. Riantuantu tampi hna nih hi Khrihfabu hna hi Pathian nih thluachuah tampi pek a duh than i a si lai tiah an ruah caah kei zong phungchim dingah kaa tim ve.

Phung ka chim lai zan ah, Khrihfabu thilri caah thlacammak ka ngei. Chikkhat ah Pathian nih langhnak kha a hun ka pek i cu biakinn chungah a sualmi vancungmi a thut ko kha ka hmuh. Hi Khrihfabu a sunghertu hi khi vancungmi khi a si ti kha ka hngalh colh. Cu ti ka hmuh tikah Khrih thisen le vailamtah teinak kha hun phuan colh khi ka duh. Khrih thisen hla kha ka hun sak i Thiang Thlarau nih biakinn leiah cerhti a hun luanter kha ka hmuh. Zekhariah 13:1 chung bantukin, “an sualnak le an thurnak vialte tlenghnak caah cerhti” tiah ti a si. Khrih

thisen kha ka thangthat deuhdeuh tikah, cerhti cu a sannak lei deuh ah a luang i sualnak le congoinhak, ziknawh einak vialte hna cu a thenh dih hna caah an biakinn cu a hlan ningte khan a hung um. Cerhti cu sang deuhdeuh in a hung luang i a donghnak ah cun Khrihfabu a uk dihtu a sualmi vancungmi bawithutdan lei kha a fuh thluahmah. Thiantertu cerhti a hung luan thluahmah lio cu thader ngai in a zoh ko i a sin a hung phak hnek tikah a thutdan cung cun lo ko in a zam.

A thaizing zingka ah cun thlacamnak in a langmi nih teinak kan hmuh lai tiah ka rak i ruah chung cang. Pathian cu zumhtlak a si caah a si kho dingah ruah ti lomi lam zongah khan thlarau khan a cawlcang i khrihabu cu lam dikah a hun mer than. Kum khat tluk ah pastor thar an hun ngei i member 100 hrawng he a thawng ngaimi Khrihfabu ah a cang than.

na ral hna nih an in tei i lungdong ngai in an in kal tak a si ahcun Ai dirhmun kha nangmah caah na hmu kho maw? Bawipa kha zoh than law, na dirhmun kha amah nih an merpiak dih ko lai! Joshua sinah a chim bang khan na caah teinak amah nih a thanh hlan lo Bawipa cu zoh peng ko. “Ai khua siangpahrang cu a mi he a khua he a ram he na kut chungah kan pek cang” tiah a ti.

Ai an tei hnuah, a ngan pakua kan zoh than tikah Israel mi hna nih Bawipa he an biakamnak kha an fehter than ti lo. Deuteronomy 27 chungah Moses nih phungbia kha hlan deuh ah a rak chimh cang hna bantuk khan, ram chung i an hun luh tikah biaktheng pakhat kha an ser lai i khangthawinak kha an tuah lai. Phungbi akha an rel dih tikah, miphun a cheu hna cu Gerizim tlang ahkhan an dir i phungbia thluachuahnak kha an au pi. Nelrawn khatlei ah miphun paruk hna nih Ebal tlang khan chiatserhnak nawlbi ahna cu an au pi ve. Hi khangthawinak hi biapi ngai in an tuah, zeicahtiah chiatserhnak le thluachuahnak cu Ai ah an ton tem cang. Hi nih a kan hngalhter vemi cu Bawipa nih amah duhnak kha ami hna nih hngal peng hna seh ti le thiang hna seh law i pumpe hna seh ti hi a duh. Amah nawl a ngaimi caah laksawng a um i a nawl a zul lomi hna zong biaceihnak nih a hngah ko hna. Israel mi thong tampi nih hi puai nganpi an tuahmi hi voihnih rat thannak caah biaphuan chungmi khi a si ko i Bawipa nih miphun hna cu kehlei le orhlei ah a then hna lai i chiatserhnak le thluachuahnak a pek hna lai (Mathai 25:31-46).

Joshua Angan 9

Gebeon mi nih an hlen hna

Kanan teinak kong he pehtlai in a hun zultu cu Israel mi hna kha Gibeon khua mi hna nih an hlennak hna hi a si. Kan hun relmi cu, “Sihmanhselaw, Gebeon khuami hna nih Joshua nih Jeriko le Ai cungah a tuahmi kha an theih tikah, annih nih cun zer ngai in an tuah; an kal i riahcaw an i ronh i an laa hna kha zongkhoi tet le a tet i a tlek i belhmi saphaw zu cu a kha an phorhter hna i a tet i belhchommi kedan an i danh i hnipuan tet tiaptuap an i aih; cun an riahcaw vialte cu a car i a buar dih. Cun Gilgal riahhmun ahkhan Joshua le Israel mi hna sinah an va kal i, “Ram hlapi in a rami kan si, cucaah kanmah he biakamnak ser u” tiah an ti. Cucaah mi hna nih cun an hun phorhmi riahcaw cu an eipi hna i Bawipa nawl kha zehmanh an ngai lo. Cun Joshua nih annih he remnak a ser i annih kha nunter dingah annih he biakamnak a ser i, cun aa pummi hruaitu hna nih annih sinah chiat an ser. Annih nih an sin i biakamnak an ser hnu nithum ah an pawng ummi an si le an lak i an i cawh kha an theih.” (Joshua 9:3-6, 14-16).

Gibeon mi hna nih Israel ral nih an kan chim a si ahcun kan rawl dih cikcek lai ti kha an hmuh. Cucaah hi rawknak hin zeitindah kan luat khawhnak a si hnga ti khua an ruat. An ruahnak chuah pimi cu hlanlio phungthlukbia bang khan, “Na tuk khawh tung lo ahcun i fonh ko” ti hi a si ko. Gibeon mi hna nih Israel mi tei khawhnak lam hi cu i fonh ah a tha an ti. Cucaah lamhlapi ah a ummi kan si ti in an va hlen hna.

Gibeon mi hna nih Joshua sin i an rat tikah khan angki tet le riahcaw buar kha an i ken. Joshua le Israel hruaitu upa hna cu ram hlapi in a rami kan si caah nanmah he kan tangti lai ti in an hlen hna.

A zeimaw caan ahhin cun kan ral hna zong hi kan hmai zawn theng hin an ra lem lo. Gebeon mi hna bantuk hin kanmah he a tangtimi hawikom bantuk tehna hin an ra ko. A thami project cheukhat hna ah cun kanmah he tuanti ding khin an i umter i Ezra 4 chungah biakinn sak thannak ding caah Judah cu a ral pawl nih bawmh kan in duh an ti bantuk kha a si ko. Filipi khua ah Paul le a hawile kha khuachia ukmi nu nih an hnu in

a zulh peng hna bantuk khan, kanmah phu zongah i pehtlai duh phun in an i umter tawn. Hi nute zong nihhin mi zapi sinah, “Hi hna hi Cung Nung Bik Pathian sal an si i anmah nihhin zeitindah khamh nan si khawh lainak kha an in thanh hna” (Lamkaltu 16:17) tiah an thawngpang cu a that khawh chungin aa chim sek ko. Lamkaltu Paul nih 2 Korin 11:14 chungah ralrin a kan pekmi cu Satan zong hi a caan ah cun ceunak vancungmi aa lawhter tiah a ti.

A chelcaan ah cun aa zuam ngaimi hna nihhin an chawva in siseh an thazaang zongin Khrihfabu kha bawmh an i tim ngai. Asinain an cawlcanghning taktak hi cu a chia tuk. Pathian a zum lomi tlangvalpa nih khrihfa ngaknu he an i uar chung cu Khrihfa bantuk te hin a cawlcang ve. Thlarau mi ngai bantukin bia a phuangmi le riantuantu tha he pehtlaih a duhmi minung pawl kha ka hmuh tawn hna. Sihmanhselaw, thlarau sual kha an ngei i Pathian rian kha a thli in a chung i luh hnawh i uk kha an i zuam! Tanti kan i timh a si ahcun kan i ralrin ngaingai a herh, zeicahtiah hi bantuk nih a kan uk a si ahcun Pathian nih kan nunnak le kan rian caah tinhmi a kan ngeihpiakmi kha kan tloh dih ko lai.

Joshua le Israel hruaitu upa hna nih an sungnak a chan cu ahme 14 ah kan hmuh bantukin, “Bawipa aw-ka zeihmanh a ngai lo” ti hi a si. Gibeon mi hna nih tangti dingin an hun chimhmi he pehtlai in Pathian lamhruainak kha an kaw lo. a phichuak cu Bawipa min in biakamnak kha an tuah i tlawmpal hnu ah cun an hlen hna kha an hngalh! A biapi bikmi cu tantinak ding caah siseh, i pehtlaihnak ding ca zongah biakamnak tuah tikah hin Bawipa sin in biafiang kan theih khawhnak lai kan cawn a herh. Hngalh a harmi thil hna le a si taktakmi thil kan hngalh khawhnak ding hi cu a rak tlawm tuk tawn ko. Harnak le rawknak a chuahtertu thil kan hrial khawhnak ding lam pakhat te cu hi rian kong ahhin Bawipa nih chimh a kan duhmi kan theih khawh ding lawng kha a si ko. Biakhiahnak tuah cang hnu ah fawizaang tukin ‘palh sualmi a si’ ti in lo diam kal ding a si lo (Phungchimtu 5:4-6; Salm 15:4). Tangti dingin biakhiah cang hnu ahcun pehzulh thai ding a si. Tahchunhnak ah, thit-umh lehthah ni i biakammi cu thih ni tiang tem chih a si.

Israel mi hna nih Gibeon mi hna he tangti dingin biakamnak an tuah cang hnu ah, thah an duh than hna. Joshua le hruaitu upa hna nih anmah he biakamnak Bawipa min in an tuah cangmi cu hrawh khawh a si ti lo ti kha an hngalh. Israel mi hna biakamnak an tuah ciami cu Pathian nih a tlaihpik hna i kum 400 a rauh hnu ah Saul siangpahrang nih Gibeon mi hna cu hloh aa zuam hna. 2 Samuel 21:1-2 kan rel tikah cun, “David caan lioah cun kum thum chung aa peh lengmang in mangtam a tlung i David nih Bawipa hmai kha a kaw. Cun Bawipa nih, “Saul le a chungkhar cunghah thisen chuah mawhnak a um caah a si, zeicahtiah Gibeon mi kha a thah hna” tiah a ti. Cucaah siangpahrang nih Gibeon mi kha a auh hna. Gibeon mi cu Israel mi an si lo. Amor mi a taangmi kha an si. Israel mi nih kan in zuah ko hna lai ti in an sinah chiat an rak ser nain, Israel mi le Judah mi hna ca i a tan tuknak ah Saul nih khan thah awk ah a rak kaw hna” tiah kan hmuh.

Joshua le Israel mi hna hruaitu upa hna nih Gibeon mi hna he an tuahmi biakamnak hi an fim lo tuk. Exodus 23:32 chung nawlbia pekmi kha piang bakin an doh ko. Moses nih Israel mi hna cu ramdang mi he biakamnak tuah lo dingin ralrinnak a rak pek hna. Voikhat tuah cang hnu ah cun, hmun thai ding a si. Siangpahrang Saul nih kum 400 a rauh hnuah hrawh aa zuam tikah, David uk lio caan ah ram chungah biaceihnak a phan. Hi nih a kan hmuhsakmi cu hruaitu pakhat nih biakamnak kha a hrawh a si ahcun hmailei caan i hruainak ah harnak a phan tawn.

Cucaah Joshua le hruaitu hna nih an biakamnak cu an zulh caah Gibeon mi hna cu an nung kho. Annih cu Israel sal ahkhan an cang i mi pakhat thil cuanh ningin biakamnak an tuahmi nih Israel mi hna caah thathnemnak a chuak. Sihmanhselaw, hi bantukin zawicawh i umnak nih hin thil dang zawicawhnak tampi kha a chuahter i ram chungah harnak kha a phan tawn.

Joshua
Kanan Thlanglei Teinak

Angan

10

Jeriko le Ai an tei hna hnuah Gibeon mi hna zong sal ah an cang. Israel mi hna nih Kanan ram cu a laicer in an tan i ram cu thenhnhah an then. Hihhi cu raltuk a thiam ngaingaimi an si, asinain hi nihhin Kanan mi hna cu fakpi in a lauter hna. Joshua 10:3-4 chungah kan relmi cu, “Cucaah Jerusalem siangpahrang Adonizedek nih

Hebron siangpahrang Hoham le Jarmuth siangpahrang Piram le Lakhish siangpahrang Japhia le Eglon siangpahrang Debir cu a cah hna i ka sinah hung ulaw ka bawm u, Gibeon cu tu u sih, Joshua le Israel mi hna he remnak a ser caah tiah a ti.”

Gibeon cu hi siangpahrang hna nih an tuk tikah, Joshua cu rak kan khamh law kan bawm tiah an hei cah. Kan rel thanmi cu, “Cucaah Joshua nih zan khuadei te Gilgal in a hung kal i hlausaphak in a paoh hna. Cun Bawipa nih Israel mi hna hmaiah cun a comcawroi loin a zamter hna i Gibeon ah cun tampi an thah hna, Beth-horon i hung kainak lam ah cun an dawi hna i Azekah le Mekkedah khua tiang an thah lengmang hna. Cun Israel mi hmai i a zaam i Beth-horon i hung kainak in an va liam lioah khin Bawipa nih Azekah tiang vancung in lung nganpipi a tlakhnawh hna i an thi. Israel mi hna nih nam in an thahmi hna nakin rial in a thimi cu an tam deuh. Bawipa nih Amor mi hna cu Israel mi hna sinah a pek hna ni ah Joshua nih Bawipa kha a chawnh i Israel mi hna mithmuh ah, “Ni Gibeon ah dir peng tuah, cun thlapa, nang, Aijalon nelrawn ah” tiah a ti. Miphun nih khan an ral hna cu phu an hlam hna hlan tiang, Ni cu a dir peng i thlapa cu a tang. Mah hihi Jashar cauk ah aa tial lo me? Ni cu van laifang ah khin a tang i nikhat pum tluk cu tlak tim loin a um. Cubantu ni, Bawipa nih minung aw a ngaih ni bantuk kha, cuhlan ah siseh cu hnu ah siseh a um bal lo; zeitintiah Bawipa nih Israel cu a dohpiak. Cun Joshua le Israel mi vialte cu an riahhmun Gilgal ah cun an kir dih than (Joshua 10:9-15).

Zeitindah Israel mi hna caah Bawipa nih a dohpiak hna i aa dawh ngaimi teinak a pek hna ti kha kan hmuh. An ral pawl ralkap hna cu dai tein an i dinh ko lioah khan, lung nganpipi a thlakhnawh hna i an thi. Hi ni caah Joshua nih bia a phuanmi cu Pathian nih a ngaihpiak caah ni cu a dir peng i a zammi hna ral pawl cu a hohmanh an luat kho lo. Bawipa thawnnak thazaang thawngin Joshua cu sang ngai in a dir ti kha kan hmuh. Moses sal le hruaitu thar lawng a si ti lo. Atu ah cun Joshua cu zumhnak a fekmi pa a si i ni le thlapa hmanh kha nawl a pe khotu profet a si cang!

Hi thil a hram thawknak le a donghnak kong kan zoh tikah Israel mi hna nih cun cu bantuk teinak sunglawi an hmuh khawh pengnak dingah bawmtu bik thil kan hmuh. Gilgal in an i thawh hnu ah ral an tuk dih zongah an rak kir thanmi hi a si. Hi a ngan 10 chungah Gilgal hi voinga tiang a telhmi kan hmuh.

Gilgal cu a hmun biapi bikah an hman tikah hin, thlarau lei biatak caah kannih philh lo ding hmun a si. Gilgal hmun ahhin Israel mi hna cu an cuarpar an tan hna. Hika hmunah thianhlimnak an tuahmi nihhin Jordan tiva an tannak le Kamhmi Ram tlamtling in an phan ti kha a langhter. Israel mi hna nih Gilgal ah umhmun an khuarmi nihhin an ral hna cungah teinak lianngan a hmuhter hna. Cu ve bantukin, Pathian thianhlimnak vel chungah kan um peng a si ahcun kan hmaika ah kan ral an sung h kha kan hmuh ko lai.

Hmunkhat ah a ummi na kha Israel mi hna nih an tei dih hna hnuah, ahme 21 chungah cun, “Israel mi a ho cung hmanh ahkhin mi pakhat hmanh nih an lei an cawlcanghter lo” tiah kan rel. Pathian tihnak cu khaka ram hrawng ahkhan a phan dih i, Israel mi hna cu ahohmanh nih an tu ngam hna in an congoih ngam hna lo. Kan pumpak ro kan co khawhnak ding caah kan doh lio ahhin hi bantuk teinak hi hmuh kan herh ve. Isaiah 54:17 ah, “Sihmanhselaw sermi hriamnam zeihmanh nih khan nangmah cu an pem kho lai lo; soal an puhtu vialte hna kha na leh khawh dih hna lai. Ka salle cu ka ven hna lai i teinak ka pek hna lai” a ti tiah kan hmuh. Thlanglei ah an chuh thlu rih lomi hmun tampi a um rih lio ahhin, Joshua nih an ral pawl thawnnak cu a hrawh thluahmah ko.

Joshua nih ral pawl siangpahrang kha a tei hna tikah, “Cun cu siangpahrang hna cu Joshua sinah an chuahpi hna tikah, Joshua nih Israel mi vialte kha a kawh hna i amah sinah a kalmi ralkap hna bawi hna sinah kha, “Rak ka neih tuah u, hi siangpahrang hna hngawng hi lam tuah hna u” tiah a ti hna. Cun Joshua nih annih sinah, nan thinphang hlah u, nan lung zong dong hlah u, thawng u law, raltha ngai in um tuah u, zeitintiah Bawipa nih nan dohmi hna nan ral vialte chungah kha bang khan a tuah lai tiah a ti. Cun a hnu ah Joshua nih a tuk hna i a thah hna i thingkung panga cungah a thlai hna. Cun thingkung cungah cun zanlei tiang an i thlai” tiah Joshua 10:24-26 ah kan hmuh.

Hmasa bik ral an teinak kong an tialmi ahhin an teimi siangpahrang panga hna an hngawng ah Joshua nih a ralkap bawi hna kha a lamhter hna. A ralbawi hawi sinah ral hna cungah tei khawhnak thawnnak kha a cheuh hna i a cawnpik hna. Biakam Thar caan zongah hi nakin tei khawhnak kha kan caah profet biaphuannak a si.

Joshua nihhin Satan kha a tei khotu Bawipa ralkapbu haotu Bawipa Jesuh Khrih kha ai a aw. Vailam tahnak khan rul lu cu a rial i Genesis 3:15 chung Messiah kong ah biaphuanmi kha tlam a tlinte. Cu pinah, Bawipa Jesuh nihkha teinak kha nan phawt ve lai tiah a kan ti. Rome 16:20 chungah, “Pathian, kan daihnak ti hna nih cun Satan kha nan ke tangah a rial tuan lai” tiah kan hmuh. Joshua ralbawi hna nih an teimi siangpahrang hna kha an lamh hna bangin, kan Bawipa zong nih Satan thawnnak kha a kan lamhter ve lai.

Mah he aa lo ngaimi tahchunh ding pakhat cu Hindu ram i phung ka va chim lioah hin, ka mang ah caw nih suk dingin a rak ka rat hnawh. Caw cu Hindu pathian hna nih an upat ngaingaimi a si bantukin, an ram ukto khuachia thawnnak hi a hmuhsaktu a si fawn. Ka mang ah cun caw cu a ra i ka ke kha a rak ka suk. Ka kedan kha phongh i khai dih aa tim. Efisa 6:15 chung i kan thlarau ralthuam kedan caah Thawngtha chim thathawnnak kha a kan hngalhter thannak a si. Hi caw nih aa zuam bikmi cu Hindu ram i thawngtha chim dingin kaa timhlahmi vialte kha hrawh dih a si. Hi thlarau raldohnak hin ka hun i hlau i thlarau in teinak ka hmuh khawnak lai suimilam pakhat chung thla ka cam. Ka it i ka hun i hngilh than. Caw nih cun chikkhat ah doh i ka kedan tam dingin a rak ka bawh ko. Thlacamnak in thawnnak ka laa than i ka kha seh dingin a rat than tikah cun, ka ke kha ka cawi i a lu kha ka rial chih!

Ni tlawmpal a rauh nuah cun hi raldohnak cu a leeng ah ka ton taktak. Hika pawnghrawng ah cun muhnhak thawnnak hi a cak tuk i aa thleng i Khrihfa ah a cangmi hi hmuh ding an um lo. An khuapi ngan bik ahhin pastor 400 hrawng cawnpiaknak kan ngei. Cawnpiaknak lei lutlaitu nih cun cawnpiaknak cu khuapi chung lam ngan bik ahkhan ca a tar i a thanh. Cawnpiaknak kan ngeih lioah cun palek bawi a ngan bik hi kan sinah a ra i, “Hika khua ahhin zeil thil dah nan tuah?” tiah thinhung ngai in a rak kan hro. Hi bantuk hi nan tuah kho lo! Na passport chung i visa kha ka hrawh than khawh. Tu zanlei ahhin ka ra than lai, tiah a ka ti. Cu dohnak cu ‘caw’ pathian nih Hindu ram in chuak seh ti a ka duhnak a si. Ka mang i ka hmuhnak hmanh khan cu raltuknak cu a ngan deuh! Cu Satan pa nawlgeihnak cu tei kho dingin thla ka cam ciammam i harnak pek awkah kan sinah a ra than ti lo. Cu cawnpiaknak ah cun teinak tampi kan hmuh, asinain ‘caw’ siangpahrang kan ke tangah chiah khawnak a kan petu cu Joshua nakin a ngan deuhmi kan ngeih caah a si.

A voihihnak teinak puai an tuahmi cu an ral siangpahrang hna Joshua nih a teimi hna kha thingkung cungah a thlai i a thahmi hna hi an si. A dang hmelchunhna ca kan hmuh thanmi cu, vailamtah teinak kha a si i hi siangpahrang sual pawl nih an khua an rak uk khawnak cu hrawh dih a si cang. A si, Bawipa Jesuh nih ral vialte cu a tei dih cang i cucu a teinak cu a salle hnanh an thanh cuahmah. Cu lawng hmanh si loin, lianhgannak he vailamtah teinak cu Khrih vawlei ah a rat i a pennak a dirh i a uk hlan lo paoh cu vawlei khuazakip ah thanh cuahmah a si ko lai.

Joshua nih hi teinak hi a hun pehzulh thluahmah i Kamhmi Ram thlanglei tiang khan a mi hna he an kal. Israel ralkap hna nih cun ram chung khuapi hna Makkesdah, Libnah, Lachish, Eglon, Hebron le Debir tiang khan an tei. Angan pahra a donghnak lei a hme 40-43 chungah cun, “Cu bangin Joshua nih ram cu a ningpi in tlang ram siseh, Negeb siseh, rawn ram siseh, tlangpang zau siseh, an siangpahrang vialte he a tei dih hna; pakhat hmanh a zuah hna lo, Bawipa Israel Pathian nih nawl a pek bang khan thaw a chuah paohpaoh a hrawh dih cikcek hna. Joshua nih annih cu Kasdesch-barnea in Gaza tiang a tei hna, Goshen ram vialte zong Gibeon tiangin Bawipa Israel Pathian nih Israel mi cu a dohpi hna caah Joshua nih hi siangpahrang vialte hna le an ram cu hmunkhat ah a lak dih hna. Cun Joshua cu amah sinah a ummi Israel mi vialte he Gilgal i an riahhmun ah cun an kir than.

Joshua Angan 11

Kanan Chaklei Teinak

Hi bantukin Israel mi hna nih teinak cu an hmu chin lengmang i Kanan ram thlanglei vialte kha an tei dih. Tam chin lengmangin an tei hna tikah Kanan mi chaklei i a ummi cheukhat cu an ralkap he an i fonh i Israel mi tei khawh ding kha an i zuam. “Cun hi kong cu Hazor siangpahrang Jabin nih a theih tikah ... Israel mi kha doh awk ah” Joshua 11:1-5 ah kan hmuh.

Tih an nunnak hi hun ruat rih hmanh. Hazor siangpahrang nih Israel mi hna doh dingin a hung cawlcang.

Hazor cu chaklei ram ahhin khua ngan bik a si i cu lioah cun minung 40,000 tluk an rak um. Raltuknak caah siseh, chawlehnak ca le hi khuapi ahhin lam nganpi pahnih aa tonnak a si. Hazor siangpahrang nih a pawngkam ram ralkap vialte kha a pumh ciammam hna i Israel mi kha doh an i tim. Pathian nih bawmh dingin bia a kambah bantukin, Joshua ralkap hna nih raltha tein an rak doh ve hna i voihnihnak a fonmi hi an tei than hna. Cuaah Joshua le a ralkap vialte hna nih cun Merom ti pawngah cun duak tiah an va pauh hna i an nam colh hna. Cun Bawipa nih annih cu Israel mi kut chungah a pek hna i an than hna i Sidon Ngan le Misrephoth-maim tiang, cun nichuah lei ah Mizpah nelrawn tiang an dawi hna; pakhat hmanh an taan ti lo tiang an thah lengmang hna” (Joshua 11:7-8). Joshua nih hi teinak cu a hun pehzulh thluahmah i chaklei ah a ummi khuapi vialte cu a hrawh dih hna.

“Cun khi caan ah Joshua cu a ra i Anak mi cu a hloh dih cikcek hna. Israel mi ram chungah Anak mi cu pakhat hmanh an tang lo; Gaza le Gath le Ashdod lawngah tlawmpal an taang” (11:21-22). Israel mi nih ram cu an tei dih tikah, miki phun a simi (Anak mi) hna zong kha Kanan ram in an hloh dih hna tiah kan hmuh. Hi miki pawl nihhin khuachia thilti khawh thawnnak kha ai an awh i hi ram chung hi an uk. Kan Bawipa Jesuh zong nih hi kong he pehtlai in Matthai 12:29 chungah, “Cu hleiah, zeitindah mi thawng pa inn cu amah kha an tem hmasa lo ah, ahonihdah an baoh khawh lai i a thilri cu an lak khawh lai?” tiah a ti. Hi miki hna le siangpahrang hna cu Israel mi hmai an rat hnu lawngah ram chungah dai tein khua an sa kho lai.

Hi miki pawl cu Filitis ram khua pathum Gaza, Fath le Ashdoh ahhin an tang i a hnuah cun Israel mi kha harnak an pek tawn hna. Kum zabu pali a hung rauh tikah, Gath i a ummi miki pakhat nihhin Filistin ralkapbu cu a hruai hna i Saul le a pennak kha an rak doh hna. Khuachia Goliath kha David nih a thah hnu lawngah Israel mi nih teinak an hmuh than. David ralkapbu chungin midang ralbawi hna zong nih a dang miki pawl hi an thah hna tiah Chanrelnak cauk chungah kan hmuh (1 Chan. 20:4-8).

Hiti bantukin ral kha an doh tikah biakamhmi ram cu Israel mi hna nih an uk khawh tiah kan hmuh. “Joshua nih cu siangpahrang hna he cun saupi an i do. Gibeon i a ummi Hiv mi hna dah ti lo cu Israel mi hna he remnak a tuahmi khua pakhat hmanh an um lo, an dihlakin raldohnak i an lakmi an si deih. Bawipa nih Moses nawl a pek bangin hrawh cikcek an sinak hnga, an lung thawnter i Israel mi hna doh cu Bawipa tuahmi a si” (Joshua 11:18-20).

Kamhmi Ram ah a rak um hmasami hna hrawh cikcek kha Pathian duhnak a si. Mi cheukhat nih cun dawtnak Pathian nih hi bantukin zaangfahnak ngei loin a tuah ngai hnga maw ti in an rua ko lai, kannih zong nih amah cu kangh a hmanhmi a thiangmi Pathian a si kha kan philh lo ding a si (Hebru 12:29). Kanan ram ah a rak um hmasami hna hi cu sualnak phun zakip in an i thurter i nu le pa sualnak, milem biaknak le that lonak phunkip kha an tuah dih. Lawkih mi a biami lebang hi cu hlawhhleng zuarnak in a khat. A fapa upa bik kha an milem sinah khanghthawinak caah an pek chanh. Hi bantuk thil sual hna in Israel mi nih an luat khawhnik ding caah a rak um hmasami hna kha an thah dihnak hna cu a si.

Mah hi hlan kum 500 lio ahkhan, Abraham nih Kanan i a rak um lioah, Noah tefa hna an taang rih ti kha Pathian nih a hngalh ko. Pathian tlangbawi Melkhizadek nih khan Jerusalem cu a rak uk (Gen. 14:18). Job le a hawile zong hika pawnghrawng ahhin an rak um. Bawipa nih Abraham sinah a rak chimmi cu, na tefa hna kha hi ram hi ka pek hna lai tiah a ti, asinain Izipt ram ah kum 400 an um hnu lawngah a si lai tiah a ti (Gen. 15:13). Hi bantuk caan sau deuh a rauhnak kong he pehtlai in Pathian nih Abraham sinah, “Amor mi hna cu dantat awktlak hrimhrim in an sual tik lawngah ka thawl hna lai” (Gen. 15:16) tiah a ti. Kanan mi hna cu Joshua le a ralkap hna nih ram kha an hun tei tikah dantat awktlak in an sual cang. Hi thil hna nihhin Pathian cu lungsau le thinfual a sinak kha kan hmuh i dinnak in bia a ceihu a si fawn. A palhmi vialte zong kha aremh dih. Sihmanhselay, Pathian caan tlin hlanah palhmi remh kha kannih nih kan rak i zuam len ding a si lo ti kha thlarau lei hngalhthiamnak kan ngeih ding hi a biapi tukmi a si. 1 Korin 4:5 chungah, “A caan a phak hlanah ahohmanh na sual na thiam va ti hna hlah u” tiah ralrin pek kan si. Pathian caan a hung phak tikah cun, ahohmanh Joshua le a ralkap hna hmaiah a dir kho an um lo i ram dihlak cu an lak ko.

Angan 11 chung a donghnak ahhin, “Cuaah Bawipa nih Moses sinah a rak chim cangmi vialte bantuk khan Joshua nih ram kha a ningpi in a lak i an phunning cio i phawtning khan Joshua nih Israel mi hna sinah ro

caah a pek hna. Cu ram cu ral in aa din” (Joshua 11:23) tiah kan hmuh. Angan hleikhat a donghnak ahhin, Israel mi cheukhat cu ram chung hmunkip ah an i thek i raldohnak thazaang cu an ngei kho ti lo. Israel mi cu ram chungah khan an hung lut i an i din kho cang.

Jordan khatlei ral i anrak um lioah khan Moses nih Israel mi hna cu, zeitintiah Bawipa nan Pathian nih an pekmi hna dinnak le ro cu nan phan rih lo” (Deut. 12:9) tiah a ti hna. Biakam Hlun hmun tampi ah kawhmi ram chung nan luh tikah cun dinhnak kha an pek hna lai tiah a ti (Deut. 12:10; 25:19; Joshua 1:15).

Lamkaltu Paul nih hi konglam hi kau deuhpi in Hebru cauk chungah a langhter. Nawl a ngai lomi paoh cu Izipt ram an phan lo tiah a kan theihter than; “Ahodah Pathian aw cu a rak thei i Pathian a rak dohmi cu an si? Moses nih Izipt ram in a chuahpimi vialte kha an si ko. Aho cunghah dah Pathian kha kum sawmli chung a thin a hun? Sualnak a tuahmi, thetse ram i a thimi hna cunghah khan a si. Pathian nih, “Ka dinhnak chungah an lut lai lo” a ti ahkhan, ahodah a ti hnawh duh chan hnga? Amah a dohtu kha a ti hnawh duh chan hna. Cucaah cun an zumh lo caah an rak luh khawh lonak kha a si ti cu kan hmuh cang” (Hebru 3:16-19).

Hebru angan pali chungah hin Biakam Thar Khrihfa hna zong, hi he aa lomi dinhnak chungah nan lut lai ti biakamnak kha pek kan si ve, “Cu dinhnak chungah cun a lu tlomi nan um sualnak hnga lo, cu dinhnak chung i nan lut kho, ti biakamnak a um lio ahhin lut kho loin kan um sual lai, tiah tih bu tein um u sih. Annih nih an rak theih bantu kha, thawngtha cu kan theih cang. Sihmanhselaw an theihmi bia kha zumhnak in an cohlan duh lo caah an caah zehmanh a thahnem lo. Cucaah, “ka thin a hung i biakam tein ka dinhnak chungah an lut hrimhrim lai lo, ka ti” timi bia nih a sawh duhmi dinhnak chungah a lut i Pathian sinah aa dinmi cu a zummi kanmah tu hi kan si, zeicahtiah Pathian cu a rian in aa dinh bantu kin Pathian dinhnak chungah a lutmi cu an rian in an i din ve” (Hebru 4:1-3, 9-10). Kanmah rianuanmi in kan thih tik lawngah Bawipa nih Khrih chungah kanmah roco ding cio kha a kan pek. Kanmah nunnak hmangin Khrih nih a tuanmi tu a si deuh. Kalati 2:20 chung i kan rel tawnmi kha a tlamtlinnak tu a si, “Kei cu khrih he vailam tahnak ahkhan thah ka si cang, cucaah a nungmi cu keimah kha ka si ti lo, ka chung i a ummi Khrih tu hi a si deuh. Atu i ka nunning hi a ka daw i ka ca i a nunnak a pemi Pathian Fapa zumhnak thawngin ka nung”. Ka nung timi hi ‘nunging thlen’ kha a si i kanmah fakpi i zumhnak le i sikthiatnak, i rem lonak in i dinhnak kha a si i Pathian pennak a simi ‘Kamhmi Ram’ chungah Khrih nun tlamtling in nunnak kha a si.

Joshua Angan 12

Teimi Siangpahrang Hna

“Mah hna hi Israel mi nih an tei i an ram an chuhmi hna cu an si” (Joshua 12:1). Kanan ram an teimi kong kha a donghnak lei ahhin kan hun langhter i, teimi siangpahrang hna zeizat an si ti tial chih an si. Moses hruainak in Israel mi hna nih Jordan nichuahlei ah siangpahrang pahnih kha an tei hna. Joshua nih siangpahrang 31 hna cu Kamhmi Ram ah a tei hna.

Hiti kan hu langhter tikah, Joshua nih a teimi siangpahrang hna he pehtlai in profet nih phuan chung a rak si cang. Annih nihhin cunglei ah a ummi a puar thlarau thawnnak kha ai an aw h i Pathian pennak vawlei ahhin thlak an si. Kannih chan zongah Bawipa nih ‘Joshua’ si dingin chiti a kan thuh ve caah, khuapi chung ram dihlak a uktu Satan khuachia thawnnak kha kan hrawh dih lai i hi ni donghnak chan ahhin thanghnak cu a tlung ko lai.

Israel mi hna nih ramcar chung i hneksaknak an tonmi hna nih aa tinhmi cu an lungthin chungah a ummi sualnak langhter nakding caah a si. Moses nih a hruaimi chan minung hna nih ai an aw hmi cu minung hlun Adam sinak kha a si i nawlbia zulhnak kha an hmuhsak. Sihmanhselaw, hi chan minung hna hi cu Joshua nih chanthar minung a hruaimi hna nih Kamhmi Ram chungah an luh hlan ahkhan an thi dih. Hi ‘Joshua chan’ minung hna nih cun Jordan tiva kha an tan hmasa bik (Khrih vailamtah hmuhsaknak) i cu hnu ah an cuarpar an tan hna (thianhlimnak). Cu hnu lawngah Kanan ram chung ummi an ral hna doh i tei dingah timhlamh an hung si cang.

Hi nihhin tuchun ni ah Khrih hnu a zultu ralkap hna caah zohchun ding thil a tangmi a si. Kan chungah a ummi ral hna hi kan tei a herh (kan titsa sinak) kan nunnak ah lenglei ral (Satan thawnnak) kan tei hlanah kan chunglei ral kan tei hmasa lai. Johan 14:30 chungah kan Bawipa Jesuh nih, “Hi vawlei uktu pa (Satan) hi a ra dengmang cang, ka cunghah nawl ingeihnak cu zehmanh a ngei lo” tiah a ti. Satan thawnnak nih kan chungah uk

kho dingin thutnak le ziknawhna hna zeihmanh a um lo tikah, kan Bawipa nih teinak a hmuh bantu kin, kannih zong nih hi vawlei ah teinak he kan nung ve cang lai.

Joshua nih a teimi hna siangpahrang kong hi tampi kan theih deuh paoh tikah kan chunglei ah kan tonmi thlarau lei raldohnak hi teinak kan hmu ve lai. Hi siangpahrang hna nih an ukmi hmun min hna nihhin thawwnak sining hna hi an langhter. 1 Samuel 25:25 nih cun, “A min bantu te hi amah cu a si ko” tiah a kan chimh. An min cheukhat hna hi cu anmah bia hram sining kan hngal dih lo nain, a cheu cu mirang in an lehmi kan hmuh. Tam deuh cu a phunphun in an leh i chanthar ah cun a sullam a phunphun in a chuak. An lehmi a tam deuh hna nihhin nihin kan chan ah thlarau lei thil sullam hna kha fiangte in a kan cawnpia k.

Hi siangpahrang hna nih an ukmi hmun hna nihhin an sual sining kha an langhter. Siangpahrang pakhat nih akh-Shaf kha a uk. Mirang holh in leh tikah, “Mawwnak siangpahrang” asiloah “Hnam ngei siangpahrang” tinak a si. Hnam ngeimi thawwnak le sual chiatserhna k nih hika hrawng hi a uk dih i cu ‘siangpahrang’ asiloah Satan thawwnak nih Pathian pennak a phanh hlan le fek tein a dir hlanah tha lo tein a hrawh tawn.

Madon siangpahrang sullam cu, “I sikthiatnak siangpahrang” tinak a si. Hi a dang sual thlarau nihhin chungkhar cungah siseh, Khrihfabu kip le khua le ram kip cungah kha a nawlgeihna kha a hman i a hrem hna. Phungthlukbia 18:19 nih cun, ‘i sik cu ralhau khar kanh bantu a si’ tiah a ti. Hi ralhau cu ahonihdah a uk? I siknak siangpahrang nih a uk! Kan Adam hlun minung sinak kha vailam tah ah kan khenh chih tikah cun, i siknak le i rem lonak nih cun a kan uk kho ti lo. Cu tikah hi a muimi siangpahrang cu kan thlak khawh lai i Khrih pennak kha a dir lai i amah nih a uk cang lai.

Hephen siangpahrang sullam cu, “ningzahnak siangpahrang’ tinak a si. Amah le Evi sualna k ruangah hmasa bik a phichuak cu ningzahnak a si (Gen. 3:7). Ningzahnak nihhin thawwnak nganpi a ngei. Cu nih cun, “Khamhna k hmai” kha a kaw l, zeicahtiah cu ningzahnak nih cun mah le i thahnak siseh ram khat le ram khat ral i tuknak tiang a chuahpi. Sihmanhselaw, Khrih chungah a ummi hna caah cun sual phawtnak a um ti lo ti a zumtu hna caah cun hi ‘ningzahnak ukto’ hi tlamtling tein an tei khawh cang.

Gezer khua sullam cu, ‘cik-tan’ tinak a si i a umtuning cu mi pakhatkhat nih Pathian nih a ka hlawt cang ti in i ruahnak hna a ngeihmi khi a si ko. Hi bantu thil a tongmi hna tampi lakah Jeremiah zong hi pakhat a si ve, zeicahtiah Tah hla a tialmi 3:54 chung nih a langhter mi cu, “Ka donghna k a phan cang” tiah a ti. Hebru holh ah kan zoh than tikah, kan Bawipa Jesuh cu ‘thah awk in bia an khiah’ tiah Isaia h 53:8 ah kan hmuh. Amah nih biaceih kan in dingmi kha a cungah a tlunter, cucaah kannih zong nih Pathian dawtnak he a kan then khotu zeital a um maw tiah kan ti khawhna k cu a si (Rom 8:38-39).

Dbir khua hi Kirjath Sannah tiah Joshua 15:49 chungah kan hmuh than, cu a sullam cu ‘Rawhna k khua’ tinak a si. Joshua nih a tei thanmi khua pakhat cu Hormah ti a si i, ‘rawhna k ah a pumpemi’ tinak a si. Hi khuapi pahnih nih a kan hngalhter thanmi cu Bawipa Jesuh nih ralrinnak a kan pekmi, “Hell ah a kalmi cu a kau i a fawi i mi tampi nih an zull” Matthai 7:13 chung bia kha a si.

Hi a cunglei i kan hun tialmi khua hna nih hin kan chunglei ah a ummi sualna k hna kha a chim duhmi a si i tei le hrawh a herh hrimmi kha a langhter duhmi a si. Sihmanhselaw, umtuning cheukhat ahhin cun va hrawh theng zong kha a hau lem lo i asinain tlanh hna a herh caan a um ve. A cheukhat hmun le umtuning ahhin Satan thawwnak nih a ukmi le a hrawh cangna k hna zong kha a rak um ve i a thami Pathian roconak hna hi pek deuh ding an si. Hi bantu thil umtuning hna le hmun tampi hna hi kannih caah ‘Kamhmi Ram’ kha an si ve i hrawh loin hmasa sining ahkhan siter than ding a si ko.

Joshua nih a teimi khuapi kong tampi kan hun cawn tikah hi bantu phunglam le riantuanna k hi kan hmuh. Cu lakah khuapi pakhat Hebron a simi cu a sullam ‘tantinak’ ti a si. Hebron tuanbia nih a kan hmuhsakmi cu tantinak ti kha a si ko i, thatnak le chiatnak kan hmuh ti. Joshua 10:3-5 chungah cun Joshua dohnak ding caah Amor mi hna kut tangah cun sual in tantinak kan hmuh. Dinnak in ukna k tang tu ah cun, David kha Hebron ah siangpahrang caah chiti an thuh i cuka ah thatnak ah tantinak pahnih kan hmuh (2 Samue 2:3-4, 5:1-4). A hnu ah Absalom nih dohnak caah tantinak hmun a kuar (2 Samuel 15:10). Hebron khua hi a ukto nih thatnak asiloah chiatnak ah maw tantinak i an hmanmi nih a ho tluk lo ro a co.

Jeriko khua min sullam cu “Rim Hmui Hmun” ti a si, ziecahtiah Balm si lakna k kung le thuhmi rimhmui

kung a khohnak hmun a si. Biakam Thar chungah thlarau lei thil in kan zoh ahcun rimhmuimi thil cu 2 Korin 3:15-16 chungah a sullam a langhternak kan hmuh. “Cucaah kannih cu Khrih nih Pathian sinah a pek chanhmi rimthaw zihmui bantukkan si, cu zihmui cu khamh lio lengmangmi hna caah cun nunnak petu rimhmu a si” tiah kan hmuh.

Jeriko khua tuanbia hi kan zoh tikah, thihnak le nunnak lam a pahnih ah hruainak kan hmuh. Joshua caan lioah thihnak hmun a si, Rahab le a chungkhar lawng hi Khrih nunnak rimhmu a comi an si. 2 Siangpahrang 2:19-22 chungah profet Elisa nih Jeriko khua i thihnak ti kha a damter i nunnak hmunah a sernak kan hmuh. Luke 19 chung kan rel a si ahcun Jeriko lam ah thi hrulh in an hliammi pa nung dam tein a um thannak kan hmuh than.

Joshua nih a tei thanmi khua cu Jerusalem a si, a sullam cu “Daihnak Hram” asiloah “Daihnak Ngeihnak” ti a si. Hi khua cu Genesis 14:18 ah kan hmuh hmasa bik i a min cu Salem tiah ti a si, “Daihnak” tinak a si. Daihnak bawi Melkhizadek kut tangah cun daihnak hmun taktak hi a rak si. David nih a rak tuk hlan ahkhan Jebus mi cu hi khua ahhin him ngai in kan um tiah an rak i ruah sualnak khua a hung si than (2 Samuel 5:6-7). Kum zabu tampi hnuah cun a dikmi he palhnak daihnak tiah a thial lengmangmi hmun a si. Jerusalem ah a dingmi siangpahrang nih uk caan le Pathian an biak tik caan paoh ah, Pathian nih a kilven i thluachuah ah daihnak zong a pek chih (Salm 122:6-7). Sihmanhselaw, Pathian a hngal lomi nih an uk i profet deu pawl nih a dik lomi daihnak kha Jerusalem caah an phuan tikah ral nih an hung chim tawn (Jeremiah 6:6, 13-14, Ezek. 13:16) Voihnih rat thannak hnu lawngah profet deu phuanmi cu a tak in a tlamtling lai i Jerusalem hin vawlei khua zakip cu Daihnak Bawi nih a uk cang lai (Isaiah 2:1-4, Zech. 14:16).

Thlarau lei roconak ah hi phungning bantuk hin Biakam Thar chung Efisa khua ah sualnak le thatnak an hman tinak hi kan hmuh. Asia ram chung khua lipi a si bantukin, i hruainak lei zongah an sang ngaingai ko. Hi bantukin i hruainak cu thlarau lei thil zongah kan hmuh i khuazingnu timi Diana an biaknak hmun ngan bik zong a si fawn (Lamkaltu 19:23-24). Rom cozah uknak tangah khuazingnu biaknak i hmun ngan bik a si caah Efisa khua cu a sualmi vancung mi pawl nih an uk tiah ti khawh a si.

Biakam Thar chan i thanghnak a hun tlun tikah cun, an khua “Hruainak Puan Zar” cu Pathian khamhnak leiah hman a si. (Lamkaltu 19:10, Biathlam 1:11). Cuka hmunah lamkaltu Paul nih Khrihfabu a hun dirh tikah cun, cuka peng hrawng i a hung dir tharmi Khrihfabu hna caah cun nuncan Khrihfabu ah a cang (Lamkaltu 19:17-20,24-27). Efisa cakuat kha hi Khrihfabu nih an hmuh i vawlei pum huap Khrihfabu caah “Siangpahrang Nu Cakuat” tiah tlangtar a si. Efesa khua Khrihfabu cu hi lio caan ah cun Biakam Thar Khrihfabu hna caah thlarau lei nu can asiloah hruaitu lu bik a si ko.

Sihmanhselaw, Efesa mithiang hna cu duhsah tein an dawt hmasami kha a lo zuahmah i Khrihfabu hi thlarau lei ah an derthawm chin lengmang (Bia. 2:1-5). Cu tikah hlanlio khuazingnu biaknak sual thawnak kha a thangocho than ve i an thlarau nun kha a uk than hna. Kum zabu tampi chung upat peknak he an khua i hruainak hna cu sualnak lei ah aa mer than. A.D 431 kum ah Rom uknak tang i a hnung tolhmi Khrihfabu hna cu Efesa khua ah biaceih khuakhannak nganpi an tuah. Rom mi Khrihfabu hruaitu hna nih “Pathian a nu” cu Mery a si ti zumhning kha Khrihfabu caah an ser i biaknak thiag ah an tuah. Hi caan thok hin Efesa khua hin khuazingnu tiah lawkih mi nih an rak biaknak cu a karh than i a hnung tolhmi Khrihfabu kha a hun uk than hna. Ram pumpi kha a cul dih i, hi lio caan lawngah hin “Khrihfa” nih khuazing nu cu an biak. Hi kong kan cawnnak thawng in Efesa khua cu thlarau lei roconak he peptlai in zohchun awk tha a si ti kha kan hmuh bantukin Khrihfabu zongah thanghnak a um i thlarau lei ro tha kha an hal than hlan lo paoh ah cun Satan nih a sualmi vancungmi hmang khan sualnak a tuah peng tiah kan hmuh. Pathian mi le fa hna zong nih an ro comi hmun ah an hmuh peng lo a si ahcun an thluachuah hmuhmi zong kha a rawk dih lai i sualnak ah an hman lai ti kha kan hmuh khawh.

Ka rak umnak Antipolo khua hi thlarau lei thluachuah hmuhnak kong he peptlai in tuchan Khrihfabu hna caah zohchun awktlak a si. Filipin ram khua ngan bik a si i Manila in hmuh khawh dihnak tlang cungah an tlakmi khua a si. Thlarau lei zong in Manila nakin ‘a sangmi hmun’ a si i kum zabu tampi chung thlarau lei hruaitu bu kip hna nih i hrimh thannak hmun le va tlonlennak ah an hmanmi khua a si.

1992 kum ah thla ka cam lioah Bawipa nih hi khua he pehtlai in langhnaak a ka pek. Miphun zakip hna cu hi Antipolo khua i khualtlawn dingah kum fatin an rat thluahmah kha ka hei hmuh hna. Cu tikah Bawipa nih Isaiah 2:2-3 kha a hun ka chimh i, a Khrihfabu hna cu biaknak hman lomi chungin ka cawithliar than hna lai tiah a ti. Ka hun hmuh than rihmi cu a hman lomi chungin ka cawithliar than hna lai tiah a ti. Ka hun hmuh than rihmi cu a hman lomi biaknak thluachuah hmu dingin Antipolo leiah kal ti loin a kir thanmi kha langhnaak ah cun ka hmuh i, asinain cu mi tampi hna le ram kip hna cu cawnpiaknak le i hruainak caah Antipolo khua hmanmi Khrihfabu ah an ra hna. Cu langhnaak ka hmuh thok cun kan mission zungpi zong hi Antipolo ah kan dirh a hau tiah ka ruah.

A luan cia kum tam nawn lio khan hi langhnaak ka hmuhmi cu Bawipa nih tlam a tlinte. Mi tampi kum fatin khual tlawngin hi khua ah an ra ti lo. An lakah mi cheukhat lawng hi atu ah cun a fawizannak in motor le Motawka hna in an ra cang. Sihmanhselaw, Baibal sianginn hna, Khrihfabu tete hna le a hrinthanmi Khrihfabu tampi kha kan umnak pawnghrawngah an hun dirh thluahmah hna. Khrihfabu hme tete riantuannak hi Bawipa nih kan khua ah hruai dingin a kan chiahpiak caah, kan Baibal sianginn hmangin cauk chuahnak le cawnpiaknak hna kha kan bawmh hna i Antipolo hi kan hmunpi ah kan ser i Asia Khrihfa hruaitu hna kha kan cawnpiak hna. Kan hnu kum khat lioah teinak dang kan hmuhmi cu Khrihfabu kip fonh in uktu hna le pastor hna kha hmunkhat pumhnaak an ngeih khawhmi hi a si. Cozah uktu hna nih Antipolo le a pawngkam khua vialte hna cu Bawipa Jesuh kut ah thlacamnak in an ap dih. Antipolo ah a ummi Khrih ah pumkhat a simi hna nih an thlacammi cu hi khua roconak cu Pathian pennak hi thlarau lei hruaitu dirhmun ah fek chin ko seh ti hi a si, Bawipa thangthat si ko seh!

Hi bantuk zohchun ding tampi kan zoh tikah, roconak phunglam hna hi khua ca lawngah si loin chungkhar dihlak ca, Khrihfabu hna, ram pumpi le pumpak ca zongah a si ti kan hmuh. Aho tluk lo laksawng hna le an kawh auhnaak hi thatnak ah siseh, chiatnak zongah anmah a uktu hna sining khan an hman khawh lai. Hi bantuk hleice ziaza hna le roconak hna hi hrawh ding cu a si lo ti tlanh ding tu a si deuh. A tang rihmi kan cauk chung cahmai tampi hna ahhin hi bantuk roconak le uknak le hmuhnak hna hi kan zoh lai i kan hmuh tung te ko lai.

Dal 5^{nak}

RAM AN THENNAK

Joshua 13-22:9)

Joshua cauk chungah then khatnak le then hnihnak kan zoh tikah Israel mi hna nih Kamhmi Ram an luhnak le an teinak kan hmuh. A then thumnak ahhin cun an miphun ning cio in ram an i thennak kha kan hmuh.

Joshua angan 12 a donghnaak lei kan zoh tikah Israel mi nih ral kha an tei dih i ram cu a ningpi in an uknak kan hmuh. Sihmanhselaw, ram cu a tei lawng khan a za rih lo. Kan uk dih i hmanter than lo kha a herh rih! Roconak, kawh auhnaak le laksawn hna nih tinh bikmi cu ngeih lawng kha a za lo i hman ding hrimhrim kha a si.

Riantuanta a si vemi Mirang pa nih hi biatak langhternak caah tuanbia a rak ka chimh balmi a um. Kum sau nawn kha an Khrihfabu nih an pawngkam i a ummi misifak bawmhnaak kha an rak tuah. Tar nawn nu pakhat hi cu Khrihfabu nih ti rawl lei in an rak bawmh. Cu nu cu a tar caah pension a hmuh khawhnaak dingah a zuampiak, cu nu a pa cu England ram mirum a rak si, a ngeihchiah kha a fanu roh ding cu a timh! Hi thil hna a hmuh tikah hin, a tangka tlawmpal cu inn le ei din ding ca hman dingin ka hawipa nih a rak forh. Cu nu nih a lehnak cu, “Ka pa cu mi tha a si ko nain mi lunghak, zaangfahnaak a ngei lomi a si. A tangka hi tongh kaa tim bal lo” ti a si. Cu nu cu a thih ni tiang sifak le zawtfah bu in cozah sakmi sifak inn ah a um. England ram mirum fanu rak si ko hmanh sehla cuti cun a ciam thai ko! Duhnak ngeih aa tim lo, sahlawh rualchan he zong um a duh lo, cucaah a thih tikah cun a pa ngeihchiah vialte cu Mirang cozah sinah a ap than dih. Mi cheu cu rocomi tam tuk an ngei ko nain hi bantukin fimhring tein an um, asinain zeihmanh hman a duh bal lomi kha an si.

Khrihfa nun ahhin, thlarau lei thluachuah hi lam tampi in pek kan si ko lai. Sihmanhselaw, pek kan simi tuanvo cu kan hman thiam i thei tampi kan tlaite a hau. A tanglei ahhin tahchunhnaak tlawmpal ka hun langhter.

Khrih nih Satan le sual thawnnaak cu a tei dih tiah Cathiang nih a kan chimh. Sihmanhselaw, kanmah nun ah hi teinak cu kan i lak lo, zeitik caan hmanh ah hi chugnah hin kan nung bal fawn lo.

Nu le pa nih Khrihfa chungkhar kan si an ti ko lai, asinain an fale kha a hmaanmi lam ah an hruai hna lo ahcun fale nih Bawipa hnu zul in an thang lai lo i an rocomi zong kha an thlau dih te ko lai.

Thanghnak nih ram cu a hninh khawh ko lai, asinain ram uktu cozah le an nunphung aa thlen lo ahcun cu thanghnak nih a chuaftermi thluachuahnak cu ram le miphun nih an tingco hlei lai lo.

Pastor nih Khrihfabu kha a dirh i, hmun thar ah rian dang i aa thial a si ahcun, Khrihfabu chung a rak um lio i Pathian lei laksawng a hmuhmi kha a lo tlaw dih ko lai

Khrihfa pakhat kha Bawipa nih pahrang asiloah laksawng a pek tikah, cu laksawng kha thahnem ngai in a hman khawh a si ahcun rel cawk loin a thang chin ko lai (Matthai 25:14-30).

Hi zohchun awk hna nih a kan hmuh sak duhmi cu tincomi le hmanna karlak ah aa dannak hna hi an si. Biakam ram kha an tei hnuah Joshua nih thil lianngan tam deuh kha a tuah. Cuti an tei hnuah, Israel mi hna an phunning in ram kha an i phaw. Israel mi hna nih an phun ningin ram kha an i phawt i an tincomi nih, umnak hmunnhna kha an ser lai, lo an thlo lai i thei tampi chuak kho dingin thilri kha an sersiam hna lai.

Hi thil hna hi Israel mi hna nih Izipt ram an chuah tak hnu caan rau lo te ah Bawipa nih umnak caah a sersiampiak hna. Ram cu tlawm tete in kan pek chap lengmang hna lai tiah Pathian nih a ti hna, zeichahtiah an comi ram cu ramcar phong i a can sualnakk hnga lo caah a si. Exodus 23:27-30 chungah, “Nanmah an dotu hna nih khan keimah cu an ka tih lai; nanmah an tutu hna kha an cungah tuainak ka tlunter lai i nan ral vialte nih khan an hnulei an in chit hna lai i an in zamtak hna lai. Ka tihunnak kha nan hmaiah ka kalter lai i Hiv mi le Kanan mi le Hit mi kha a rak dawidih hna lai. Kum khat chungah cun ka dawidih hna lai lo, zeichahtiah ram kha a lawng sual hnga. Fa tam deuh nan ngeih i ram kha nan lak khawh tiang, tlawm tete, tlawm tete in ka thawl lengmang hna lai”. Hi ruangah Joshua nih ram cu kum sarikh chungah a tei, cu hnu kum saupi hnuah Israel mi hna nih ram kha an tei chin lengmang.

Phungthluk 20:21 chungah khulrang tuk i ngeih le chiah i timh tih a nun zia ralrin peknak kan hmuh. “Thilri khon kha khulrang in na thok ahcun, a donghnak ah thlaw a chuak lai lo” tiah kan hmuh. Bawipa Jesuh nih fapa tlaw tahchunhnak hmangin hi biatak cu a langhter. Hi tuanbia chung kan zoh tikah fapa hniang nih hin a roco ding hnga cu a hal i thate hman khawh dingin aa zuam ngai ko. Sihmanhselaw caan rau lo te ah a sawksam dih ko.

Chaklei America ahhin 1940 kum le 1950 kum karlak ahhin thanghnak nganpi a rak tlung. Hi thanghnak cu “Ruah Hnudging” tiah a hnu ah cun min pek a si i Evangelist mino tampi an chuak cu Pathian thawnnak in ram tampi hna cu an hninh thluahmah ko. Hi evangelist tampi hna nih hin an chuahmi cauk cu zeitindah mi nih Pathian khuaruahhar thawnnak chungah rianrang tein a luh khawh lai ti ah cun rawlulh thlacamnak a ngeih lawngah a si lai ti hi a si. Cu thanghnak cu a hung zuang chin lengmang i hi thil tining nih hin mino tampi kha a thlenter hna i riantuantu ah an cang. Rawlulh thlacamnak na ngeih a si ahcun, “na thiang” lai i thawnnak cu na sinah an luang ko lai! Caan tlawmpal chung cu fawizaang tein thawnnak he a khatmi riantuannak cu a si ko, Sihmanhselaw kum hna cu an hung rauh deuh tikah mi tampi hna cu an ro hmuhmi fim ngai in hman thiamnak ding caah timhlahm chungnak an ngei lo. Fapa tlaw pa tuanbia kha a phunkip in nolh chih lengmang a si ko cang. Hi thanghnak ah aa telmi mi lianngan cheukhat hna cu minthan duhnak hna le zudinnak hna ah an tlu than, sual phun dangdang ah a tlumi zong an tampi. Pathian sinin thil tha kan hmu ti lawng hi a za lo i tha tein kan hman thiam ding kha cawn a herh rih. Hi kong he pehtlai in Joshua cauk then thumnak ahhin tam deuhpi in kan cawn than te lai.

Joshua Angan 13

Uk Rih Lomi Ram Hna Le Jordan Nichuah Lei Ramri Hna

“Atu cu Joshua cu a upa i a tar ngaingai cang. Bawipa nih a chonh i, “Nang cu na upa i na tar ngaingai cang, asinain co awk ram tampi a um rih. Mah hihi a tang rihmi ram cu a si; Filistin mi hna ram a dihlak le Geshur mi ram a dihlak tlangram i a ummi vialte Lebanon in Misrephoth-maim tiang, Sidon mi vialte hna cu Keimah hrimhrim nih Israel mi hna hmai in ka dawidih hna lai; nawl kan pek bantuak kha ram cu Israel mi hna sinah ro caah a cheuh bel cheu ko hna. Cucaah atu cu hi ram hi phun kua le Manasseh phun cheu hna kha ro caah cheu tuah

hna,” tiah a ti (Joshua 13:1-2,6-7).

Kamhmi Ram kha an tei dih hnuah, ram cu uk a herh lai tiah Bawipa nih Joshua kha a chimh. Israel mipahun a rak dohtu ralkap vialte hna kha tei dih an si cang i tlawmpal a tang rihmi Kanan mipahun hna zong an i thawn chin lengmang hna. Israel mipahun nih an herhmi cu ram cu a ningpi in uk dih ding kha a si. Israel phun hna cu an i thek dih lai i a rak um hmasami hna kha an thawl dih hna lai, cu tik lawngah ram chungah khan an um kho lai. Kanan mi kha an pawnuah dih hna hnu lawngah Israel mipahun cu khua an sa kho lai i ral teinak cu tlam a tling cang lai.

Hi caan thokin Jordan tiva nitlak lei ram kha Israel mipahun kua le a cheu hna cu na phawt hna lai tiah Bawipa nih Joshua kha nawl a pek. Then dang zongah ro thenh dingin phun chungmi kha Moses nih bia a kamh cang hna. Ahme 8 in 32 chungah Reuben, Gad le Manasseh phun chungin a cheu hna comi ramri kong kha tlamtling tein aa tial dih.

Hi mipahun hna nih hin Jordan Nichuah lei ram ah kan umter ko tiah Moses kha an hauh peng caah an nunnak cu a si. Sihmanhselaw, hika an um hi cu an i palh dimdiam ko, zeicahtiah hika hmun um dingin zeitikhmanhah Bawipa nih Israel mi cu a sawm bal hna lo. Bawipa duhning ah cun an dihlakin Jordan tiva hi tan dih hna seh nitlak lei Kamhmi Ram chungah hin um dih hna seh ti hi a si.

Number cauk chungah hi kong a kan chimhmi cu Jordan nichuah lei ram hi co dingah hi mipahun hna nih tuan liopi in an rak halnak kong kha a si. Kan hun rel than rihmi cu, “Cu caah Gad fapa hna le Reuben fapa hna cu Moses le tlangbawi Eleazar le mibu hruaitu hna sinah khan an ra i, Bawipa nih Israel mibu hmaiah a teimi ram hi, satil ram a si, cun na salle hna nih hin satil kan ngei tiah an ti. Cun annih nih, “Nangmah hmaiah mithmai tha kan hmuh a si ahcun, hi ram hi na sal hna cu kan coter tuah; Jordan tiva ralah cun kan kalpi hlah,” tiah an ti (Number 32:2-5). Israel mi hna nih ram kha tlamtling tein an tei khawhnak ding caah an ralkap hna cu hmaisungah an thlah hna a si ahcun Jordan nichuah lei ram ah umter dingin Moses nih a onh hna. Sihmanhselaw, Bawipa nih a hei onh ve ko hna hmanhah, Pathian duhnak tlamtling taktak cu a si lo.

Minung nih anmah duhning lam in heh tiah an hal chih peng a si ahcun, Bawipa nih a duhning a si lo bu hin a zeimaw caan ah cun tuah a onh tawn hna. Siangpahrang ngeih kha Israel mipahun nih an duh tuk caah Saul kha Bawipa nih an siangpahrang ah a pek hna ti kha kan hngalh, (1 Samuel 8:6-9). Hakkau le duhfak pa profet Balaam nih Moab ram kal kha a duh tuk tikah “Kal hlah” tiah a thlah hnu zongah, Pathian nih kalnak cu a onh ko. Asinain Balaam nawl ngaih lonak tu ah cun Pathian a thin a hung (Number 22:7-33). Ramcar chungah Israel mi hna nih rawl kongah an phunzai tikah, Bawipa nih ti cawk loim mimte cu a thlak hna nain biaceihnak an cungah a tlung (Num. 11:4-6, 31-34; Salm 106:13-15).

Luke 15 chungah fapa tlaw pa kong kha Jesuh nih a cawnpiak hna tikah hi kong zong hi a chim chih. Hi tahchunhnak bia ahhin mirum pa nih a fahniang cu a coding ro a halmi cu a pek ko, a fapa nih a rauh hlanah a hlohthlau dih te lai ti kha a pa nih cun a hngalh ko. Fapa tlaw a pa nih a kan suaipiakmi cu Pa Pathian lungput hi a si. Doh a hmang pengmi a fale hna nih anmah duh paoh kal an timh tiikah, zaangfah thiam vancung kan pa nih nawl a pek tawn hna, asinain A fale nih cun man kha tampi an pek lai i an tuh bang an zun te lai (Kalati 6:7-8).

Jordan nichuah lei ram ah um a duhmi hna phun nih an kan cawnpiakmi le ai an awelmi cu aa pumpe duh lomi Khrihfa hna Bawipa nih a fale hna pek a kan duhning zong in lak aa tim lomi kha an si. Annih halmi cu, “Jordan tiva ral ah cun kan kalpi hlah” (Number 32:5) ti hi a si. Kan hmuh cang bang khan, Jordan tiva tan nih ai a awelmi cu Khrih he vailam khenh chih hi a si. “Jordan tiva a tanmi” Khrihfa hna nih cun “Keimah duhnak si loim nangmah duhnak si ko seh” tiah Bawipa sinah an ti khawh. Sihmanhselaw, “Jordan tiva a tan ve lomi” Zumtu hna nih cun Adam he aa pehtlaimi an hlaut khawh caan te ahkhin “Keimah tein ka tuah” tiah a ti tawn. Zeicah dah hi phun hnih le a cheu nih hin Jordan tiva ral ah cun kan kalpi hlah tiah an ti hnga. Bawipa he a zungzal kal ti kha an duh lo tiknak a si ko. A si, Izipt ram zongin an chuak cang i ram car zong an tan dih ko cang. Khuaruahhar in thlarau lei thil tontemmi zong tampi an ngei ko cang i Pathian ah zumhfehnak zong an ngei cang. Sihmanhselaw, Bawipa hnu an zulh hi a sau pah ko cang i hika i kan um hi a za cang ko tiah an i ruah caah a si. Lot bantuk khan, an hmuhmi ah a tha an timi kha an i thim ai (Gen. 13:10-11; 2 Korin 5:7). Cucaah Jordan tiva nichuah lei ram kha kancoter ko tiah an halnak cu a si.

Sihmanhselaw, a fale hna caah a tha bik cu vancung kan pa nih a hngalh. A hram in a dongh tiang a hngalh dihtu nih cun hi phunhnh le a cheu hna nih cun an co hnga dingnak tlawm deuh kha an co lai ti zong a hngalh ko. Jordan tiva nih hin phundangmi hna he lawng a then hna si loin, thlarau lei thennak zong a pek hna. Joshua angan 22 ahhin hmasa bik a lang i hi nih hin hngalh sualnak hna kha a chuahpi caah anmah le anmah raldohnak zong a chuak dengmang. Hi phun hnh le a cheu hna nih an hun thancho tikah, milem biaknak lei ahkhan an tlu than i phun khat lebang cu sal ah tlah an si. 2 Siang. 10:32-33 chungah kan relmi cu, “Khi caan ahkhan Bawipa nih Israel ram a cheu a tei thluahmah hna. Jordan in nichuah leiah, Gilead ram vialte, Gad mi hna le Reuben mi hna le Manasseh mi hna ram, Arnon nelrawn pawng i a ummi Aroer thawkin, Gilead le Bashan tiang”. Hi an sunghnak hna nih a kan hmuhsakmi tahchunhnak hna cu Pathian nih a tha bik a pahnihnak ahhin cun um peng ding kan si lo ti kha a si.

Hi he aa lo ngaimi cawnpiaknak hi ahme 22 chungah ngaih nuam ngai tuanbia tawi tein a kan hmuhsak. Moses nih Midian mi hna a tuk lioah a thahmi bawi hna min kha a tial dih hnuah, kan rel thanmi cu: “Beor fapa Balaam, cathiammi zong kha Israel mi nih an thahmi hna lakah khan vainam in an thah chih ve”.

Balaam nunning hi kan zoh tikah, 2 Peter 2:16 chungah cun profet a si tiah kan hmuh. Thate in Bawipa a hngalh ko i cak ngai in profet riantuannak a tuah (Number 22-25). Sihmanhselaw, Cathiang chung Joshua 13:22 ah cun cathiam tiah auh a si i litin hmang le chiatserh hmual a ngeimi pa a si (Number 24:1; 22:6). A nunnak le a riantuannak ahhin, minthannak, rumnak le thawnnak he khan i cawhnul in a um. Sihmanhselaw, hi nih hin minthatnak le Pathian mi a si ti in a nun a donghter lo. Chiti toihnak cu a cungah a hmunh lio caan ah le a liannganmi Israel thawngin bia a rak phuan lioah cun, “Midingmi thih bantukin thi ve ning law, ka donghnak cu amah donghnak bantuk si ko seh” tiah Balaam nih a ti (Number 23:10). Sihmanhehlaw, miding mi thih bantuk cun Balaam cu a thi lo i a sualmi Midian bawi hna bantukin Moses ralkap nih an thah i a thi! Nawl a ngaih lo ruangah Pathian thinhunnak cu a alh i vancungmi nih Balaam cu ralrinnak a pek, vainam he biaceihnak cu an cungah a phan (Number 22:22-23). Israel mi hna cu milem biaknak le nu le pa sualnak in hrawh awk ah Balaam le Midian siangpahrang cu an i ceih hnu ah, vainam in biaceihnak cu an cungah a phan (Biathlam 2:14, Num. 25:1-3). Israel mi hna dohnak ding caah laksawng an pekmi kha Balaam nih aa nuamhpi lioah, Moses nih ral hna do dingin a ralkap kha a thlah hna i, Balaam cu vainam in an thah.

Cu lioah cun Balaam cu a liannganmi Pathian profet a rak si, asinain a thih lai ah cun camhthiam a si tiah Joshua cauk ah aa tial. Aa cawhnulmi a nunnak le ngaihchia a simi a thihning nih a kan cawnpiak thanmi cu, Bawipa rian hi cawh nelnul in kan tuan awk a si lo ti kha a si. Khrihfa zong milem biak a simi minthan duhnak, tangka duh tuknak le hmualngeih duhnak hna hi khuachia bawmhnak in hmuhmi a si. Khrihfa hruaitu tampi hna zong a chel caan ah cun hi bantuk tukforh hna hi an tong ve tawn i Satan nih ramcar ah Khrih a tukforh bantuk kha a si ko. Sihmanhselaw, hi bantuk cawlcanghnak nih hmuh dingmi biaceihnak le laksawng hna cu ningzahnak le ngaihchiatnak lawngte a si tawn ko.

Joshua Angan 14

Ramri Khiahnak Le Kaleb Comi Ram

Angan 14 a thoknak ahhin zeitindah a tang rihmi phun hna nih am an i cheu ti kha kan hmuh. Kan rel than rihmi cu, “Cun mah hna hi Kanan ram chungah Israel mi nih an comi ram cu an si, tlangbawi Eleazar le Nun fapa Joshua le Israel tefa hna chung i an phun cio lu hna nih an phawtmi hna cu. Bawipa nih Moses nawl a pek bangkhan phun kua le a cheu caah cun an coning cu camcawhfung zuhin a si,” (Joshua 14:1-2). Joshua Tlangbawi Ngan Eleazar le an phun cio lu hna nih an phawtning cio hna cu camcawhfung zuh in a si. Hi bantuk phung zullh in Bawipa nih ram cu a coter hna. Phungthluk 16:33 chungah, “Camcawhfung cu phei chungah hrilh a si tawn, Sihmanhselaw biakhiahnak taktak cu Bawipa sin lawnglawng in a si” tiah kan hmuh. Hi bantuk a lenglei hruainak phun hi Biakam Hlun chungin atu Lamkaltu 1:26 tiang hman peng a si ko rih. Sihmanhselaw, tuan deuh lio kha kan zoh a si ahcun, Pentecost ni ah Thiang Thlarau a tum thok khan, Pathian mi le fa hna cu atu ah cun Thlarau lamhruainak in chunglei tu in lam hmuhsak a si cang. Biakam Thar ah fak khun in a hun langhnak cu - “Pathian Thlarau nih a hruaimi hna cu Pathian fale an si” (Rom 8:14).

Hi angan hleili chungah hin Israel miphun lakah zumhtlak mingiatu Kaleb roconak kha biapi bik in a chimmi kan hmuh. “Cun Judah phun mi kha Joshua sinah Gilgal ah an ra i, Keniz phun Jephuneh fapa Kaleb nih a sinah, “Nangmah le keimah kongah, Bawipa nih Pathian mi Moses sinah Kadesh-barnea ah bia a chimmi kha na hngalh. Bawipa sal Moses nih ram cu hung ngiathlai awkah Kadesh-barnea in a ka thlah tikah kum sawmli ka rak si. Cun ka lungchung i a umning bantukte in bia cu amah cu ka rak phorh than. Cun Moses nih khi ni ah chiat a ser i Bawipa ka Pathian cu fekte in na zullh caah na ke nih a lamhmi ram cu nangmah ca le na tefa hna caah zungzal in ro an si hrimhrim lai” tiah a ti (14:6-9).

Kaleb nih zumhtlakte in a um caah Bawipa nih bia a kammi cu na ke nih a lamhmi ram cu ro ah ka pek lai ti hi a si. Pathian mi le fa hna nih phak an i tinhmi hruainak kha hi phunglam nih a langhter mi a si. Zumhna no deuh pawl nih langhna an hmuh i Bawipa nih a mi hna kha a pek hnanak hmuh tonmi thil an ngeih ahcun, cu langhna le hmuh tonmi nih khan tlam a tlin hlan lo a hruai hna i hmailei ah a kalter hna. Zumh tla lo kan si ahcun zumh lonak in a khatmi mingiatu pahra hna bantuk kha kan si ko lai (Num. 14:36-37; Heb. 3:16-19). Sihmanhselaw, cheukhat nun ah kawh auh an tonnak ah a thami tawhfung kha a hman zia an thiam ahcun, Khrihfa a si kami a si zongah Pathian ah an tonmi thil kha i hneksak peng ding a si ko. Isaiah sinah Bawipa chimmi bia cu, thil hramthawk in a dongh tiang a lanhter khotu Pathian a si (Isaiah 46:10). Khrihfa a cangkami hna bantukin thil kan hmuhmi le kan tonmi kha a caan ah cun Bawipa nih a kan timhpiakmi le kan ro co hngami kha tlamtling tein kan hmuh tawn. Khrihfa a cang kami nih Pathian damternak hmual kha a ngeih tikah, an nunnak ah thlaici hei tuh bantuk kha a si i a ra laimi kum hna ah damternak rian kha tuan i than chin lengmang ding kha a biapimi a si. Khamh an si lio caan ah a thur thlarau in luatter a simi hna cu a ra laimi kum le caan ah luatnak rian than dingin an than a herh. A no rihmi Khrihfa cu zohkhenh an herh bantukin thlarau lei langhna kan ngeihmi le kan tontemmi thil hna ah kan hmuh peng a herh ve. Ka cin ko rihmi pakhat cu, phungchim saya pakhat nih hin Baibal sianginn a kai lio ah ram tampi caah mitthli tla in thla ka rak cam tawn i a hnu kum 25 a rauh ah cuka ram i phungchim dingin Bawipa nih lam a ka hruai tiah a ti. Zumhna a no rihmi nih langhna an hmuhmi le thil an tontemmi hna kha zeirel loin kan um awk a si lo. Tlamtling tein an luh khawh hlanah hin hmuhma cu an rak ngei chung ko lai. Bawipa kha tling tein an zullh tikah cun chanthar “Kaleb” hna zong nih an ro comi thil kha lawmphi lo ding cu a si ti lo.

Ahme 10 ah Kaleb nih a chimmi cu, “Cun atu cu, zoh hmanh, Bawipa nih a chim bang khan hi kum sawmli le kum nga chung hi Bawipa nih Moses sinah hi bia a chim ri khan a ka nunter, Israel mi nih ramlak ah an vah lioah khan; cun atu cu, zoh hmanh nihin ni ahhin kum sawmriat le kum nga ka si”. Kaleb nih Kamhmi Ram kha a co khawh ve naklai kum 45 chung a hngah. Hi tluk sau a hngah ngan hi amah lei timhtuahnak a derthawm ruanga a si hlei lo, kan ro kan co khawh venak ding caah Bawipa nih hruai dingin a kan hngah tu a rak si deuh. Kaleb kong tu ah cun, a pawngkam ah a ummi Pathian fale hna kha an i dinhna ding caah timhcia an si rih lo! Hi bantuk thil umtuning hi nihin kan caan zongah a um tawn theu ko. Bawipa nih a sunglawimi biakamnak kha Khrihfabu hi a pek tawn ko, Sihmanhselaw mi zapi tu hi timhcia an si tawnn lo i hi bantuk hmu kho dingah tlamtling kho an si lo. Khrihfabu nih cu bantuk biakamnak i an hmuh khawh hlanah, Khrihfa member kha fingrilh in rilh dih hmasa a herh tawn. Bawipa nih a pekmi hna langhna ah an thinlung dihlak in an i pom i an kal khawhna ding caah mi zeipaoh kha hneksak an tong ko lai. Cheukhat hna cu Kaleb chan lio bantuk khan an tar lai i an thi ko lai. Hi langhna le timhtuahnak ah pakhat tal a hmuh i a feh hlan lo paoh cu fingrilh in rilhna hi kum sau nawn chung a um peng ko lai. Cu hnu lawngah an ro kha tlamtling tein an co khawhna lai Bawipa nih a hruai than hna lai.

Bawipa nih a mi hna a rilh lio hna ramcar chungah har ngai in an vahvaih hi kum saupi a si lio caan ah mithiang hna nih cun Pathian nih bia a kammi hna langhna amah tuah ding kha an hmaika ah a zungzal in i tlah peng a herh. Bawipa nih Habakkuk sinah a chim bang “langhna na hmuhmi nih khan sawhmi caan a ngei i cucu langhna taktak cu a si; a tlin lainak caan cu khualrang in a ra lio. A rauh hmanhah hngak ko; zeicahiah pel loin a ra hrimhrim ko lai, tiah a ti” (Habakkuk 2:3).

Kaleb nih a chimmi cu hi kum 45 chung hi a ro a co khawhna lai ka hngah a timi kan hmuh. Kaleb te nih ram an va ngiathlai ri in Israel mi nih biakam ram chung an luh tiang kha kum 38 an rau (Deut. 2:14). Joshua

le a ralkap hna nih kum sarikh chung ram an tuk kha a kan chimh i, cu caan lio cun Kaleb nih a comi ram kha a uk khawh.

Kaleb nih a hun chim than rihmi cu, “Cucaah Bawipa nih kha ni ah a rak chimmi tlangram cu atu ahhin ka pe tuah, zeitintiah Anak mi hna nih zeitindah khika ah kulhmi khualipi hna he an um kha, khi ni ah na rak theih cang. Bawipa nih a chim bang khan Bawipa nih a hei ka umpi hnga i, ka hei thawl khawh ko hna hnga dah kaw tiah a ti. Cun Joshua nih thluachuah a pek i Hebron cu Jephunneh fapa Kaleb sinah khan ro caah a pek (Joshua 14:12-13). Kaleb nih ro caah aa thimmi hi Israel tuanbia ah a thiang ngaimi a si. An pule Abraham, Isac le Jacob hna cu hi Hebron ahhin an rak um (Gen. 35:27). Pathian he an i tonnak hmun a rak si i, Bawipa nih Abraham kha fapa kan pek lai tiah bia a rak kamh i a rak lennak kha Gen. 18 chungah kan hmuh. Kum a rauh deuh tikah, David cu siangpahrang caah chiti an thuh i a rak uknak a si caah Hebron cu a thar in a min a thang than (2 Salm 2:1-4; 5:1-5). Kaleb nih Hebron hi a hal caah rosunglawi a co.

Joshua Angan 15

Judah Comi Ram

“Judah phun caah an inn cungkhar ning cio in an vo cu thlanglei ah Edom ramri, thlanglei bik ah Zin ramlak tiang a phan. Cun an thlanglei ramri cu Cite Rili kam, thlanglei a zohmi rili fonghlei thawk in a si. Akrabbim i hung kainak thlanglei in a kal i Zin a hei phan, cun Kadesh-barnea thlanglei ah a hung kai, cun Hezron pawng in Addar tiang a kai, cun Karka lei ah aa mer, Azmon tiang a lan i Izipt Tivate ah a hung chuak; cu ti cun an ramri cu rili ah a dong. Mah hihi an thlanglei ramri cu a si. Cun nichuahlei an ramri cu Cite Rili a si, Jordan tiva chuak tiang. Cun chaklei kam ramri cu Jordan tiva chuak i rili fonghlei in aa thawk; cun ramri cu Beth-hoglah ah a hung kai i Betharabah chak in a lan; cun ramri cu Reuben fapa Bohan lung tiang a hung kai; cun ramri cu Akhor nelrawn in Debir tiang a hung kai; cu ti cun chaklei ah a kal, cun nelrawn thlanglei kam ah a ummi Adummim i hung kainak ralchan i a ummi Gilgal leiah aa mer; cun ramri cu El Shemesh ti tiang a lan i En-Rogel ah a dong;” (Joshua 15:1-7).

Hi Joshua cauk angan 15 chung nih hin cun Judah phun chungmii hna roconak kong kha a kan cawnpiak. Ahme dihlak chungah hin Judah miphun comi ramri kha a tial dih. A tang rihmi angan paruk chung ahme chung kip i aa tialmi khua hna, tlang hna le tiva hna nih hin sullam an ngei dih. Zeicahdah hi hna hi a dikdiar in Baibal chungah hin aa tial hnga? Kan ruah dingmi cu rel cawk lo Baibal cauk chungah hin tuanbia kong tampi hi an namh chih i, tuchann kannih caah hman a herh lomi cu hi tluk tam hin zeicahdah Pathian nih a kan hmuhsak hnga? Minung sining in chim ahcun, Biakam Hlun chung i hrinsor kong le ramri vialte hna Baibal chungah hi tluk tam i telh le lak hi cu minor a thla ko ti i vuivai tlak hi a si ko e!

Sihmanhselaw, Israel miphun hna ca tu ah cun, hi bantuk chimh cawnpiak hi cu an ro comi kha fehternak ding caah a si. Hi bantuk fianternak nih hin an tincomi ram kha a theitlai chuahternakding caah hmunkhat i fonh i riantuan tinak a chuahter. Hman awk tha lomi chuahter thannak le i doh lengmangnak hna hi cu hlawt hrimhrim a hau. Aho paoh nih an hmun kha fiangte in an chim khawh ahcun, Israel ram a dir khawhnak ding caah dawntu ngei loin hmunkhat ah an tuanti kho cang lai.

Biakam Thar caan ahhin kannih kha thlarau lei roconak a tha chinchinmi kha pek kan si. Teinak le fehternak kha hmunkhat ah tuah chih khawh a si i, Khrihfabu chungah hmunkhat riantuan tinak zong kha tlamtling khitkhet tein kan tuah khawh cang lai. Israel mi hna nih an ram hmunhma kha an i hngalh dih cio bantukin, Khrih pum chungah member cio zong nih mah dirhmun kha i hngalh a herh ve (1 Kor. 12:14-27). Pumpak cio cawlcanghna hin cun Pathian rian cu kan tlamtinter kho bal lai lo i Bawipa nih a suaimi hmanthlak ah a cuang vemi bantuk kan si awk a si ko. Lamkaltu Paul nih Efesa khuami hna sinah ca a kuat hna bantuk khan, “Mi kha laksawng a petu hna cu amah kha a si, ... dawtnak in a thang.” (Efesa 4:11-16).

Khrih pum chungah kan sinak kha kan i hngalh a herh tiah Biakam Thar chung hmun tampi ah cawnpiak kan si. Hi bantuk cawnpiaknak cauk hna le kutken hna cu atu chan ah cun rel cawk lo in an tial i an chuah cang. Riantuantu hna nih an Khrihfabu chung member hna kha cawnpiaknak an ngeih peng khawhnak lai, Khrihfabu nih an riantuantu hna caah rian he a pehtlaimi kha a nekcok tiangin an langhter. Na bu chungah member 20

lawng na ngeih rih a si ahcun tampi fonh riantuannak kha cu tluk biapi in na herh rih lo. Sihmanhselaw, member 300 tluk hna ah na hun than ahcun ruangte kal khawhnak ding caah le than pengnak dingah na Khrihfabu chungah hin nekcok tiang langhter i bukip fonh riantuannak kha na herh ve ko lai. Nihin ni Khrih pum chung sinak kha kan zoh than a si ahcun, hi bantuk thanchonak cu kan hmuh khawh lai. Nawl pek lianngan tlamtinter ding caah Bawipa nih a mi hna kha a pumhkhawmh hna ahcun, riantuannak thar thong tampi hna le Khrihfabu kip fonh in an karhter thluahmah ko lai. Joshua caan lio bantuk khan, Pathian mi hn anih ri khiahmi kha fiangfai tein an ngeih khawh a si ahcun, Pathian tinhpiakmi rian kha hmunkhat ah tlamtling tein an tuan khawh lai. Angan 15 chungah khuapi chung le ramri a bit kauh le a tawisau kan hngalh khawhnak ding caah hika zawn cawnpiaknak hi kan caah thil biapi tuk a rak si.

A luancia kum saupi ka zanmang ah hi biatak cawnpiaknak hi Bawipa nih biapi ngai in a rak ka chimh. Cu ka mang ah cun minung 9,000 caah zanriah einak puai nganpi hi ka timhtuah i a dih ding zat tangka zong ka rak hmuh dih. Lam i kaa chawh lioah tadinca khi ka hei rel pah i, a dang zanriah dumtinak ding caah timhtuahnak kha ka hmuh than. Cu zanriah cu a sang ngaimi a sii a man zong kha a dang nakin aa deng deuh. Cu zanriah dumtinak a sertu pa cuka lam ah a um vemi upa pakhat a si tiah ka mang ah cun ka hei hngalh. A chung i ka va luh tikah, cu innpi min cu “Ralvennak inn sang bu” ti a si. Ka khuaruah a ka hartermi cu Jehovah Witnesses pawl nih an tuahmi zanriah dumtinak ah ka va luh i an upa pa he an zungah bia kan i ruahmi hi a si.

Hi ruahnak cheutu pa nih hin kan tuah hmasami zanriah man vialte kha a ka hmuhsak dih. A donghnak ah cun a dihlak man i zatceo lawng kha pek dingin a ka hmuhsak. A donghnak man cu ka zoh lioah, Bawipa Jesuh kha amah pum hrimhrim in cu a thar in an tuahmi khaan chungah cun a hung lut.

Cu Jehovah Witness innpi chung ka um lio i Bawipa nih a ka hmuhmi hi ka ningzah bikmi cu a si! Sihmanhselaw, Bawipa nih zeitihmanh in a ka si lo ti cu ka chim ngam, asinain thil pakhat kong cu a ka chimh ta. Bawipa nih a ka chimhmi cu, “Hi vawlei cungmi hna hi an thil tining ah ceunak mi hna nakin an fim deuh” (Luke 16:8) ti hi a si. Jehovah Witness pawl nih cun vawlei pumpi ah man fawi tein ca an phawt caah, zanriah dumtinak zong hi man fawi tein an ser khawhnak a si ti a ka hngalhter. An cawnpiaknak hmaan lomi hi cu Bawipa nih a thangthat lem hna lo nain an cawnpiaknak palhmi zong cu fim ngai in vawlei hmunkip ah man fawi tein an thanh khawh hi a si tiah ka hun hngalh than.

Bawipa Jesuh nih a ka chimh than rihmi cu, “Hi rawl a eimi mi tampi hna sinah cun ceunak nganpi cu khulrang tein tlunter tuah” tiah a ka ti. Cuti a ka chimhmi hmunah fimnak hmangin riantuannak bu ser dingin rianrang te le thanuam ngai in ka tuahpi hna.

Hi ka mang nih hin ka thinlung ah thazaang thar a ka pek ciammam i hi kum chung vialte cu thlacam in fimnak kha ka kawl. Bawipa nih ka thinlung chungah langhnak a ka pek bantuk khan riantuannak ding caah Khrihfabu thar kha dirh hram kan thok. Cu mang ka manh hnu kum sarah ah pastor 9,000 cawnpiaknak ding magazine kha man fawi tein ka chuah khawh caah a voihnihnak zanriah an sermi he khan aa lo taktak ko. Hi riantuannak cu a luan cia kum hra chungah khan cun a thang ngaingai i Asia ram kipah a ummi Baibal sianginn hna le pastor pawl cawnpiaknak ding cauk le magazine zong uk tampi kan chuahpiak khawh hna. Kan i lawmhnak cu Asia rampi chiti thuh an sinak ding ca a si i, a hmaanmi zumhning cawnpiaknak kha Pathian bia in an hmuh khawhnak ding caah, biaknak dang nih an chuahmi nakin man deng deuh i cauk kan chuah khawhpiakmi hna hi a si. Kawh auh kan sinak a chan le kan ramri zong kha fiangte in kan hngalh ko caah, Pathian vel thawngin kan comi thil hna hi thei tampi kan tlaiter khawnnak ding ca le a kan pekmi ram cu kan uk khawh naklai kan i zuam a herh.

Joshua angan 15 chung a laifang ahhin lung lut ngaimi tuanbia pakhat kan hmuhmi cu, Kaleb le a inn chungkhar kong hi a si. Kan hun relmi cu, “Cun Kaleb nih, “Kiriath-Sepher atu i a latu paoh cu ka fanu Aksah kha nupi ah kan pek lai,” tiah a ti. Cun Kaleb nih chaklei tiput hna le thlanglei tiput hna kha a pek chih” (Joshua 15:16-19).

Kaleb nih a hmuhmi a vo kha lak awkin a hung kal tikah, a ral a thami le raltuk a thawngmi a ralkap kha special laksawng a pek. Cu laksawng cu a fanu Aksah kha nupi caah thit ding a si. Kaleb a nau fapa Othniel nih cu nu cu a co.

Kaleb nih a ngeihmi ram cu Othiel zong nih a ngeih ve. Sihmanhselaw, cu ram cu thlanglei Israel ram he a naih ngaimi ramri ah a ummi a si i a rocar ngaimi a si caah Negev phong ah a va fong. cucaah an ram ah ti an pek khawh nakhnga Aksah nih a pa a halmi hi biapi ngaingaimi a si. Kaleb nih a fanu le a tupa cu cerhtiput pahnih kha a pek colh hna.

Hi tuanbia nih hin atu chan nu pawl caah sohluah tha ngai a chuahpi. Nu hna cu pa pawl soilem khawhna hmuah thawng ngai an ngei ti kha ngalhpiak an si, cu pa cu a pa zong a si ko lai, asilole a pasal maw midang zong a si kho ko. Jezebel nih cun a thilti khawhna kha a va le a chungkhar vialte hrawhna ding caah sualna lam ah a hman lawng si loin ram pumpi zong aa tel dih. Khatlai ah cun, Aksah tu hi cu midang caah zohchun awk tlak le a thil ti khawhna kha thatnak ah a hmang thiammi nusaltha a si. Amah nih aiawh hal thiamna a tuah caah a chungkhar dihlak an thangcho thluahmah ko. Hi tuanbia hi thlarau lei thil ah kan lak a si ahcun nupi tha nih thla a cam i a pasal kha cehtiput bang luang peng kho dingin thazaang a pek thiam ahcun Bawipa nih a miphun cu thluachuah a pek ko lai. Nupi fim nih cun a pasal kha a bawmh thiam i Bawipa thluachuah hmu kho ding tiang zongin a hmunter khawh. Othniel zong hi taksa lei he thlarau lei he a nun ah thluachuah a hmu i Israel miphun biaceih tu hmasa bik a si tiah Biaceih tu angan pathum chungah kan hmuh.

Angan 15 a donghna lai ahhin ramri le khuami hna kha tlawmpal a hun telh than. A tialmi cu, “Sihmanhselaw, Jerusalem khua mi JeMotawka mi hna cu Judah mi hna nih an daw kho hna lo; cu caah ni hin ni tiang in JeMotawka mi hna cu Judah mi hna he Jerusalem ah an um ko” (15:63). Biakam ram chungah an tincomi ram kha phun khat nih tlamting tein an co khawh lo i an sunghna kha hika ah hmasa bik aa tialna kan hmuh. Sihmanhselaw hi an sunghmi hi cu a herh tuk lem lomi khi a si.

A hmasa bik, Joshua le Israel mi hna nih Jerusalem siangpahrang le a ralkap hna kha hmasa bik an tei hna tiah angan 10 chungah kan hmuh. Biaceih tu cauk ah kan hun rel thanmi cu, “Cun Judah mi nih Jerusalem cu an doh i an lak i vainam in an saam cikcek i khuapi cu mei in an khangh” (Biaceih tu 1:8). Cucaah Bawipa nih Jerusalem chungah teinak a pek ko hna ti kha a fiang ko i, Judah phun hna nih hin hi khua hi an va uk chap ti kha hi lio caan ah a um hlei ti lo. Jebus mi hna kha khuasak thannak le zohkhenhna nawl a pek hna. Jerusalem ah a ummi Jebus mi hna cu Judah mi nih hnahnawhna ser kho ti lo dingin an tuah hna awk a rak si.

Teinak ngan bik kan hmuh hnu zongah hin kan tita lei derthawmna nih hin fakpi in a kan hliam in a kan doh than khawh rih. Tahchunhna ah, Elijah nih teinak nganpi a hmuhna cu Karmel tlang ah vancung in mei kha a tlakter i mi vialte kha Pathian leiah a mer than khawh hna. A thaizing ah cun Jezebel ral tih in Elijah cu a nunnak caah lo diam a zam! Cu bantukin Israel mi hna zong nih Jerikoh khua kha khuaruahharna in an tei hnuah Ai khua hmete cu an sung ko. Kan philh khawh lomi cu Peter nih Bawipa kha, “Nang cu Khrih na si” tiah a phuan hnu caan rau lo te ah Jesuh nih a thawh i, “Satan, ka hnu ah i thawn” tiah si ko. Kannih cu kan ral a hngal pengmi kan si a herh, zeicahtiah teinak nganpi kan hmu ti in puai kan tuah lio ahhin a rak kan doh than tu ruangah kan sung than kho ko. Kum zabu pali a dongh hlan deuh kha mi hna cu Jerusalem in an i thial thai cang. A khua hi raltukna caah a biapi tukmi a si caah lungawtawm loin an rak kilvenna cu a si. David nih Israel mi dihlak caah siangpahrang a hung si lawng kha hi khua cu a tei khawh. Cu tikah Zion tlang kha ralruang ah ser in khuapi bikah a hman (2 Samuel 5:6-10). Cu caan thawkin, Pathian nih a mi hna caah ze i thil paoh a tuah duh tikah Jerusalem hi hmun laifang ah a cang. Sihmanhselaw, hi a donghna teinak an hmuh hlan ahhin, Pathian riantuanmi dohna ding caah a thokna le hmunlai bikah Satan nih Jerusalem khua hi a hman ve. Pathian pennak caah raldoh tikah hmuhsakna pakhat cu tihnung tukin ral nih hin doh than a tim ti hi a si. Atu kanmah chan tiang zongah hin, raltukna caah siseh, bom thlakna ah siseh, a thlite ral thawhna i timhtuahna le ram uk he aa pehtlaimi vialte zongah hin Pathian timhtuahmi dihlakah Jerusalem khua cu hmun biapi bik ah a chiahmi kha kan hmuh.

Joshua Angan 16

Efraim Miphun Comi Ram

Hi angan 16 nih hin Efraim miphun nih an comi ramri kong kha a tial. Sihmanhselaw, hnahnawh peknak nih a hun zullmi hna nih hin Israel mi nih ram kha pehte in an uk khawhna kawl ding caah lam kha a kauhter

hna tiah a dongh lei ahhin a tial. Ahme 10 ah, “Sihmanhselaw Gezer i a ummi Kanan mi kha cu an daw i hna lo, cucaah nihin tiangin Kanan mi hna cu Efraim mi hna lakah an um, Sihmanhselaw hnekmi riantuan awkah sal ah an cang” tiah kan hmuh.

Hi thil hna hi Israel mipun caah i zohchun awkah a tha ngaimi thil ah an hung cang. Angan 17 chungah kan hmuh thanmi cu, “Sihmanhselaw Manasseh fapa hna nih cun khuami hna cu an pawncuah kho hna lo, Kanan mi hna cu cu khua ah cun an i benh peng ko. Sihmanhselaw, Israel mi kha an hung thawn tikah Kanan mi hna cu hnekmi rian kha an tuanter hna i an daw i dih cikcek hna lo” (Joshua 17:12-13). Hi caang zawn hi biaceih tu cauk chungah kan hmuh thanmi cu, Israel mi hna nih an rak teinak kha a hnuah zeitindah an doh than ti kha a tial. Zohchunnak tampi lakah pakhat cu, Biaceih tu 1:28 chungah, “Israel mi cu an hung thawn tikah Kanan mi hna cu hnekmi rian an tuanter hna, Sihmanhselaw, an daw i dih cikcek hna lo” tiah kan hmuh.

Harsatnak pakhat tu cu Israel mi nih cikhat lo ah ram hi a dihlak in an uk dih colh lomi hi a si ko. Bawipa nih a chimh ciami hna cu ram chungah an khah dih hlan tiang tlawm tete in nan uk lai tiah a ti. Sihmanhselaw an sungnak biapi bik cu an karcho hnu le an hun thawn hnu i an tuahmi thil hna hi an si. An hun thawn liote ah Kanan mi hna kha pawncuah dih loin sal tu ah an hman hna.

Bawipa nih Israel mi hna cu Kanan mi hna he i cawh nelnul i um lo dingin ralrinnak a pek hna. Pathian nih nawl a pekmi hna cu “Bawipa na Pathian nih co awk ah na va luhnak ram chungah an luhi tik le nangmah hmai in mipun tampi, Hit mi le Girgash mi le Amor mi le Kanan mi le Periz mi le Hiv mi le Jebus mi, nanmah nakin a thawng deuh le a ngan deuhmi mipun phun 7 hna cu a thawl hna i Bawipa na Pathian nih annih cu nangmah kha an pek i na tei hna tikah, khi tikah annih cu na hrawh cikcek hna lai, annih he biakamnak na ser lai lo i an cungha zaangfahnak na ngei lai lo. Annih he nan i thi um lai lo, an fapa hna kha nan fanu hna cu nan pe hna lai lo, an fanule zong nan fapa caah nan la fawn hna lai lo. Zeitintiah nan fapale hi Pathian dang biak awkah keimah zumhnak in an pialter sual hna hnga, cu tikah Bawipa thinhunnak cu nan cungha a alh lai i khualrang in an hrawh ko hna lai” (Deut. 7:1-4).

Israel mi hna nih Kanan mi sining kha an i hrawm deuh a si ahcun Israel ram ah milem biaknak, nu le pa sualnak hna le lawkihmi thurhnomhnak phun zakip a khat lai ti kha Bawipa nih a hngalh cia cang ko. Kanan mi hna nih Israel mi cikhatte an liangannak kha an hun hrawmpi hna i rawknak lam lei tu kha an phakpi hna. Tahchunnak ah Solomon chan lioah khan hi sal pawl cu a pennak chung riantuantu an si (2 Chanrelnak 2:17-18). Sihmanhselaw, a nupi tampi hna cu hi mipun hna sinin a thailmi hna an si tikah Solomon lungthin kha Bawipa sin in a kirter thantu an si (1 Siang. 11:1-8). Hi nih hin milem biaknak, i thennak le a pennak tiang hmanh then tiang a phan.

Israel mi hna bantukin kannih zong hi bantuk tukforhnak mi sining hna va hrawm duhnak hna kan phak sual lai caah i ralrin ngaingai kan herh. Kan cah lio le kan thawn liopi ah kan ral hna kha kan hrawh dih hna lo i kan umter peng ve ko hna ahcun, kan thathnemnak le san kan tlaihnak zawn kawl kha an i zuam lai. Kan a genda hna tlamtinternak ding caah hin khuachia hna, titsa duhnak hna le vawlei hna hi hman dingin kan i zuam hnga maw. Ningzak ngai a simi cu Khrihfa mi hna nih hlennak, pumsaduhnak, thinhunnak asiloah a dang rawknak phun hna kha anmah duhnak tinternak ding caah “hriamnam” caah hman an i timmi hi a si. Hi bantuk thil hna hi cu cikhat le caan khat te lawng ngu a si i hi bantuk aa bochanmi hi cu a donghnak ah rawknak an phan thiamthiam ko. Nangmah pumpak thathnemnak ding caah vawlei sining phung hna, pumsa duhnak hna le khuachia thawnnak hna hmang kho ding cun i zuam len duh hlah. Hman hrimhrim tim hlah, na riantuannak, na chungkhar le nangmah nunnak kha thawl khawh dih i zuam hram ko.

Joshua Angan 17

Manasseh Phun Cheu Comi Ram

Hi angan 17 chungah hin cun Manasseh phuncheu nih biakam ram chungah an comi ram kong kha a kan cawnpiak. A dang phuncheu nih khan cun Bashan ram Jordan nichuah lei kha an rak i thim sual cang (Joshua 13:29-33). Sihmanhselaw, atu ah zumhtlak tein a ummi a dang phun cheu nih cun Efraim, Asher le Issakhar phun hna nih an comi biakam ram i an laifang hi an co.

Manasseh phun lakah Zelophehad cu fapa a ngei lo, aa tialmi cu, “Manasseh fapa Makhir fapa Gilead fapa Hephher fapa i fapa Zelophahad cu fapa a ngei lo, fanu lawnglawng a ngeih hna; mah hna hi a fanule hna min cu an si: Mehlah, Noah, Hogleh, Mikah le Tirzah” an si. Tlangbawi Eleazar le Nun pafa Joshua le hotu hna sinah cun an ra i, “Bawipa nih Moses cu kan unau hna sinah covo kan ngeih ve nakhnga nawl a pek” tiah an ti. Cuaah Bawipa nawlbia bang cun an pa unau hna lakah cun covo a pek ve hna (Joshua 17:3-4).

Hi tuanbia hi Numbers cauk chungah aa tial than. Zelophahad nih fapa a ngeih lo caah an chungkhar ro cu a fanule hna nih Moses sinah khan an hal (Number 27:1-4). Hi kongah Moses nih Bawipa sin i a au tikah a tanglei cawnpiaknak hna hi an hmuh. “Cun Bawipa nih Moses cu a chonh i, “Zelophahad fanu hna cu an dik ko; an pa unau hna lakah ro na coter ve hna lai i an pa ro cu annih kha na pek hna lai. Cun Israel mi hna cu, “Mipa pakhatkhat cu a thih i fapa a ngeih lo ahcun a ro cu a fanu kha nan pek lai. Cun a pa nih unau a ngeih lo ahcun, a ro cu a rualchan lakah a nai bikmi rualchan kha nan pek lai i amah nih cun a co lai. Bawipa nih Moses nawl a pek bangin, Israel mi hna caah nawlbia le phunglam a si lai tiah na chimh hna lai” tiah a ti (Num. 27:6-8,11).

Titsa lei roconak caah phunglam vialte hna hi nihhin kannih ca zongah thlarau lei ah thil biapi ngaimi a si. Israel mipahun nu tampi hna cu an vatmi hna a vale ro kha an co ve. Khrih pum chung zongah hin hi he aa lo ngaimi hi kan hmuh khawh. Nu tampi hna nih cun an vale thlarau lei thluachuah le ro an co ve. Hi nu hna hi anmah sinak ah ho tluk lo laksawng le thilti khawhnak a ngeimi an si ahcun, an vale le an chungkhar hna sinah cawlcangh khawhnak an ngei. Pathian kawhauhnak kha an nunnak le an riantuannak ah tlam a tlin khawhnak lai an vale kha an bawmh hna ahcun an riantuannak kha hlawh a tlin tikah an thluachuah le an laksawng kha an hrawm ve hna lai. Hi phunglam hi siangpahrang David nih 1 Samuel 30:24-25 chungah a fehternak kan hmuh. David nih cun raltuknak ah hmaisuangmi hna le hnulei in a bawmchantu hna kha an laksawng aa khat tiah a ti. Inn ah inn chungkhar a rak zohkhenhtu nu le raltuknak hmun ah Bawipa rian a tuanmi a va kha an covo aa khat ko lai.

Sihmanhselaw, Israel nu tampi hna cu Kamhmi Ram ah annih zong covo pek an si ve. Cu bantukin, atu chan Khrihfa nu tampi hna zong hi Pathian nih a auhnak hna zawnah thlarau lei riantuannak hmun hna an ngei kho ve. An riantuannak kha tlam a tlin khawhnaklai va zong ngei loin an um hna i cu hna pawl cu Corric ten Boom, Masdame guyon le Mary Slessor hna kha an si i Khrihfabu tuanbia ah hi hna bantuk hi tampi an um rih. Mi cheukhat hna cu an va he an tuan ti.

Keimah ka innchungkhar zong hi Bawipa nih fanu pahnih he fapa lo tein thlua a kan chuah. Ka nupi le kei zong Bawipa riantuannak caah thlarau lei laksawng a kan pekning bantukin thlarau fapa tampi hna sinah rian kan tuan i kan fanule he kan riantuannak tlamtling kho dingin thla kan cam. Pathian nih an sinah a sunglawimi biakamnak kha a chimh hna, cucaah kan riantuannak caah kawhauh kan sinak ahhin kan fanule zong chungkhar covo hi pek an si ve lai ti kha kan hngalh.

Zelophehad fanule hna covo kongah cawnpiaknak a biapi ngaimi a dang kha a um rih. Number 36:1-6 chungah, “Phun lu cio nih an chimmi cu ... Bawipa nih ka Bawipa kha ... sihmanhselaw an pa phun innchungkhar chungmi lawnglawng va hna seh”.

Miphun 12 hna nih an tincomi ramri an i cawhmi kha Israel hruaitu upa hna nih khan an hmuh. Ram a tingcomi nu nih mipahun dang pa kha an vat hna ahcun, hi pa hna thawng hin an comi ram kha an mipahun ta ah a cang ko lai. Hi mipahun tincomi hi buainak le elhnial ding a si soal lai, ro a comi nu hna kong ah Bawipa nih a chimmi cu, A tha bik tiah an ruahmi kha va hna seh, Sihmanhselaw an pa phun innchungkhar chungmi lawnglawng va hna seh” tiah a ti.

Hi nawl pekmi nih hin thil biapi ngaimi tampi kha nihhin kannih caah a langhter. Nu pakhat cu riantuannak ding caah pumpak tein kawhauh a ton a si ahcun a vat dingmi kong ah ralrin ngai a herh. A vat dingmi cu ‘phun’ aa khat mi a si lai, a sullam cu Pathian kawhauhnak ah an hmuhmi langhnak aa khatmi a si lai. Kawhauhnak aa dangmi pa kha a vat ahcun, kha pa kawhauhnak kha zul dingin aa pumpe lai. Hi bantuk pawngkam thil hna ruangah, amah nu pumpak kawhauhnak kha cu a sung dih lai. Tahchunhnak ah, nu pakhat cu Tuluk ram ah mission riantuan dingin kawh khi va si seh law, Canada pa pastor kha a vat ahcun, zeidah a cang hnga? Kha pa nih khan a nupi kawhnak cu a zul in a Khrihfabu khan a chuak in Tuluk ram ah cun a zul ngai hnga maw? Zul

hlah, a nupi nih an pa thithruainak kha a zuhl ko lai. Hi bantu a si ruang caah Tuluk ram caah kawh a simi cu Canada ram ahkhan a um ko lai i missionary caah kawh a simi cu a tum thluahmah ko lai. An pasal pastor rian kha a bomh lai i a thluachuah laksawng kha a co ve lai. Sihmanhselaw, hi bantu a si tuah ahcun Pathian nih missionary caah a rak kawhna covo kha cu a sung ko lai. Cu bantu thil a chuahnak cu a riantuan dingmi nakin an pa a duh deuh caah a si ko. Pastor tha nupi sinak ding caah harnak tampi a ton lai.

Phungchimtu nu pakhat nih a rak chimmi cu, a no lioah khualtlawng in thawngtha phuang ding in kawhauhnak a rak ton. Sihmanhselaw, a vatmi a vapa tu cu pastor caah kawh a si. Kum tampi chung cu pakpalawng ah an cang ko, zeidahtiah khualtlawng in phungchim kha a duh caah, asinain a vapa he hmunkhat ah um in turun kha an zohkhenh i rian an tuan. Cu nu cu a kha tukmi ah a cang, a vapa kha tuante ah thlan a phakpitu, doh hmang nupi ah a hung cang ko. Nungak hna, keimah bantu cu si hlah u tiah fiangte in ralrinnak pek bu in tehte a khan.

Baibal Biakam Thar nih, Khrihfa nu nih Khrihfa kha nan vat hna lai, a zum lomi cu vat lo ding (2 Korin 6:14). Sihmanhselaw, Zelophehad fanule hna sining zoh tikah hin a riantuan ding caah sang deuh in kawhmi an um ve tiah kan hmuh. An ro kha a hmuh khawhna dingah anmah he kawhauhnak aa khatmi hna kha an vat hna lai, thlarau lei 'phunkhat' kha an si lai. Farle hna, Pathian nih a sunglawimi a riantuan ding an auh a si ahcun, rocomi a sunlawi tuk bantu in mansung a si ve. Va ding ca na thim tikah nangmah an dawnkhantu ding si loin Pathian nih na nunnak ah an tinhpiakmi khuaruahhar a tlamtlin khawhna ding caah thim thiam i ziam.

Nupi pasal a ngei ciami na si i kha na hawikom nih khan Pathian nih an kawhna ah an bawmchan lo men ko lai. Na lung dong hlah, Pathian nih na pawngkam thil umtuning vialte kha a thlen khawh dih ko. Baibal nih cun, "Pathian a dawmi le aa tinhmi ningin a kawhmi hna caah cun, zeizong vialte hi a tha lei ah a serpiak ko hna ti kha kan hngalh (Rome 8:28)" tiah a kan canwpiak. "Vutcam caah pangpar thi" tiangin pek a siangmi Pathian rian pei kan tuan cu. Kan nun ah kan mang a tling kho lomi le kan fahnak vialte zong a kan lakpiak dihtu a si i Amah vel ngaihna thawng in thil lianngan hna cu kan nunnak in tlam a tlintar lai.

Hi a ngan chung thiam ahhin tuanbia dang pakhat kan caah chimh cawnpiak ding a um rih. Manasseh phun cheu hna comi ram kong kan theih hnu ah, ahme 14 in 18 chungah kan hmuh rihmi cu Joseph tefa hna phunzainak a si. "Joseph tefa hna" hi Efraim miphun hna le Manasseh phuncheu hna kha an si i ro zong phawt cangmi an si ko.

Kan hun relmi cu, "Cun Josef phun nih Joshua kha an chonh i, kei cu atu tiangah Bawipa nih thluachuahna a ka pek caah mi tampi ka si nain, zeicadah covo pakhat le hmun pakhat lawnglawng na ka pek" tiah a ti. "... tlang ram cu kan caah a za lo, Sihmanhselaw rawn i a ummi Kanan mi vialte hna cu seh thir rangleng an ngei ..., cun Joshua nih Josef tefa Efraim le Manasseh sinah cun, "Nannih cu mi tampi nan si i nan thawng ngaingai, vo pakhat lawng nan co lai lo, Sihmanhselaw tlangram cu nan ta a si lai, tupi a si nain nan vah lai i a deng tiang nan co lai; Kanan mi hna cu thir rangleng an ngei i an thawng nain nan thawl hna lai" tiah a ti.

Hiti a phunzaimi miphun hna hi Joshua nih an i zat tawkin ram a pe hna lo. Mi tampi an si ko nain an i zat lo caah an phunzainak cu a si. Sihmanhselaw, "Miphun nganpi" sinak bantu cun an cawlcang lo, tlangram he rawn he an comi kha an i za lo Ahme 14-18 ah a kan chim. Tlangram cu tupi a si caah an lung a tling deuh lo. Khatlei in ruah ah cun, nelrawn kha cu an co cangmi hmun khan a ralchan ah a um caah lak harmi zong a si lo. Josef tefa hna nih hin cun tupi le rawn cheukhat hna cu an ngeih cang ko hna. Annih cu mi tampi an si ko caah an i za ding ram kha an lak chap khawh lai tiah Joshua nih a chimh hna.

Hi miphun hna nih Joshua sinah an phunzai hnawhmi nih hin kanmah chan zongah kan titsa sining in Khrih sinah chim kan hmanmi hi a langhter. Kan nunnak ah tlangcung siseh, rawn kong zongah Bawipa sinah phunzai kan hmang ve tawn. Kanmah te lawng um kha kan duh lo i mi tampi nih an kan kulh thup zong hi kan duh thiam lo! Mi pakhat nih vailam ah a teinak ah khan kan hmuh lo ahcun Khrih i kan nunnak ah tei kan duhmi le thil kan tonmi ah vuivai le phunciar kan hmang ve tawn. Teitu a simi hna hi hmakhatte ah thil tuah kho an si bal lem lo, duhsah tein an tuan peng hnu ah dotu kha an tei khawh tawn hna. Mi tampi a pumkhawm khomi hna paoh kha Pathian nih 'miliannan' tiah a ti lem hna lo, asinain kan ral kan dohnak ah siseh riantuan in kan kalnak

ah zeitindah kan nun ti kha thil biapi deuhmi a si. Tam deuh hmuh kan duh ruangah kan phunzai tawnmi kha cu, Pathian nih a kan duhpiak ning cu a si lo. Pathian nih a kan pekmi ning hin dik le hman in kan hmang kho maw? Thil hmete ah zumh tlak kan si ahcun, Pathian nih tam deuh a kan pek ko lai. Kan ‘Jerusalem’ ah zumhtlak kan si ahcun, Bawipa nih kan “Judea le Samaria” ah a kan hruai ko lai. Atu kan ngeihmi ah i za loin hinak tam deuh hmu ding ka si tiah kan phunzai ahcun, atu kan nunning i kan sinak ahhin teitu cu kan si dih kho lai lo.

Kan teinak zong hi hmuhter i karhter zong hi kan herhmi cu a si, Josef tefa hna sinah Joshua nih a pekning hna hi zuluh khawh i zuam u sih; ral kha dawidih ding, cun tuan ding! Kan nun ah aa thup pengmi kan ral kha kan dawidih khawh lawnglawng ah kan thawnnak dihlakin kan tuan khawh lai i Bawipa nih a kan pekmi kan ro hi kan herhmi nakin a tam deuh ti kha kan hmuh ko lai. Kan nun ah kan tincomi ahhin phunzai hna hlah u sih. Salm cañaltu nih a rak chim bang kha, “Laksawng na ka pekmi cu zeitlukin dah khuaruahhar an si, zeitlukin dah an that” (Salm 16:6) tiah ti cio hna u sih.

Joshua Angan 18

Miphun Pasarih Ram Cheuhnak Le Benjamin Comi Ram

“Cun Israel mibu cu an ningpi in Shiloh ah an i pum i khika ah tonnak thlam kha an bunh i an hmai ah ram cu tei in a um ko. Israel mi hna lakah phun sarikh vo cheuh rih lomi an um. Cuaah Joshua nih Israel mi hna sinah cun, “Bawipa nan pupa Pathian nih an pekmi hna ram chungah hin luh i va co awakah zeican dah nan i daithlanh lai?” Joshua 18:1-3.

Kum sarikh ral an tuk dih hnu ah Israel mi hna cu an co hnga ding laksawng hmuh awk caah timhlahm an si cang. Ram cu an tei dih cang i a rak um ciami hna kha cu Israel mi hna nih an kan tuk than sual lai tiah thinphang in an um.

Kanan ram kha an lak dih ti a langhnak cu, Israel mibu cu an ningpi in Shiloh ah an i pum i khika ah Moses thlam kha an bunh. Hi hmun ahhin Bawipa cu a mi hna lakah kha a um lai. Sihmanhselaw Joshua nih phun sarikh hna cu a fonh hna, zeicatiah ram kha duhsah tein an tei caah. An tei dih cang ko, asinain ram chungah lamh i uk dihnak dingah duhsah tein thawl i kauhter a herh. Nihin tiang kan minung titsa sinak a caam rih komi he hin aa lo tuk lo mei? Kalvary teinak ah tlamting tein kan nun khawhnak ding caah Bawipa nih a kan pek dih cang ko nain kan pawngkam i a ummi kan ral hna kha hnahnawnak zong tuah kho ti lo dingin kan thawl taktak hna lo! Chamberlain nih Hitler a tuah banuk kha ‘kan chan ah daihnak a um’ ti in porhlawt kan hmang i kan ral hna he lung khahnak tuah kan hmang tawn.

Raldohnak cu a dih zuahmah tikah Bawipa nih a pekmi hna kha zeidah a si ti fiangte in Israel mi nih an ngeih a herh ning kha Joshua nih a hmuh. Cuaah Joshua nih nawl a pekmi hna cu, “An covo hnga ding kha ruah chih in ram kong cu an tial lai i keimah sinah an ra lai. Vo sarikh ah an cheu lai, hmun sarikh in cheumi ram kong cu nan tial lai i nan tialmi cu hika ka sinah nan rak put lai; cun Bawipa kan Pathian hmai ah hika ah nan caah camcawh fung kan khiahpiak hna lai” tiah a ti (Joshua 18:1-6). Covo a ngei rih lomi phun kha phawt ve ding caah Joshua nih mi kha a thlah hna i ram kha tha tein nan va tah lai i nan ra than lai a ti hna. Cun Joshua nih camcawh fung kha a khiahpiak hna i ram cu rikhiah in a cheu hna.

Joshua nih an phunning cio in ram a cheuh hna bantukin, Bawipa Jesuh Khrih zong nih thlarau lei covo cu Khrihfa pumpak ah siseh, chungkhar le Khrihfabu cio kha a phawt hna. Hi covo cu Pathian mi le fa hna kha pek an si i vawlei i atu kan nunnak caah si loin, zungzal nunnak ah kan laksawng ca zongah a si chih. Daniel nunnak a dongh lei ah vancung mi nih a chimmi cu, “Nang cu a donghnak tiangin zumh awk tlak tein um ko. Cun na thi lai i chan donghnak caan ah na hmuh awk hnga kha co awakah nang cu na tho te lai” tiah an ti (Dan. 12:13).

Van Jerusalem Thar ah cun kutka hleihnih an um i Israel miphun hleihnih min kha an i tial (Bia 21:12). Bawipa nih cun seh bantuk siter hi a kan duh lo. Khrih taksa pum sinak hi pum cheubang dihlak ah a langh khawhnak lai a kan thim i hman a kan duh. Sihmanhselaw, kan hngalh awakah a biapi tukmi cu kan thil ti khawhnak kha midang pek ve i kan laksawng hi karhter dingin Pathian nih a kan auh chan hi a si.

Joshua Angan 19

Simeon, Zebulun, Issakhar

Hi angan 19 nih hin cun Israel phun chung i a hnu bik a tangmi phun ruk nih an comi ram kong kha a tial. Hmasa bikah, Simeon phun comi nih cawnpiaknak tha ngai a kan pek. Kan hun relmi cu Simeon phun nih an comi ram cu Judah ram chungah khan aa tel ve. Judah phun vo cu an caah a ngan tuk caah Simeon phun nih an comi ram chungah co vo an ngei ve” (Joshua 19:9). Simeon phun hna sinah covo pek an simi cu phundang ngai a si, zeicahtiah phun dangmi covo chungah a tel caah. Simeon phun nih an comi ram cu anmah nakin a thawng deuh le a ngan deuhmi Judah phun ram chungah a tel. Sihmanhselaw, cu a sullam cu Judah phun nih Simeon phun kha fawi tein an uk khawh hna tinak a si. Simeon phun hna cu Judah phun nih ‘an lemh’ dih khawh hna caah Solomon siangpahrang pennak hnu ah ram cu aa cheu i thlanglei pennak (Simeon phun umnak kha) cu a hnuah cun Judah pennak tiah auh a si ko cang.

Hi bantuk thil a sinak cu Simeon phun nih cun an pumpak sinak hrim khan an phun kha an dirpi kho lo. Genesis cauk chung nih a kan cawnpiakmi cu Israel fale 12 lakah pahnih a simi, Simeon le Levi hna cungah an pa nih bia a rak phuan chung cang. Simeon le Levi nih an farnu a rak tlaihremtu siangpahrang fapa kha an rak thah. Cu ruangah an pa nih a thih hlan ah a rak chimchungmi cu, Simeon le Levi hi unau nan si, nan hriamnam cu thil tha lo tuahnak ah nan hman. An thinhunak cu tih a nun tuk caah an cungah chiatserhnak nih tlun hnawh seh, an thinlinhnak cu a puarhran tuk caah chiat nih tlun hnawh ko seh. Jakob ram chungah ka thek hna lai i Israel mi lakah ka then dih hna lai” (Gen. 49:5,7). Hi chiatserhnak cu an comi kongah fakpi in a tling i Bawipa nih Simeon phun cu Judah ram chungah khan a umter hna.

Simeon nih hi chiatserhnak cu a co, zeicahtiah a soal ruang le a pa bia a ngaih lo ruangah (Gen. 34:30). Noah fapa Ham cung zongah hi bantuk chiatserhnak a rak tlung ve. Hi bantuk biaceihnak hi kan taksa tefa cungah a tlun bantukin thlarau lei kan fale cungah a tlung khomi a si thiam ko.

“Nan nu le nan pa kha upat hna u” timi hi Moses nawlbia pahra lakah panganak kha a si, Sihmanhselaw Lamkaltu Paul nih cun Efisa 6:2 chungah biakammi he nawlbia pakhatnak ah a chiahmi a si. Hi biakamnak a hun zultu cu, “Cuti nan tuah ahcun, Bawipa nan Pathian nih a pekmi hna ram ahhin saupi nan um lai” (Exo. 20:12) tiah ti a si. Taksak si nakin nu le pa a upatmi hna cu mah innchung comi ram ahkhan an um peng kho lai i an nu le an pa an thih hnu zongah chungkhar ro kha pek an si lai. Aa ralchanh in a hman taktakmi pakhat cu inn chungkhar doh a hmanngmi cu an chungkhar in hlonh an si i ro zong pek an si lo. Sihmanhselaw, hi phunglam hi thlarau lei zongah hman khawh a si. Khrih chungah kan nu le kan pa kha kan upat hna lai i thlarau lei roco kan duhmi kha an kan hrawm khawh ve lai. Thlarau lei ah pa a si taktakmi pastor le rianuantu hna nih cun an thlarau fale kha an rocomi kha an hrawm ve tawn hna. Thlarau fale sinak ah zumhtlak tein kan hmuh a si ahcun chiti tihnak le rianuantu ah khan thluachuah an kan pek lai i kan hmuh ko lai. Doh a hmanngmi fale hna kha kan si i kan thlarau nu le pa zong kan upat hna lo ahcun, thluachuah hmu loin chiatserhnak tu kan cungah a tlung ko lai! Kan rocomi hmun kho peng dingah hin kanmah hrim hi kan i tlak lo tuk. Zei thil dah a cang kho ti ahcun, fapa tla pa bantuk khan, ro tampi an co hlan hin timhlanh cia an si awk a si. Sihmanhselaw, a phichuak cu an rocomi vialte kha an sawksam dih i an hloh dih tawn ko.

Nawlbia panganak nihhin, “Na nu le na pa kha an that, an fim i thlaraumi an si ahcun va upat hna” tiah a ti lo. A ti hrimhrim lo, kan nu le kan pa an si ko caah tluangte in kan upat hna a herh. Kan nu le kan pa hna hi derthawmnak le tlin lonak ngei ko hmanh hna selaw Khrih ah kan nu le kan pa upat hi kan i ralrin a herh. Pathian vel thawngin kan bia in siseh, kan tuahsernak zongin kan upat hna lai. Cuti kan tuah ahcun Pathian pennak chungah kan ro kha a tha lai i kan hmuh lawng hmanh si loin kan rocomi cungah kan chan a sau lai” tiah biakamh kan si. Khrih ah kan nu le kan pa hna nih an kan pekmi rian le thluachuah kha thate in kan kilkawi ahcun, fapa tla pa bantuk khan cu kan ro cu tuan ah an lotlau dih ti lai lo.

Joshua angan hleikua a dongh lei i kanrelmi cu “Cun ram cu an covo cio ah an i phawt dih tikah, Israel mi hna nih cun Nun fapa Joshua kha anmah lakah vo pakhat an pek. Bawipa nawl pek bangin a kalmi hna khua, Efraim tlang ram i a ummi Timnath-serah kha an pek; cu khua cu a ser than i a chungah khua a sa (19:49-50).

Joshua nih Israel phun 12 hna cu vo a phawt dih hna tikah, anih zong nih a covo kha a hal hna. A phun

hawi umnak tlang ram kha a si i Efram mi umnak kha an pek. Joshua thimmi cu Timnath-Serah a si i a sullam cu “Tinvu tampi” asiloah “Thluachuah lethnih” tinak a si. Hi min hi Joshua roco mi ahhin aa tlak ngaimi a si. Elisha nih thluachuah lethnih a hal peng bantuk khan, Joshua zong Pathian nih a pekmi ahhin zumtlak le teima tein a ummi a si. Joshua le Kaleb lawng hi Izipt ram ah a chuakmi biakam ram a lut khomi an si. Joshua lawng Moses a hun changtu ram hruaitu ngeihchun cu a si. Joshua nih a rianṭuan chungah palhnaṅ tampingei ko hmanhsehlaw, Baibal chungah a sualnaṅ aa ṭial lomi pa a si. Joshua cu thluachuah tampi hmu dingah aa tlami a si i taksa lei in Timnath-Serah co dingin siseh, zungzal Pathian pennak ah a thlarau laksawng hmu dingin aa tlakmi hrimhrim a si ko.

Joshua Angan 20

Himnak Khua Sernak

“Cun Bawipa nih Joshua cu a chonh i Israel mi hna cu, Moses in nannih sinah ka chimmi himnak khua kha ser hna u, khika ah timhcianak um lo le hngalh loin mi a that sualmi nih a zamnak hnga; nannih caah thisen phuhlamtu sinin himnak khua an si lai. Hi khua pakhatkhat ahhin a va zam lai i khua luhnak kutka ah cun a dir lai i khi khua upa hna sinah khan a kong cu a va chim lai; cun annih nih khua chungah cun an luhpi lai i hmun an pek lai i anmah sinah cun a um lai” (Joshua 20:1-4).

Joshua cauk a ngan 19 a changtu ahhin Israel mi hna caah Bawipa nih himnak khua caah a chiahmi khua kong kan hmuh. Hngalh loin mi a that sualmi hna nih himnak an hmuh khawhnaṅ lai Pathian nih khua paruk kha a thimpiak hna. Hi khua hna lakah pakhat i a va zam khawh a si ahcun, a zammi pa nih khua upa hna sinah khan a kong cu a va chim lai. Lai a nawnmi kongah a sualnaṅ an hmuh lo ahcun, a zammi pa cu a thimi chungkhar hna lakah hmun kha an pek ve lai.

Himnak khua he pehtlai in thlarau lei sullam lehnak kha Hebru cakuat chungah kan hmuh. Cuti kan chimmi cu, Cucaah a sin i him tein a ummi kannih nih cun kan hmai i a kan chiahpiakmi ruahchannak kha raṭṭha ngaingai in fekte in kan i tlaih” (Heb. 6:18). Salm caṭialtu pa nih cun Bawipa cu kan himnak a si tiah fiangte in a langhter, “Himnak hmuh duh ah Cungnung Bik kha a fuhmi le Lianngan Bik huhphenhnak chungah aa dormi nih cun, Bawipa nangmah cu a ka chanhtu le a kan hupphengtu na si! Nangmah cu ka Pathian na si nangmah cu kan bochan” an ti lai. Zan i a chuakmi ṭihnung kha na ṭih hna lai lo, chun ah ruahphak loin a chuakmi cantiang zong kha na ṭih lai lo; muilak i a ummi rai zong kha na ṭih lai lo i chunceu i mi a that cuahmahmi ngal eu zong kha na ṭih lai lo. Na pawngah mi thongkhat an thi ko lai, na velchum ah thonghra zong an thi ko lai, Sihmanhselaw, nang cu zehmanh nih an tong lai lo. Mi ṭha lo cu zeitindah dantatnak an in kha na zoh lai i na hmuh lai. Bawipa cu chanhtu ah na ser i Cungnung Bik cu hupphengtu ah na ser caah zehmanh nih an tlun hnawh kho lai lo i vanchiatnak zehmanh na inn a phan lai lo” (Salm 91:1-2,5-7, 8-10).

Joshua 20:6 chungah mi thattu cu tlangbawi ngan a simi a thih hlan tiang cu khi khua ah a um lai tiah a kan chimh. Cu hnuah amah cu phungning tein a zam takmi amah khua le ram ahkhan a kir ṭhan lai. Titsa phungning cun a thimi chungkhar an thinhun chung caan caah a si. Biakam Thar ah cun kannih cu Tlangbawi Ngan, Bawipa Jesuh Khrih kha kan ngei. Amah thihnak thawngin kannih cu sualnaṅ le thihnak phung chung khan kan luat i kan nunnak caah Pathian nih a kan tinhpiakmi le covo ah hmasa kan rak sining ahkhan kan kir ṭhan kho cang.

Joshua Angan 21

Levi Mi Khua Hna

Cun Levi chung upa hna cu tlangbawi Eleazar le Nun fapa Joshua le Israel mipun hna i an chung cio lu hna sinah cun an ra i Kanan ram chung i Shiloh khua ah cun annih sinah, “Bawipa nih kannih cu umnak khua hna le kan saṭil ca i tlonnak ram pek dingin Moses sin in nawl a rak pek cang” tiah an ti. Cucaah Bawipa nawl peknak bangin Israel mi nih Levi mi hna cu a tanglei khua hna le saṭil tlonnak ram hna hi an ro chungin an pek hna. Israel mi hna covo lakah Levi mi khua hna cu a dihak ah sawmli le pariat, an saṭil tlonnak ram cio hna he

an si” (Joshua 21:1-3,41).

Israel phun lakah a donghnak i vo pek dingmi phun cu Levi miphun hna hi an si. Hi hna phun lawng hi Kamhmi Ram ah covo a dangte in an phawt lomi hna phun cu an si. Annih miphun hi titsa lei covo an pek lomi upat tlak thil tu a si deuh. Joshua 13:33 ah fiangte in a langhtermi cu, Sihmanhselaw Levi phun cu Moses nih ro a pe hna lo; an sinah a rak chim bang khan Bawipa Israel Pathian cu an ro cu a si”.

Ram an co lo can ai ah, Levi phun chungkhar hna nih cun ram chung i khuapi dangdang hna tu ahkhan an um. Peng 12 chung i miphun dang cio umnak khua sawmli le pariat kha annih cu pek an si.

Zeiruangah dah Levi phun hna caah hawi tluk loin timhtuahpiak khun an si hnga? Pakhatnak ah cun rak phuan chung cia bantuk khan Simeon le Levi phun cu chiatserh an rak si ruangah a si lai. Anmah dinnak i put i lai an nawnmi sualnak ruangah, an pa nih a rak phuanmi cu, “An thinhunak cu tih a nun tuk caah an cungah chiatserhna nih tlun hnawh seh, an thin linhnak cu a puarhran tuk caah chiat nih tlun hnawh ko seh. Jacob ram chungah ka thek hna lai i Israel mi lakah ka then dih hna lai” (Gen. 49:7). Simon kong ah cun, phun nga deuhmi Judah tangah khan an um taktak caah hi chiatserhna hi a tling taktak. Hi chiatserhna hi Levi miphun hna ca zongah a tling i Israel mi lakah thek dih in an um.

Sihmanhselaw an caah sang deuh in khuaruahpiaknak a hung ummi cu phundang hna lak i khuapi ahkhan Levi mi hna thek dih an sinak hi a si. Levi mi hna nih an tefa hna cung i biaceihnak caah an vainam cu anmah dinfelnak langhternak caah an rak hmanmi cu, a hnu ah cun Levi mi hna nih an vainam cu Pathain dinnak ah an hmanmi hi kannih ca zongah i cawn tlak a si ko. Cu thil ruangah cun Levi miphun nih laksawng an hmu i an i theknak ahkhan chiatserhna kha thluachuah ah aa mer dih.

Levi miphun hna nih biaceihnak caah an vainam kha voihnihnak i a hmannak hi Exodus 32 chungah kan hmuh. Nawlbia pahra he Moses nih Sinai tlang in a hung tum tikah Israel mi hna cu sui cawfa milem kha an tuah i an biak kha a hmuh hna. Kan hun relmi cu, Israel mi cu an duhduh in an um cio ko ti kha Moses nih a hmuh. Cuaah Moses cu riahhmun kutka ahkhan a dir i, “Ahodah Bawipa lei tang nan si? Bawipa lei a tangmi cu hika ahhin ra u” tiah a au. Levi mi vialte kha a sinah cun an i pum i annih cu a thawh hna i, “Bawipa Israel Pathian nih annih nih an vainam kha i lak hna se law hi kutka hin khi kutka tiang riahhmun chungah hin i chok hna seh, cun an unau si hna seh, an hawikom si hna seh an innpa si hna seh, that hna seh a ti” tiah a ti. Moses nih a fial hna bang khan Levi mi nih cun an tuah i cu ni ah cun mi thong thum an thah hna. Moses nih Levi mi cu a thah hna i, “Nihin ahhin Bawipa tlangbawi riantuan awk ah nan i thleidang cang i cu nan i thleidannak cu nan fale hna le nan unau hna nan thah hna thawng hin a si; cucaah nannih cu Bawipa nih nihin ah thluachuahnak cu an pek hna” a ti (Exo. 32:25-29).

Tuan deuh liaoh khan cun anmah dinnak biaceihnak caah an vainam cu an rak hman caah chiatserh an rak tong. Atu ah cun Levi mi hna nih a voihnihnak an vainam an hmanmi nih Bawipa chiatserhna in a luatter hna i thluachuah an hmuhnak kan hmuh. Moses nih a riantuannak a dongh lei sang ah hi thluachuahnak hi a phuan i Jakob nih a thih lai ah Levi mi cungah chiatserhna a rak phuan he khan aa lo.

Hi thluachuahnak cu Deut. 33:8-11 ah aa tialmi kan hun rel thanmi cu, “Cun Levi kong ah ‘Na Thumin le na Urim cu na mithiang Manasseh ah na hneksak i Meribah ti ah na zuarmi sinah um seh; a nu le a pa kha ‘zei ah ka rel hna lo’ a ti. A unau kha ruakawp a cheuh hna i a fale kha a theihngal hna lo, zeitindah na bia kha an zulh i na biakamnak kha an ulh. Jakob kha na phunglam, Israel kha na phungbia an cawnpiak lai. Nangmah hmaiah zihmui le na biaktheng cungah pum khanghthawinak an chiah lai. Maw Bawipa, a chawva kha thluachuah pe law a kut riantuanmi kha cohlanpiak ko. A ral hna tawkawng cu khiak tuah. A hotu hna tawkawng cu an thawh than ti nakhnga lo” tiah a ti.

Levi le Simeon nih an khua mipa hna kha an thah hna tikah, an farnu ruangah biaceihnak an cungah a tlun cu a si ko. A hnu i Pathian biaceihnak Levi phun cung i a tlin tikah hin, an sahlawh rualchan chungah duhdanh ngei loin an tuan. Israel nih milem an biak ruang i biaceihnak cu an vainam he riahbuk chungah chawh hnawh hna u tiah Bawipa nih a thlah hna. An hmuhmi hna paoh kha an vainam in an tuk hna i an sahlawh, an hawikom le an innpa zong an thah dih hna.

Hi tuanbia hi a hrang ngaimi a si caah a biapi tukmi kha a kan cawnpiak. Mah pumpak dinnak le

Pathian dinnak ruang i thil a tlungmi karlak ahhin dannak fakpi a um i kan sahlawh le hawikom cung zongah hrial loin tuan a hau ko.

Hi ruangah hin, Levi mi hna nih tlangbawi sinak kha Israel mipun hna lakin an comi kha a si. Moses nih a phuan chung bantukin Urim le Shummin cu annih kha pek an si i rimhmu cu Bawipa kha an pekchanh lai i Pathian sinah rai an thawi lai. Pathian nawlbia kha phundang hna sinah cawnpiaknak nawl kha pek an si. Levi mipun hna cu Biakam Hlun chan riantuantu an si i Pathian fale hna kha dinnak lamhruaitu an si.

Hi riantuan dingah Pathian nih ahodah atu chan ahhin a thim lai? Khrih pum chungmi hna kha ahonih dah Pathian nawlbia cu a cawnpiak hna lai? Mah pumpak dinnak ruangah Pathian bia vainam a hmangmi cu an si lai lo, asinain mah hawikom naihniam le chungkhar cung zongah duhdanh a ngei lomi kha thim an si lai. A si ko, Levi nih amah pumpak dinnak ruangah a pa ning a zahter i chiatserhnak kha a hmuh. Sihmanhselaw, Levi phun nih an nu le an pa hna nakin Pathian dinnak kha upat zia an thiam tikah thluachuahnak kha an hmuh than. Kannih zong kan nu le kan pa upat kha a biapi tukmia si ti kha kan hngalh lai i, asinain a biapi chinchinmi cu zeizong vialte nakin vancung i kan Pa upat hi a si ti hngal hna u sih! Riantuantu hna nih cun Khrihfabu chungah hin chungkhat le hawikom zong duhdanhnak ngei loin Pathian kha upat deuh hrimhrim ding a si (1 Salm 2:29-30).

Levi mi hna nih Moses sinin thluachuah an hmuhmi pakhat cu, “Jakob kha na phunglam, Israel kha na phungbia an cawnpiak lai” ti hi a si. Zeicahtiah Levi mi hna cu mipun cawnpiaktu ding ah thim a si i Jakob chiatserhnak cu thluachuah ah aa mer cang. Levi mi hna cu thek dih an si i ram chung i khuapi ah an um tikah, mipun hna caah ‘cite’ le ‘ceunak’ si khawhnak kha pek an si lai (Matthai 5:13-15). Zeicahtiah annih cu anmah bingte in covo an ngei ve lo i midang sinah khan an um lai i cawnpiaktu an si lai. Ram chungah titsa in ro comi can ai ahkhan Pathian le minung sin i an riantuannak kha an ro a si ko. “Sihmanhselaw, Levi phun cu Moses nih ro a pe hna lo; an sinah a rak chim bang khan Bawipa Israel Pathian cu an ro cu a si” (Joshua 13:33).

Levi phun hna nih chiatserhnak in hram an thok tikah, an thluachuahnak a dongh ti kha kan hmuh. Hihi kan Bawipa nih tuah a duhmi cu a si, “Pathian nih chiatserhnak cu thluachuahnak ah a canter” (Deut. 23:5; Neh. 13:2). Kan Bawipa Jesuh nih a kan cawnpiakmi cu, “chiat an serhtu hna kha thluachuah va pe hna” (Luke 6:28). Kan rel than rihmi cu, “Khrih nih nawlbia chiatserhnak chung khan a kan tlanh cang, cu a kan tlanhnak cu kan ca i chiatserhmi i a cannak thawng khan a si i chiatserhmi i a hung i can cu Cathiang nih, (Thingkung cung i thlaimi paoh cu Pathian chiatserhmi an si) Pathian nih Abraham sinah a kamhmi thluachuahnak kha Khrih Jesuh thawngin Jentail mi sinah pek siseh ti kha a si” (Kalati 3:13-14).

Amah Bawipa Jesuh kha zul ding le upat dingin kan kawl taktak a si ahcun, chungkhar cungah chiatserhnak a tlungmi vialte temtawnnak, chiatserhnak hna zong kha a kan thlenpiak dih ko lai. Tuanbia chung i chiatserhnak a fak bikmi zong kha sualnak ngei lo Pathian Fapa nih vailam ah a thih tikah Pathian nih a phoih dih i a lianngan bikmi thluachuahnak ah a kan thlenpiak cang! Vailamtahnak thawngin sualngaihthiamnak kha kan co i Khrih a zummi cu thianternak an hmu (Lamkaltu 26:18). Bawipa rian kha kan tuan i mipun tampi hna lakah rocotu kan si (Salm 2:8). Khrih nih vawlei ah a rat than i a uk tikah Pathian kum thong pennak chungah kan lut kho ve lai (Matthai 25:31-35). Zungzal in Pathian a simi nih bia a kan kamhmi cu, “Teitu a simi paoh nih hihi ka sinin an hmuh lai: keimah cu an Pathian ka si lai i annih cu ka fa an si lai” (Bia. 21:7).

Kan lungthin dihlakin amah cungah kan chiah tikah Bawipa nih khamhnak rian kha a tuan i chiatserhnak vialte cu thluachuahnak ah a kan merpiak. Sihmanhselaw, ralkah zongin a hmaan kho ve ko. Bawipa kha kan phill a si ahcun, thluachuah lianngan zong kha chiatserhnak ah aa mer kho ko! Luke a ngan 15 chungah fapa tla pa kong ahkhan hi kong hi kan hmuh khawh. A pa sinin a thami ro kha a hmuh ko, a sunglawimi thluachuah vialte cu soal i a tluk tikah cun amah ka chung lila ah leidip ah a cang dih.

Kan hmuhmi thluachuahnak siseh, chiatserhnak kan co khawhnak vialte a tawh cu kan lungthin umtuning hin rak si ko. Kan lungthin kha Bawipa leiah aa mer a si ahcun thluachuahnak rosung kha kan hmuh ko lai. Hlanlio kan nunning ruangah chiatserhnak kan zuunmi vialte le kan pupa hna ruang zongah siseh Pathian duhnak tuah dingin kan thinlung dihlak kan kawl ahcun chiatserhnak kha thluachuah ah aa mer ko lai! Rom 5:20 nih cun, “Sihmanhselaw sualnak a karhnak hmun ahkhan Pathian vel cu a karh chinchin ve” tiah a ti.

Joshua angan 21 ah aa tialmi cu, Levi miphun hna hi a hnu bik i umnak hmun a khuarmi cu an si tiah a ti. Joshua cauk chungah annih kha umnak khua pek an si tikah ram an thekning hna a chimmi cu, “Cu bangin Bawipa nih Israel mi cu an pupa hna sinah pek awkin chiat a sermi ram vialte kha a pek hna. An tei i khika ah um hmun an khuar. Cun Bawipa nih an pupa hna sinah chiat a rak ser bantukthe khan, a kenkip ah dinhnak kha a pek hna. An ral ahohmanh nih an celh hna lo, zeitintiah Bawipa nih an ral hna cu an kut chungah a pek hna. Bawipa nih Israel chungle hna sinah biakamnak tha a sermi vialte lakah khan pakhat hmanh pakpalawng ah a cangmi a um lo; a dihlak tein a tling dih” (Joshua 21:43-45).

Hi a donghnak kan zoh tikah Bawipa nih a biakammi cu a tlinternak a si i cauk chung i tinhmi a muru cu a si. Kan Bawipa Jesuh nih khamhnak rian kha tlamtling tein a tuan dihmi kha rak phuan chungmi hmanthlak kha a si. Joshua nih a rianuanmi cu tlam a tlinh i amah chan mi hna cu an ro kha a coter hna i dinhnak ah a hruai hna. “Bawipa nih a kenkip ah dinhnak kha a pek hna. Israel chungle hna sinah biakamnak tha a sermi vialtre lakah khan pakhat hmanh pakpalawngah a cangmi a um lo; an dihlak tein an tling dih” (Joshua 21:44-45).

Sihmanhselaw, kannih kan ruah dingmi cu zeitindah Joshua chanmi hna nihhin Pathian nih a mi hna caah a timhpiakmi hnakha profet chimchung ningin an co i an i dinh khawh timi hi a si ko. Cu pin ah, Bawipa nih a mi hna cu hi biatak hna hi lianngan deuh in a tlin khawhnak ding caah hruai a timh hna. Hi kong hi Hebru angan pali chung bia nih a kan cawnpiakmi cu Pathian nih a hnu deuh ah David chan minung hna kha amah dinhnak chung i a luhpinak hna kong a si. Hebru cauk nih a chimmi cu, “Joshua nih Pathian dinhnak chungah khan a rak luhpi hna ahcun, cu hnuah cun Pathian nih ni dang, timi kha a chim ti hnga lo. Cuaah Pathian mi hna cu Sabbath dinhnak nih khan a hngah ko rih hna, zeicahtiah Pathian cu rian in aa dinh bantukin Pathian dinhnak chungah a lutmi cu an rian in an i din ve” (Hebru 4:8-10).

Bawipa nih a mi hna kha hmailei ah a hruai hna tikah, amah tinhmi kha sang deuh in a tlamtlin khawhnak lai thango chin lengmang in lut ding kan si. Joshua nih amah chanmi hna cu ram kha an co i an i dinh khawhnak dingah a hruai hna, Sihmanhselaw tlam a tlin taktak rih lo caah chan tharmi hna cu luh deuh rih a herh. Hebru cauk nih akan chimhmi cu Joshua nih Pathian mi hna cu amah dinhnak tlamtling ahkhan a hruai hna lo. Ni roconak cu David nih hla deuh in a hmuh caah Solomon pennak daihnak, hlawhtlinnakle a sunglawimi lam kha a rak timhlahmnak kha a si cu. Hi lio caan ah hi bantukin rak si hmanhsehlaw, Siangpahrang nih Zion in a pennak ram cu a rak uk dih i a ngan deuhmi a sunglawi chinchinmi daihnak in uknak a ra lai tiah profet phuan chungmi a tlin hlan tiang kha a si ko lai. A nehnu ah Pathian mi hna nih Biakam Thar caan thennak velngeihnak ah an hun luh tikah, Khrihfabu hmasa hna nih hi thil cu an hngalh then te ko lai. An comi le an uk khawhmi hi ram pakhat lawng a si lo, thawngthabia kha an chim i Pathian pennak kha ram kipah dirh ding a si. Cu nakhmanh cun, sinhnak chung i an luh khawhnak ding caah cun Thiang Thlarau thawngin Pathian tinhpiakmi kha tlam a tling kho lai. Khrihfa tampi hna nih cun anmah tita zuamnak le rianuanak in Pathian duhnak kha tlinternak an timh tawn.

Hi ni donghnak caan, Joshua chan Khrihfabu hna caah cun hi nakin a sunglawi deuhmi a dang a tlam a tlingmi Pathian dinhnak chungah tlamtlingte luhnak nawl pek kan si. Khua khat hnu khuakhat, ram khat hnu ram khat ah kal in Satan thawnnak le uknak cu kan doh cang lai. Vawlei pumpi mission rianuanakle thango hmanh miphun kip le ram kip ah Pathian pennak a dir kha kan hmuh lai. Hi bantuk rian nganpi hi cu kanmah thawnnak thawng cun tlam a tling kho lai lo. Pathian mi hna nih “Jordan an tan” bantuk le vailamtah thihnak le a thawh than thawnnak hmual tonmi thawng khan Khrihfabu cu tlamtling tein dinhnak ah luhpi an si lai.

Sihmanhselaw, Joshua chan minung hna sinah sunglawi ngai in thil a rak tlungmi hna zong kha a lianngan deuhmi le a tlamtlingmi Pathian rianuanak i luhnak ding caah rak timhlahm chungnak a si ko. Khrihfabu chan a dih tikah Khrih nih kum thong khat a uk lai tiah vawlei pumpi tuanbia ah a rak ummi kha tlam a tling cang lai. Khrih nih Jerusalem in a uk tikah cun, amah pennak a simi dinnak, daihnak le lawmhnak in vawlei cu a uk lai. Satan le a hawile pawl cu dongh hngal lo khor ah thlak an si lai, vawlei cungah raltuknak cu a dih lai. Daihnak, rumnak le Pathian hngalhnak in vawlei cung cu a khat cang lai (Bia. 19:11, 20:6, Isaiah 24:21-23; Mikah 4:1-4, Isaiah 11:6-10; 56:19-25; Habakuk 2:14).

Vawlei cung pumpi ah kum 1000 uknak a phak lio caan ahhin Pathian mi le fa hna caah zeibantuk

dinhnak dah an hmuh lai! Hihi cu vanthar le vawlei thar chung i a sunglawi deuhmi zungzal Pathian pennak caah rak timhlahmpiaknak lawng khi a si ko.

Pathian nih a mi hna caah a rak tinhpiakmi a kauhning kha kan zoh than tikah, Joshua nih kawh a sinak kha tlam a tlinh bantukte in kannih zong Pathian nih a kan pekmi rian kha kan tlamtlinh khawhnak lai tha tein kan ruah a herh. Pathian nih kan nun ah a kan timhlahmpiakmi kha zumhtlak tein kan tlamtlinh a si ahcun a ra laimi Pathian pennak chungah dirhmun tha kan hmu ko lai (Matt. 25:21, 19:27-29). Joshua nih amah chan mi hna cu dinhnak ah a hruai hna. Hi ruangah Timnath Serath, “Thluachuah Lethnih” kha a co. Joshua nih hi bantuk hmuntha kha a co caah Pathian pennak chungah laksawng tha tha a hmuh te ko lai.

Joshua Angan 22:1-9

Phun 2 (1/2) Kha An Comi Ram Nichuah Leiah A Thlah Hna

“Cun Joshua nih Reuben mi le Gad mi le Manasseh phun cheu kha a auh hna i annih cu, “Bawipa sal Moses nih nawl an pekmi vialte hna kha nan tuah i nawl kan pekmi vialte hna kha nan tuah i nawl kan pekmi hna vialte ah ka bia kha nan ngaih; hi can riamruam nannih nih nan unau hna kha nihin tiang thlahthlam loin nan um i Bawipa nan Pathian nih an fialmi hna cu tha tein nan tuah. Cun atu cu Bawipa nan Pathian nih nan unau hna kha bia a kam hna bangin dinhnak a pek cang hna; cucaah kir cang u law, Bawipa sal Moses nih Jordan khat lei ralah an pekmi hna nan covo a umnak ram i nan inn ahkhan kal tuah u” (Joshua 22:1-4).

Kanan mi hna kha an tei dih hna i Israel miphun hna nih pekmi kha an co dih tikah, Joshua nih phunhnh i le a cheu hna cu Jordan nichuahlei ahkhan a kirter than hna. Israel mi hna nih an nunnak le an ra, hmangin Pathian pennak kha zeibantuk in an thanchoter khawh lai ti lawng hi a tangmi a si ko cang.

Comi Ram Zohkhenhnak

(Joshua Angan 22:10-24:33)

Hi a donghnak bik cheu chungah Joshua cauk nih aa tinhmi kha kan hmuh. Israel mi hna nih ram cu an tei i an um hnawh cang. Hmailei chan ah zeitindah kan ngeih peng khawh ning a si lai ti kha an ruah bikmi a si ko cang.

Abraham sinah biakamnak a phak thokin kum 500 tiang hrawng ahhin hi ram cu Israel mi hna nih an hun co khawh. Chan tampi riantuannak hmangin Kamhmi Ram ah cun an hung um kho i hmeilei chan tiang thate zohkhenh a herh zia kha an hngalh. An hmuh ciami le an ngeih cangmi laksawng hna zong kha hmailei chanmi hna nih tha tein an kilven i an co thainak ding kha thil biapi a si. Hi thil hna hi Joshua cauk nih a donghnak ah thil kan hmuh ding cu an si.

Joshua Angan 22:10-34

Biaktheng Tette khannak

“Kanan ram chung i Jordan tiva kam hrawng ram kha an va phak tikah Reuben mi hna le Gad mi hna le Manasseh phun cheu nih khan hika ah Jordan tiva pawngah biaktheng nganpi pakhat an ser. Cun Israel mi hna nih, “Zoh hmanh, Reuben mi hna le Manasseh phun cheu nih Kanan ram ramri ah Jordan tiva kam hrawng ram chung Israel mi hna ta a simi lei pheh ah, biaktheng pakhat an ser” tiah mi nih an chim kha an theih. Cu kong cu mi nih an theih tikah Israel mi hna an dihlak kha doh hna awkah Shiloh ah an i pum” (Joshua 22:10-12).

Joshua nih phun cheu ralkap pawl kha Jordan nichuah lei i a thlah hna hnu ahkhan, an ram lei ah an kir i biaktheng nganpi kha an ser colh. Hi nih hin phun dang pawl kha an thin a hunter ngaingai hna. Bawipa nih Moses sinah nawl a pekmi nakkhan a dang a thar biakning kha tuah an timh caah sualnak ngapi a si ti kha an hngalh. Jordan nitlak leiah a ummi phun ralkap hna nih raltuk dingin an i tim colh. Shiloh ahkhan an i pum hna i cuka hmun cu Moses puan biakthlam le Pathian biaktheng taktak a umnak a si.

An unau pawl doh dingah an i thawh hlanah hin, hruaitu upa hna kha a palhmi phun hna nun va chimh cawnpiak dingin Jordan khatlei ral ah an hei thlah hna. Hi ti an i tonnak ahhin nichuah lei ah a ummi phunhnhil le a cheu nih cun biaktheng cu raithawinak ah cun an hmang lai lo i asinain tette siding ca tu ah an hman. Hi thil hna hi Jordan tiva kap hnih i a ummi hmailei chan hna caah theihter thannak ah a cang lai i nichuah lei kap ah a ummi phun hna zong nih Bawipa rian kha an tuan lai i Moses biakthlam ahkhan an biak ve lai. Nitlak lei kuzale hna sinah nichuah lei um phun mi nih an chim vemi cu, “Sihmanhselaw kan hmailei ah nan fale nih kan fale cu, “Bawipa Israel Pathian he ze i tlahnak dah nan ngeih? Zeitindah nannih Reuben mi hna le Gad mi hna, nannih le kannih kar ah Bawipa nih Jordan cu ramri ah a ser ko; Bawipa chungah nannih cu covo nan ngei lo” an ti hna lai ti kan phan caah kan tuah cu a si. Cu bangin nan fale nih kan fale cu Bawipa biak kha an ngolter sual hna hnga. Cucaah kannih nih, “Khanghthawinak caah si loin raithawinak caah si loin kannih le kannih karlak ah bia hngaltu a si i Bawipa rian cu kannih nih amah hmaika ah kan khangh thawinak le raithawinak le daihnak thawinak in kan rak tuan ve tinak caah biaktheng pakhat ser u si; hmailei ah nan tefa hna nih kan tefa hna cu, “Bawipa chungah covo zeihmanh nan ngei lo” an ti sualnak hna hnga lo; tiah kan ti (Joshua 22:24-27).

Hi riantuannak nih hin nitlak lei phun hna cu an lung a ton hna. Hi biaktheng an sakmi cu i dohnak caah a si lo ti kha an hmuh, sihmansehlaw hmailei tefa hna nih Bawipa rian an rak tuannak kha an philh lonak ding caah a si. Cun hi kong nih Israel mi cu an lung a ton hna; Israel mi nih Pathian kha an thangthat i Reuben mi hna le Gad mi hna an umnak ram hrawh awk i annih doh awk kha an ceih ti lo. Reuben mi hna le Gad mi hna nih cu biaktheng cu Ed tiah min an sak; zeitintiah cu biaktheng cu Bawipa cu Pathian a si tiah kan karlak ah biahngaltu a si caah” an ti (Joshua 22:33-34).

Tette caah an sermi biaktheng cu hmailei chan tefa hna nih Bawipa rian an tuanni philh lonak ding caah a si. Kannih ca zongah hmuhsaktu tha ngai a si, kan tefa hna zong kha thinlung dihlakin Bawipa hnu an zulh pengnak lai kan fial chih ding caah a si.

Tuanbia zong nih atu le atu a nolh than lengmangmi cu, Bawipa hnu zulh ding caah man sangpi a pemi phun hi an um ti hi a si. An fale chan tiang zongin luatnak thar he Bawipa rian cu an tuannak peng khawhna ding caah serhsatnak le hremnak, tukvelhna le raldohnak tiangin an in. Sihmanhselaw, an pupa hna nih hi bantuk tukvelhna an in ruangah an tefa hna nih daihnak le rumnak kha an co i cu bantuk man an pekmi kha an philh tikah cun, lum hrot lo, kik hrat lo dirhmun ahkhan an phan i thlarau lei ah an tumchuk chin lengmang. Zumtu hna zong a cancan ah cun khuachia riantuannak doh dingah hmunkhat ah dirti loin anmah le anmah tu hi an i doh tawn. Cucaah nichuah lei a ummi phun hna nih dohnak ding kawl in hi biaktheng cu tehte caah an sermi a si.

Kannih zong kan taksa le thlarau fale hna zong a fiangmi langhna le Pathian kha thinlung dihlakin a riantuannak ding caah tei a mami le a pe thenmi kan si a herh. Hi mipun hna nih an tefa hna caah biaktheng an ser bantukin, kannih zong “Chungkhar biaktheng” ser ding kan zuam ve lai i kan chungkhar dihlakin thlacamnak, biaknak le Baibal cawnnak kha hmaan tein kan ngeihpi hna lai. Kan fale hna hi zarhpi zing Sunday School i kan thlah hna lawng khi a za hrimhrim lo, kannih zong nih Bawipa lam ah kan biaknak phung ningin kan hruai hna lai. Zarh fate in ahhin Sunday School ah cun Baibal chung bia hi minute 10 in 15 chung lawng hi an cawnpiak tawn hna. Cuticun Khrihfa hngakchia hna cu zarh khat chungah minute 20 in 30 chung hi TV zohnak maw asiloah uahthuh relnak in an caan an hman tawn. Zarh khat chung an caan hmanmi ahhin 1% lawng hi Pathian bia cu an chungah an khumh caah Baibal phunning cun an nung in cawnpiaknak cu an zul kho hnga tiah na ruat maw? Kan fale cu Cathiang cawnpiaknak ning lo le vawlei phun sining in 99% in nun i thanter cu kan duh kho hnga maw? Duh hlah, an ruahnak le an thinlung ah ‘biaktheng’ cu kan serpiak hna lai i cun pei Bawipa riantuan in an than lai cu.

Nu le pa hna nih nifate pumhna kha serpiak i Baibal relnak le thlacamnak kha ngeihpi peng ding an si. A no deuhmi fanau hna cu Baibal hmanthlak hmangin nifate cawnpiak ah a tha. Zanlei ah chungkhar tlin dih tikah chungkhar pumhna hi tuahpi lengmang ding an si. Khrihfa video hna le hla hna hi duh awk thil le thlarau lei thazaang petu ngai an si. Hngakchia cu an ih lai ah Baibal tuannak chimh le thlacampi ahcun an i cinken khawh i mangtha in an i hngilh kho. Kan fale hna an thlarau nun a fehcah khawhna ding caah hi bantuk thil le ruahnak tha a dang zong kha hmang in bawm hna u si.

Thlarau lei langhna a ngeimi cu asiloah pa zong anmah fale hna cungah hin duhpiaknak hi tam khun in an ngei i asiloah a hlawhtlingmi fale tampi cung zongah a si kho fawn. Phungthlukbia 13:22 ah a kan chimhmi cu, “Mithami nih cun an fa fachin tiang in ro an chiahpiak hna” tiah a ti. Lamkaltu Paul zong thlarau fale hi chan thum tiangin a hmuh i, 2 Timote 2:2 chungah, “Tehte tampi hna theih ah ka chimmi bia kha i lak law, midang a cawnpiak kho ve dingmi, na zumhmi hna kha va kenter hna” tiah a ti. Cathiang chungah hin Pathian thluachuah kha hmailei an tefa hna ca tiang a phakter khomi pa tampi konglam chim ding kan ngei hna, zeicahtiah an tefa le hna kha dinnak lam zul dingin an cawnpiak khawh hna caah a si (Gen. 18:18-19, Jer. 35:18-29). Kan tita le thlarau tefa hna cungah Isaiah 59:21 i biakamnak hi kan dihlak in kawlaw cio hna u sih, zeitindah a chim tiah, “Cun hi biakamnak cu nanmah he ka ser lai, cu biakamnak cu hitihin a si lai: Ka thawnnak in ka phunglam le cawnpiaknak kha kan pek hna, cun atu thawkin hmailei caan vialte chung tiang hi phunglam le cawnpiaknak cu nanmah le na fale le nan tefa fachin hna nih nan ngaih awk le nan i cawnpiak awk a si” a ti.

Joshua Angan 23

Joshua Nih Israel Hruaitu Upa Rovuih Bia

Joshua cauk a donghna lei angan pahnih chungah Kamhmi Ram an tei i an uk hnu kum 23 chung kong hi kan hmuh. A karlak kum hna hi cu aa tial lo. Hi kum chung hna hi cu Israel mi hna nih daihna le thanchonak lei ah an hman caah an chungkhar, an inn lo le an khua caah manh lo ngai in rian an tuan. Ram chungah dinhna caan kha Bawipa nih a pek hna i khuaihli le cawhnuk he an i ciah ko cang. Anmah nih an sak lomi inn lian inn dawh le a chung thilri thatha he khat in an cin lomi mitsur dum le Olive kung hna zong kha an ngeih chih. Sihmanhselaw, hi bantuk thluachuah an hmuh hlanah Bawipa nih a chimh chung hna bantukin, hi biakamnak le ralrinnak kha a pek hna, “Bawipa kha nan philh sual nakhnga lo i ralring tuah” (Deut. 6:12).

Hi daihna le hlawhtlinnak kum a laifang hrawngah hin cun ram cu duhsah tein a thleng cuahmah. Joshua ralkap lakah pa raltha hna zong kha an hung upa ve cang i ka pu tiah auh an si cang hna. Moses le Joshua hruainak tangah Bawipa nih thil ti khawh thannak he an cungah rian a tuanmi hna cu caan dang le chanthar hna caah cun tuanbia hlun ah an cang dih. Kanan ralkap that lonak nih ram chungah philh khawh loin ai a awh cang caah daihna in chawleh chawhrol a duhmi hna zong kha Kanan mi he cun an um ti ko cang. Joshua nih a tar lei sangah hi thil vialte cu a cuanh in a cuanh ko cang hna.

Joshua Angan 23

Joshua nih Upa pawl a forh hna

Joshua cu a tar tuk cang i a thi deng cang ti kha a hngalh caah, a donghna bik ah a mi hna cu rovuihna le ralrin peknak in a caan kha liamter a duh. Hmasa bik ah ram chung hruaitu upa vialte hna cu a auh hna i bia a chimhmi hna cu a ngan 23 chungah hin aa tial. Cu hnu ah ram chungmi vialte kha a pumh dih hna i a bia hmanung bik cu Joshua cauk angan 24 chungah hin aa tial.

Israel hruaitu hna sinah bia a hun chimmi cu, “Caan saupi hnuah, Bawipa nih Israel mi hna cu an velchum i an ral hna sinin dinhna a pek hna tik le Joshua cu a upat i a tar ngaingai tikah, Joshua nih Israel mi vialte an upa hna le an lu hna le an biaceihu hna le an bawi hna kha a auh hna i annih cu, Atu cu ka upa i ka tar ngaingai cang; cun nannih nih Bawipa nan Pathian nih hi miphun vialte hna cungah nan caah a tuahmi kha nan hmuh cang, zeitintiah nannih an dohpiaktu hna cu Bawipa nan Pathian kha a si. Zoh hmanh u, nannih cu a tang rihmi miphun hna kha nan phun cio caah roah kan pek hna, ka tei ciami miphun vialte hna he, Jordan tiva thokin nitlak lei ah rili ngan tiang. Bawipa nan Pathian nih nan hmaiah a dawh hna lai i nan mithmuh phak lo tiang a thawl hna lai; cun Bawipa nan Pathian nih bia an kam hna bangin an ram cu nan co lai. Zeitintiah Bawipa nih nan hmai in angan le a thawngmi miphun hna kha a dawh hna i, nannih cu nihin hi tiangah a hohmangh nih an in celh hna lo. Bawipa nan Pathian nih bia an kam hna bangin amah cu an dohpiaktu hna kha a si caah, nan lak i mi pakhat nih

thongkhat kha a dawi hna” (Joshua 23:1-5, 9-10).

Joshua nih upa hna kha a theihter thanmi hna cu Pathian sinah zumhtlak tein um ko u ti hi a si. Bawipa nih Israel mi hna caah a dohpiak hna ruangah a hohmanh nih an doh ngam ve hna lo. Bawipa nih an hmaika in ram ngan pipi hna kha a thawlpiak dih hna caah, Bawipa nih rian kha a lim dihnak lai Amah kha i bochan peng ding a si.

Joshua nih a bia cu a hun peh than i, “Israel mi nih an rian an lim a herhning zia kha tam deuhdeuh in a chim lengmang ko. “Cucaah Moses phungbia cauk chungah aa tialmi vialte kha zulh awk le tuah awkah fek tein um ko u; orhlei ah siseh, kehlei ah siseh pial tak hlah u. Nannih nih hika i nan lakah a tang rihmi miphun hna he hin i cawh lo le an Pathian hna min kha chim lo le cu hna cun chiatser lo le an riantuan lo le an hawi ah kun lo in ... nan i mer i hika ah nannih lakah a tang rihmi miphun hna hi nan fonh hna i nan thit nan lak hna i an nu hna kha nan thit hna i annih nih an in thit ve hna ahcun, Bawipa nan Pathian nih hi miphun hna hi nan hmai in a thawl lan hna lo ti kha fiang tein hngal ko u; Sihmanhselaw, Bawipa nan Pathian nih an pekmi hna hi ramtha hin nan loh hlan tiang nan caah rap le thang le nan hnak i tuknakfung le nan mit chung i hling an si lai” (Joshua 23:6-7, 12-13).

Hi a chimmi bia chungah hin, Joshua nih Kanan ram kong kha voi sarih a telh. Atu le atu a hun chim chan cu Israel mi hna caah hi hna cu tih a nung ngaimi an si ti kha Joshua nih a hngalh caah a si. Ral tuknak lei cun an tei ko hna nain an thawl dih hna lo. Anmah he i cawh bur in um le i thit i vat in an um ahcun an ram cu milem biaknak nih khan a hrawh ko i cu nih cun hmailei kum zabu zeimawzat ah cun ram hrawk ding khan a thang chin lengmang lai i annih cu sal tiangin a hruai ko hna lai ti kha Joshua nih a phan caah Bawipa kha zulh peng awkah ram hruaitu upa hna cu bia a cah peng hna.

Israel hruaitu upa hna sinah a donghnak biacah nih a hun kan hngalhter thanmi cu lamkaltu Paul zong nih Efram khua Khrihfabu hruaitu hna kha donghnak bia a cahmi hi a si. Bawipa hnu kha tlamtling tein zulh dingah a foahfial dih hnu hna ah Paul nih biaceihnak a tlung dingmi kong zongah ralrinnak a pek hna. Tih a nungmi cenghngia le cawnpiaknak hman lo an rak chuak lai tiah ralrinnak a pek hna (Lam. 20:29-30). Joshua le Paul cu profet le a thami thlarau lei pa an si i Pathian mi le fa hna kha a si khawh chungin a bawmtu an si.

Joshua Angan 24

Joshua Bia Hmanung Bik, Biakam Tharchuahnak, Hruaitu Upa Pathum Phumnak

Joshua angan 24 chungah cun Joshua nih a thih lai ah upa hna kha a pumhter hna i bia a cah ta hna. Cu hna lakah ahme 13 chung vialte hi kan hun rel a si ahcun, Cun Joshua nih mi vialte cu hi bangin Bawipa Pathian nih a ti. Hlanliopi ah cun nan pupa hna cu Eufates tiva khatte lei ral ah an rak um. Hi biacahmi vialte hi kan zoh tikah Bawipa bia cu Joshua nih ram caah profet in a rak phuan chung cang. A cauk a hramthawk lio ahkhan cun a rak note rih i hruaitu thar si ding zongah tontemmi tampi a rak ngei lo. Sihmanhselaw a thih lai lei sang ahhin cun Bawipa caah cak ngai in a thangmi profet tlamtling a hung si cang. Bawipa bia a hung thangmi cu, “Ka lak ... ka pek ... ka thlah ... ka hrawh dih ... ka khamh” ti hi a si. Pathian nih a mi hna cu a zohkhenh hna i Kamhmi Ram ahkhan a umter hna. Bawipa nih Abraham tefa hna cu a dawt hna i a thilti khawhnak khan a khuh hna i a zohkhenh hna. (Joshua 24:14-15).

Hi biaphuannak a dongh lei ahhin, amah pumpak in forhfialnak kha a ngei. “Cucaah atu cu Bawipa kha tih u law, amah rian kha lungtak te le zumh awk tlak tein tuan u; tiva khatlei ral le Izipt ram ah nan pupa hna nih an biakmi pathian hna kha hlaw hna u law, Bawipa kha bia tuah u. Cun Bawipa biak kha nan duh lo a si ahcun nihin ni ahhin nan biak ding cu i thim u; Tiva khatlei ral ram ah nan pupa hna nih an biakmi pathian hna maw, asiloah an ram nan umnakmi Amor mi hna pathian hna hi dik; Sihmanhselaw keimah le ka inn chungkhar tu nih cun Bawipa kha kan biak ko lai” tiah a ti.

Joshua donghnak bia nih a hun nenhmi hi cu hmailei an tefa hna nih Bawipa hnu kha zulh peng i ram chugnah tha tein khuasa hna seh ti hi a duh bikmi a si. A bia nih hin te le fa vialte hna cu thazaang a pek tuk hna i mi tampi hna zong nih Joshua tettekhannak hi i lakin, “Sihmanhselaw kei le ka inn chungkhar tu nih cun, Bawipa kha kan biak ko lai” an ti cio. Joshua chimmi nih theipar a hun chuahmi cu 24:31 ah, “Cun Israel mi nih

Joshua nun chung vialte le Joshua hnu i a nung i Bawipa nih Israel mi caah a tuahmi rian vialte a hngaltu upa hna nun chung cu Bawipa rian kha an tuan” tiah kan hmuh.

Patling taktak a simi nih cun ro kha hman thiamnak le thluachuah hmu kho dingin an fale kha an cawnpiak hna i an timhlahmpiak fawn hna. Taksa lei he thlarau lei fale hna hi thlarau lei rao kan pek khawh hna a herh ko. Siangpahrang David zong a tar lei ah cun hi bantuk phur rit hi a ngei ve. Salm 71:18 chungah a tialmi cu, “Atu cu a tar i a sam a par ai cang pat ti in ka kal tak hlah, maw Pathian. Hmailei chan a ra ding vialte sinah na thawnnak le na lianngannak ka chimnak ding ahhin nangmah nih ka umpi ko”.

Bawipa sinah pumpeknak kha a thar in an tuah i Joshua le mi zapi nih biakamnak kha hmunkhat ah an tuah. Kan hun relmi cu, “Cun mi zapi nih cun Joshua cu Bawipa kan Pathian cu kan biak lai i amah awk kha kan ngaih lai” tiah an ti. Cuaah Joshua nih khi ni ah mi zapi hna he cun biakamnak kha a tuah i annih caah Shekem ah nawlbia le phunglam kha a serpiak hna. Cun Joshua nih hi bia hna cu Pathian phungbia cauk chungah a tial hna; Cun lung nganpi pakhat a lak i Bawipa hmunthiang chungah a ummi kuhthing kuang tangah a bunh. Cun Joshua nih mi vialte hna cu, “Zoh hmanh u, mah hi lung hi kan cung i bia hngaltu a si lai, zeicahtiah Bawipa nih kan sinah a chimmi bia vialte kha a theih; cucaah nan cungah bia hngaltu a si lai, nan Pathian cungah nan hrokhrawl sualnak hnga lo,” tiah a ti hna. Cun Joshua nih mi zapi cu anmah le an comi ram cioah a kalter hna” (Joshua 24:24-28).

Joshua nih a tuahmi biakamnak cu tha tein an tial. Fiangte an tialmi an i pumpeknak vialte hna cu tha tein an kilkawi hna i kum 3500 a rauh hnuah kannih nih kan hun cawn then ve. Joshua nih lung nganpi pakhat a lak i mi zapi mithmuh le phill lo dingah a bunh. Cuka hmun cu hmunthiang chungah a ummi kuhthing kung tangah khan a si i, Moses puan thlam i an va kal tik caan paoh ah Israel mi hna rel cawk lo nih an thutnak le an i dinhnak hmun kha a si. Hi a sullam cu hmai lei chan tefa hna nih Bawipa rian kha an tuannak lai hngalh peng dingah Joshua he biakamnak an tuahmi a si.

Joshua cauk cu hruaitu upa pathum phumnak in donghter a si. Kan hun rel hmasa bikmi cu, “Hi thil hna hnuah Nun pafa Joshua, Bawipa sal cu a thi, kum zakhat le kum hra a si ah. Cun annih nih Efraim tlang ram i a ummi Gaash tlang chaklei ah a ummi amah comi timnak -Serah ahkhan an vui” (Joshua 24:29-30). Joshua cu Israel mi hna he Kanan ram an luhnak in kum 30 hnu, tar tlung tein a nun hnuah a thi. An teinak in kum sarieh hnuah, Timnath Serah ah Joshua cu a um. Amah comi ram ah nuam tein kum 23 chung aa din manh. Amah comi ah an vuinak khan cu thawhthannak ni ah a laksawng le a dirhmun kha tlamtling tein a zohkhenh khawhnak ding caah a si. Phungchimtu 11:3 ah cun, “Thingkung cu khuazei lei hoih paoh hmanh in tlu hmanh selaw a tluknak ahkhan a ril ko” tiah a kan cawnpiak. Hi caang nih a kan chimhmi cu, zungzal kan sinak ding dirhmun cu kan thih ni i umtuning khan a si ko lai ti hi a si. Joshua nih Pathian rian kha zumh tlak tein a tuan i a hmuhmi le a comi cu Timnath Serah min sullam bang khan “Thluachuah lethnih” hi a si i cucu an vuinak hmun kha a si.

Joshua cauk a donghnak lei ah an vuimi an hun tialmi cu Josef vuinak hi a si. Hi thil hna a si hlan kum 400 ahkhan Josef cu a thi cang i Kamhmi Ram ah Bawipa nih an luhipi hna tikah ka ruh kha i kalpi u a ti bang khan an kalpi (Gen. 50:24-26). Josef nih ka thih tikah ka ruh kha ka kalpi u tiah a nawlmi hna nih khan Israel mi cu ruahchannak a pek hna i Izipt ram ah harnak kum saupi chung tong hmanh hna seh; a thih hnu ah a zumhnak cu a tlang peng thiam ko. A donghnak ah Kamhmi Ram i an phumnak nih hin Pathian nih a zumh ngaimi a salpa cungah zumhtlak tein thawnnak he tehte a khanmi kha a fehternak a si.

Joshua cauk a donghnak bik i vuinak kong aa tialmi cu Elezar thihnak a si. Amah cu a pa Aaron a thih hnu ah Israel ah tlangbawi ngan a si. Elezar nih Joshua kha Israel mi hna ram an teinak ding le ram i phawtnak i thithruainak ahkhan a bawmh ngaingai.

Hi vuinak hna cu Joshua le amah chanmi hna hmangin Pathian nih a riantuannak a tlamtlinhnak kha a donghnak ah tehte a khan i a kenh chihnak a si. Pathian caah a nungmi cu nun saunak a pek hna ti kha a donghnak bik Pathian lei tettekhannak kan hmuhmi a si. Stephen a thihnak nih Tarsus khuami Saul kha lamkaltu Paul ah a canter bang khan, hnulei in a rak zulmi hna cu hmailei ruahchannak kha a pek hna.

Khrihfa thar ka hung si tikah ruakvuinak nih Pathian he kan kal tinak ah thazaang a ka fehternak tampi ka hmuh. Hlan ah cun rock ram le a vakvaimi, mi doh hmangmi rak si ko hmanh ning law, kum 20 ka hung si hin

biakinn kal kha ka hun thok. Rianṭuannak saya pakhat cu mi zapi cungah dawtnak a ngei ngaingai ti kha ka hmuh khawh caah Pathian mi taktak a si ko. Mr. Beale cu a tar ngai cang caah pumhnak chungah hin din tete in a holh, zeicahtiah voi tampi a thin kha operation an tuah cang caah a fak pah lengmang rih. Pumh caan cu saupi ko hmanhseh a nganfahnak cu zoh loin aa pummi cungtu ah dawtnak a ngeih zia kha ka hei hmuh.

Cu biakinn ah thla tampi kaa pumh hnuah ka hung hrinṭhan ve. Caan rau lo te ah cu rianṭuantu saya pa cu a thi. A ruakkuang putu dingah a ka nawlnak bia kha ka theih tikah ka lau tuk hringhran. Ka hrinṭhan hlanah a rak ka fial cang, biakinn ah cun hmaan tein kaa pum peng i Pathian hngalh duhnak kha ka ngei.

Mino tampi hna nih a ruakkuang put kha an i cuhmi he tahchun ahcun hi bantuk fialnak tonmi hi lau lo awk a ṭha lo. Mino dang tampi hna cu hi Khrihfabu chung telmi an rak si. Thianghlim tein angki leng kha an i hruk, hngawngngerh an i thlah i an i pum, rianṭuantu caah auh an si. Khatlei inzoh ahcun, hi hna pawl lakah hin cun kei cu zehmanh lo ka si ko. Ka sam cu ka liang a phan, Jean angki dum nganpi longdul in pumhnak ah cun kaa hruk, a zei zong khi ka lo kho ti lo, sihmanselaw Pathian rianṭuantu caah san a tlai ngai dingmi mino pakhat ka rak si!

Keimah he ruakkuang a pu ṭimi pakhat cu a thimi chungkhat laitlai an rak si. Angki leng le hngawngngerh zong cu ka ngei lo i ka hmang bal fawn lo! Ka hippie angki cu hi hmuh ahhin cun ningzak ngai a si ko. Sihmanselaw, Mr. Beale nih special bakin a rak ka thim ti kha ka hngalh. Hi ruakvuinak cu anih caah cun Khrihfa phung in tehtekhanmi a donghnak a si i, a ruakkuang ka putmi zong cu a tan takmi rianṭuannak kha a pumi lakah pakhat ka si ti langternak a rak si. Hi a donghnak hmelchunhnak a simi dawtnak le bochannak Mr. Beale nih a ngeihmi nih a ka hmuhsakmi cu, ka thinlung kha a kekkuai i atu kum 26 a rauh hnu hi ca ka ṭial lio zongah hin a kekkuai ko i Pathian nih a ka auhnak nih hin ka nun cu a ka thlen dih. Hmasa bikah ka tuahmi cu ka sam kaa riam i ruakvuinak caah angkileng le hngawngngerh ka va hlan. Ka vun i zoh ahhin muisam thar in kaa hmu i rianṭuantu tlangval thothar ka si kho ko lai tiah ruahchannak le duhnak ka hung ngei. Cu ruahchannak nih cun Baibal sianginn a ka phakter i rianṭuannak ah ka hung chuak kho cang. Kum saupi a rauh hnu atu ahhin, Bawipa ratṭhan hlan ah hei thi sualning law ka tehte khanmi a dongnak hi dah a si hnga ti khi ka ruat tawn. Mr. Beale nih a rianṭuanmi kha roh dingin ka nunnaka ka thimmi nih hin hi aa lomi dawtnak le fimnak hna hi a langhter lai tiah ka ruahchan ko.

Joshua, Josef le Elezar hna an ruakvuinak in Joshua cauk donghnak kan phan. An bia donghnak cu aa tel ti lo nain, an ruakvuinak ah hin hi Pathian mi hna nih an tehte khannak le zungzal an ro comi hna kha a fehternak kan hmuh. Atu ah cun Daniel nih a rak chimmi ruahchannak thawh ṭhannak hmasa bik kha an hngak ko, “Cun na thi lai i chan donghnak caan ah na hmuh awk hnga kha co awk ah nang cu na tho te lai” (Daniel 12:13).

A Tawinak In Chimmi

Joshua cauk nih Khrihfa kan nun le rianṭuannak ah a biapimi thlarau lei biatak aa ṭialmi tuanbia a kan hmuhsak. Joshua le Israel mi hna nih Pathian nih an chan chung minung hna caah aa tinhmi kha an tlamtlinh bantuk khan kannih zong nih kan tuah khawh lai. Kamhmi Ram an luhnak, an teinak, an i cheuhnak le an zohkhenhnak nih hin Khrih ah kan pumpak rocomi ah kan dir peng khawhnak lai a kan cawnpiak ve. Pathian zumh tlak a sinak le a ṭhawnnak hna hi i bochan peng ko hna u sih. Joshua nih “Tinhmi a khen” bantuk in kan nunnak le kan rianṭuannak ahhin Amah nih a kan sersiam ve ko lai.

Atu Khrihfabu chan ahhin Joshua chan minung hna bantuk kha kan si ve lai ti kan hmuh. Cu ve bantukin, Joshua cauk nih a chimmi bia hna hi kan caah a biapi tuk hringhranmi a si. Atu caan donghnak ah Khrihfabu hna ca zongah, “Jordan tiva tan hi thil lianngan a si ko. Vailam ah tah chih nun le lungthin cuarpar tan nih teinak hmuhnak caah a kan timhlanhnak a si. Hell kutka nih cun Joshua chanmi hna cu a doh kho hna lo. Khrih ratṭhanak caah ṭhanghnak nganpi le vawlei pum huap in Thawngṭha chimnak nih hin Khrihfabu ah teinak le sunparnak a hmuh khawhnak ding caah a rak bawmh i a timhlanh pi.

Kanmah pumpak le tefa hna cungah Pathian kawhauhnak kha tlam a tlin khawhnak lai kan ruah deuh a si ahcun, Pathian timhpiakmi kha kan zoh peng a herh. Khrih rocomi kan hmuh pengnak ding cu atu kan nun

chung ca lawngah hin a si lo i a ra laimi chan ca zongah a si chih. Zungzal hmunmi Pathian pennak ah laksawng kan hmuh laimi le kan dirhmun ah zeitindah kan hmuh khawh lai ti kha tu kan nun chugnah hin kan ruah a herh.

Pathian nih an pekmi “Kamhmi Ram” kha na hmuh khawhnaik lai na thlarau hmuhnaik kha an hunpiak cang maw? Hi Joshua cauk hi na caah lam hmuhsaktu le Pathian nih a tha bik in an hruainak ah bawmchantu le raldohnak ah an teipitu ah na hmang kho maw? Pathian vel thawngin zumhnaik dohnak ahkhan kal u sih law Khrih ro kan comi ahhin tlamtling tein hmun ko hna u sih.

Lunglomhnak

Joshua cauk chuah khawhnak dingah cantha le damnak a kan petu kan biakmi Pathian cu thangthat si ko seh. Hi cauk hi Khrihfa, zumtu vialte nih Pathian nih a kan tinhmi Kamhmi Ram kan co khawhnak hnga le lungsau tein um i cu kan rocomi cu Khrih ranthan hlan tiang fek tein kan i tleih i a kengkawi khomi kan sinak lai harnak tapi chungah zumhtlak tein kan kal peng khawhnak lai a kan cawnpiaak mi a si..

Careltu zumtu hawikawm dawt vialte hna, hi cauk nan relnak thawngin thazang tapi le ralrinak tapi nan hmu theu lai ti zumhnak kan ngei. Kan riantuannak cio ah rattha tein Joshua bang hmai ah a kal khomi kan si cionak lai careltu nan cung ah Pathian nih thluachuahnak in pe ko hna seh.

Thawngthanhnak

Kum 20 chung Lairam ah kan si khawhtawk in a lak tein cauk kan phawt khawh caah Pathian kan thangthat. Atu cu Yangon, Love in Action Office ah cauk manfawi tein kan zuar. Cun a lak in tapi thenh dingmi zong kan ngei. Nai manh can ah rak kan leng ve. Dong loin thla a kan campiaktu nan cungah lunglomhnak tapi kan ngei i Pathian nih thluachuahnak in pe ko hna seh.

